

## APOSTOL REMBIAPO LOS HECHOS

*Tũpa omboura Espíritu Santo viroyasar upe*

<sup>1</sup> Imboeteipri Teófilo, cuese amondo evocoi che rembicuachía Jesús recocuer resendar ndeu. Opa yipindar sembiapocuer amombehu ndeu iyavei yipisui iporombohe agüer.

<sup>2</sup> Ocuerayevire, ivave oso renondeve, Jesús omombehu oporocuita Espíritu Santo pĩratasa pipe güembiporavo apóstol upe sembiaporã.

<sup>3</sup> Oyemboyecua güembiporavo upe omanore. Setá rupi omboyecua tupri ocuerayevisa chupe. Semimbohe osepia yuvireco imanore cuarenta ari rupi. Ahese omombehu Tũpa mborerecuasa resendar güemimbohe upe.

<sup>4-5</sup> Oicove viteso yuvireco sese, aipo ehi chupe:

—Pesēi rene Jerusalén sui. Tomboaviye rane che Ru Tũpa güemimombehu, ahe acoi amombehu pēu. Juan niha pe ãpiramo i pipe tēi; Tũpa rumo Espíritu Santo pipe pe ãpiramora. Movíromi tēi ari ipane vite imondo ãgua pēu —ehi güemimbohe upe.

*Jesús oso ivave*

<sup>6</sup> Oñemonuhase apóstol yuvireco sese, oporandu yuvireco chupe:

—Ore Yar, ¿erembou irira vo cūrítei Israel iguar upe pĩratasa iyeyecuai ãgua? —ehi semimbohe yuvireco chupe.

<sup>7</sup> Ahe rumo aipo ehi chupe:

—Ndiyai ahe arĩ cua ãgua pẽu. Esepia, Tũpa año ité vireco omborerecuasa ahe mbahe apo ãgua.

<sup>8</sup> Peipisira rumo Tũpa pĩratasa oiqueste Espiritu Santo pe piha pipe. Ahese pemombehu tuprira che recocuer Jerusalén pendar upe, Judea pendar, Samaria pendar iyavei opacatu co ivi pipendar upe avei no —ehi chupe.

<sup>9</sup> Aipo ihe pare, omahe apóstol yuvireco sese, aheseve Tũpa vıraso ivave. Ichui Jesús oiqueste iva quıha pãhuve. Evocoyase ndosepia iri eté yuvireco cüte.

<sup>10</sup> Omahe vıteseve yuvinoha ivave ichosa rese, aviyeteramo tẽi ñuvırío mbıa, iturucuar morochı vahe, oyemboyecua apóstol ipıve yuvinoha

<sup>11</sup> aipo ehi yuvireco chupe:

—Galilea iguar, ¿mahera vo pemahe vite iva rese pehã? Evocoi Jesús, inungar Tũpa vıraso ivave pe sui, ãgüe ehi aveira niha ogüeyi ou co ivi pipe coiye —ehi yuvireco chupe.

*Jesús remimbohe oiporavo Matías, Judas recuñara yuvireco*

<sup>12</sup> Evocoyase apóstol oyevi yuvıraso Jerusalén ve ivıtri Olivo sui, ahe ihamombrıgüer ñepeı kilómetro tẽi. Supivemi imombehusa judío guata ãgua mbıtuhusa arı pipe yepi.

<sup>13</sup> Yuvıroiqueste Jerusalén ve, oyeupipa oquesa oi ivateve yuvireco. Aheve Pedro, Juan, Santiago, Andrés, Felipe, Tomás, Bartolomé, Mateo, Santiago ahe Alfeo rahır, Simón ahe Zelote iyavei Judas, Santiago rahır yuvırecoi.

14 Co opacatu ari yacatu rupi oñemonuha oyoya guasu oyerogui ãgua yuvireco yepi Jesús rivri, ichi, ambuae cuña reseve avei.

15 Evocoiyase ñepeí ari pipe oñemonuha guasu ciento veinte ava yuvireco. Ipãhuve Pedro opũha aipo ehi ava upe:

16 “Che mu eta Jesucristo reroyasar, iya ité co imboaviyesa Tũpa Ñehengagüer Judas recocuer resendar. Ahe imombehupri David upe Espiritu Santo pipe aracahe. Evocoi Judas viraso vahe Jesús amotarẽhimbar ipisi uca ãgua.

17 Ahe acoi secói yande pãhuve co mboraviquisa rese yande pitivi ãgua avei viña.

18 Evocoi güembiapo ai repri pipe omboepi ivi. Ipare ñaca iviso oviapi oso ivive, oyetiapiipa.

19 Opacatu ava Jerusalén pendar oicua Judas recocuer yuvireco. Sese co ivi upe, ‘Acéldama’ ehi yuvireco oñehe pipe ‘Ivi Tuví resendar’ oyapave.

20 Esepia, icuachiapri Salmo pipe aipo ehi:

‘Taseyasa sêta yuvireco.

Tipo iri eme ava ipipe’ ehi.

Iyavei ambuae aipo ehi:

‘Toime ambuae secoyar iporaviqui rãgüer pisi ãgua’ ehi vahe.

21 “Evocoiyase cohawe oime ava yande Yar Jesús secói vitese yande pãhuve

22 ñapiramosa suive yuvirecoiño vahe ité yande rupi iyavei ivave ichosa osepia vahe avei yuvireco. Ahe tiporavosa ñepeí ipãhu pendar yande rupi icuerayevi agüer mombehu ãgua” ehi omboetasa upe.

<sup>23</sup> Evocoiyase oiporavo ñuvirío mbia yuvireco: ahe José Barsabás, serosa Justo; ambuae rer Matías.

<sup>24</sup> Ipare oyeroqui yuvireco aipo ehi: “Nde, ore Yar, opacatu ava p̄iha ereicua. Emboyecua cohawe nde rembiporavo oreu; ¿uma vo ereipota

<sup>25</sup> eremondo vaherã icuaitarã apóstol seco ãgua Judas recuñara? Ahe oangaipa p̄ipe oyemocañi uca t̄ei vahe oico” ehi Tūpa upe yuvireco.

<sup>26</sup> Evocoiyase osãha iporavo yuvireco. Matías ité v̄inose iporavop̄ri sui yuvireco. Ichui tup̄ri ité oique once apóstol p̄ahuve.

## 2

### *Espíritu Santo güeyi agüer*

<sup>1</sup> Oyepotase Pentecostés pieta, opacatu Jesús reroyasar oñemonuha oi guasu p̄ipe yuvireco.

<sup>2</sup> Aheve oi p̄ipe av̄iyeteramo t̄ei iv̄itu ip̄irata vahe nungar siapu guasu ou iva sui. Ahe siapugüer oyendupa tup̄ri oi p̄ipe.

<sup>3</sup> Ahese oyecua tata rendigüer nungar opacatu aheve yuvirecoi vahe harive.

<sup>4</sup> Ahese avei Tūpa omoingue evocoi ava p̄iha p̄ipe oEspíritu Santo. Ichui ahe Esp̄iritu omoñehe uca ambuae ñehesa p̄ipe yuvireco.

<sup>5</sup> Ahe ari p̄ipe setá iteanga judío yuvirecoi Jerusalén ve omboav̄iye vahe ocuaita Tūpa mboeteisa, ahe oñemonuha vahe opacatu iv̄i rupindar yuvireco.

<sup>6</sup> Mbahe siapu guasu vahe renduse, oñemonuha ati t̄ei yuvireco oyese. Ndoyemboaracuai t̄ei yuvireco ambuae ava oñehe p̄ipe ñehese.

7 “¡Too!” ehi tēi oyepihamondīsa pipe yuvireco. Sese aipo ehi oyeupe:

—¿Ndahei vo acoi co ava Galilea iguar oñehe vahe yuvireco?

8 ¿Mahera pīha co ñepei-pei oñehe yande ñehe pipe yuvireco? —ehi tēi oyeupe yuvireco—.

9 Esepia, cohave yuvirecoi vahe: Partias pendar, Media pendar, Elam pendar, Mesopotamia pendar, Judea pendar, Capadocia pendar, Ponto pendar, Asia pendar,

10 Frigia pendar, Panfilia pendar, Egipto pendar, Libia cotindar, ahe Cirene cõquivotindar. Iyavei Roma pendar,

11 judío yuvirecoi vahe, ambuae judío aracuasa reroyasar avei, Creta pendar, Arabia pendar. ¡Yande yasendu opacatu yandeu iñehe yuvireco yande ñehe pipe Tūpa rembiapo icatupri vahe! —ehi.

12 Opacatu oyepihamondī, ndoicuai opīhañemoñeta āgua yuvireco.

—¿Mara ehi pīha co na oya yuvireco? —ehi-ehi tēi yuvireco oyeupe.

13 Ambuae ava rumo seroĩrosa pipe aipo ehiño yuvireco:

—¡Osavaipo mo evocoi yuvireco! —ehi.

### *Pedro oñehe ava upe*

14 Evocoiyase Pedro opūha opacatu once vahe apóstol pāhuve, oñehe pīrata aipo ehi: “Che mu judío eta, opacatu Jerusalén pendar avei, peicua co mbahe amombehu vaheṛā pēu; peyapisaca tupri che ñehe rese:

15 ndosavaipoi moco co mbia yuvireco. ¿Ndape-sepiai vo añihivei vite cūritei?

<sup>16</sup> Co niha Tũpa ñehe mombehusar Joel oicuachía vahe aracahe:

<sup>17</sup> “Tũpa aipo ehi:

Coiye, arĩ cañi renonde, amondora che Espíritu Santo opacatu ava upe.

Ipĩratasa pipe pe rahĩr, pe rayri oñehera yuvireco.

Mbĩa chĩhivahe osepiara oquer pendar nungar mbahe yuvireco.

Oime aveira queraisa supi eté vahe cuacua vahe upe.

<sup>18</sup> Supi eté ahe arĩ pipe amondora che Espíritu che rembiguai cuimbahe upe, che rembiguai cuña upe avei.

Ipare oñehera yuvireco che rese ipĩratasa pipe.

<sup>19</sup> Amboyecua poromondiisa ìva rese.

Ëgũe ahe aveira poromondiisa mboyecua ìvi pipe: tuvi, tata iyavei tãtachi.

<sup>20</sup> Yande Yar arĩ tuvichá vahe imboeteipri renonde ohara pĩtu, yasi oyeapora tuvi nungar.

<sup>21</sup> Opacatu ava, che Yar che pĩtivĩi eve, ehi vahe, ahe oñepisĩrora yuvireco’ ehi Joel icuachía aracahe.

<sup>22</sup> “Pe Israel suindar, pesendu che ñehe: Jesús, Nazaret pendar, oyapo poromondiisa tuvichá vahe, mbahe yavai vahe Tũpa pĩratasa pipe pe pãhuve güeco maranehi mboyecua ãgua. Ahe niha peicua opacatu.

<sup>23</sup> Ipare rumo evocoi Jesús imondosa pẽu yuca ãgua. Ahe rumo Tũpa remimbotar rupi. Esepia, yipive ité Tũpa oicua pe peipisĩra yuca uca ãgua curusu rese ava naporai vahe upe.

<sup>24</sup> Tũpa rumo ombogüerayevi manosa sui. Esepia, manosa ndoicatuĩ sereco ãgua.

25 Supi eté mborerecuar guasu David oñehe Jesús recocuer rese aracahe aipo ehi:

‘Che aicua che Yar che rese seci che acato coti mbahe tēi pīpe che viapiēhi āgua yepi.

26 Sese avihaño ité vichico, asapucai avei che rorivetesa pīpe.

Iyavei che yeroya tuprisave asārora mbahe aviye vahe che recove iri āgua.

27 Esepia, nde ndereseyai chira che hã omano vahe pãhuve, nderemonduyu ucai chiaveira nde rembiguai seco maranehi vahe rete-cuer.

28 Co tecovesa ereicua uca cheu.

Che mbovihara eve nde rese che recose’ ehi David aracahe.

29 “Che mu eta, supi eté yande ramoi David omano, ñotisa ita hopri pīpe aracahe. Ahe suvipa ouve vite cohava yande pãhuve.

30 David rumo Tūpa ñehe mombehusar, oicua Tūpa oyeupe aipo ehi vahe: ‘Supi eté aipo ahe ndeu: nde suindar oimera mborerecuar guasu nde recuñara’ ehi vahe.

31 Ahe ndoyavii osepia vahe ité Poropĩsirosar cueravevisa. Evocoyase aipo ehi oñehe sese: ‘Ihã ndopitai chira omano vahe pãhuve iyavei setecuer ndituyui chira’ ehi aracahe.

32 Evocoi Jesús, Tūpa remimbogüeravevi seci. Ahe imombehusar opacatu ore oroico.

33 Ipare Tūpa viraso oacato coti imboguapi. Ahe oipisi imombehupri Espiritu Santo Vu sui. Evocoyase ahe opa omondo co ava yuvirecoi vahe upe. Ahe pesepia, pesendu avei cūritei peico.

34 Esepia, evocoi oso vahe ivave ndahei David. Ahe ae rumo aipo ehi aracahe:

‘Yar aipo ehi che Yar upe:

Eguapî cohavê che acato cotî che pîri.

<sup>35</sup> Asecopîpa uca ranera nde amotarêhimbar ndeu, ehi Yar che Yar upe’ ehi David aracahe.

<sup>36</sup> “Pe tapecuasapa, ticuasapa avei opacatu Israel recua rupi, supî eté evocoi Jesús curusu rese peyatîca vahecuer, ahe Tûpa omoingo opacatu yande Yarã iyavei yande pîsîro ãgua” ehi Pedro ava rehîi upe.

<sup>37</sup> Aipo renduse, tasî iteanga ipîha pîpe yuvîreco. Evocoiyase oporandu chupe, ambuae imboetasa upe avei yuvîreco:

—Ore mu, ¿mbahe vo oroyapora evocoiyase? — ehi.

<sup>38</sup> Evocoiyase aipo ehi ahe ava upe:

—Pemboasi pe angaipa; peyevî Tûpa upe. Iyavei peñeapiramo opacatu Jesucristo rer pîpe. Evocoiyase Tûpa iñerora pe angaipa rese. Iyavei omondora Espîritu Santo pëu.

<sup>39</sup> Esepia, co ñehesa imombehuprî, ahe pëu nara, pe suindar upe nara iyavei opacatu amombri Tûpa sui yuvîrecoi vahe upe nara avei, ahe acoi opacatu yande Yar Tûpa oyeupe nara güeru pota vahe —ehi.

<sup>40</sup> Ëgüe ehi oñhe vîte ava mboaracua aipo ehi:

—¡Peyepêpi co ava secocuer co cotî têi vahe suil! —ehi chupe.

<sup>41</sup> Acoi ava vîroya vahe co ñehesa, oñeapiramo uca yuvîreco. Ahe arî pîpe oyemboeta iri tres mil ava yuvîreco Jesús vîroya vahe rese.

<sup>42</sup> Opacatu vîroya tuprî ité apóstol porombohesa. Opacatu guasu avei oyeaisu tuprî yuvîreco,



oyeroqui iyavei oñemonuha oyeupe pan mboyahoyaho ãgua yuvireco yepi.

*Yipindar vahe Jesús reroyasar recocuer*

<sup>43</sup> Opacatu oyembosiquiye imboeteisa pipe yuvireco. Esepia, apóstol oyapo setá poromondiisa ‘toicua Tūpa suindar yande porombohesa yuvireco’ oyapave.

<sup>44</sup> Opacatu Jesús reroyasar ipihañemoñeta tupri ité ombahe rese yuvireco güecocuer upe nara.

<sup>45</sup> Omondo ambuae ava upe oivi iyavei ombahe eta yuvireco. Sepri omondo oyeupe mbahe panesa rupi-rupi.

<sup>46</sup> Ari yacatu rupi judío tūparove oñemonuha yuvireco. Iyavei oi yacatu rupi avei oñemonuha oyoya guasu pan mboyaho ãgua. Ipare oyoya guasu ocaru yuvireco oyembovihasa pipe, opihañemoñeta tuprisa pipe avei.

<sup>47</sup> Osapucái yuvireco Tūpa upe yepi iyavei opacatu ava osaisu Jesús reroyasar yuvireco. Yande Yar evocoiyase ari rupi omboeta catu ava iñepisiro ãgua Jesucristo viroya vahe pãhuve.

### 3

*Ndoguatai vahe cuerasa*

<sup>1</sup> Ñepeí ari aipo, caharuse las tres pipe, Pedro, Juan reseve oyoya yuviraso judío tūparove. Ahe hora pipe judío oyeroqui yuvireco yepi.

<sup>2</sup> Ahe tūparo roquendipi rer Porañete. Aheve ari yacatu rupi viraso ñepeí ava oyesu suive ndoguatai vahe ‘tomondo guarepochi ava tūparove yuviroique vahe yuvireco chupe’ oyapave.

<sup>3</sup> Ahe ndoguatai vahe omahe Pedro, Juan rese tũparove seique potase, oporandu guarepochi rese chupe.

<sup>4</sup> Pedro, Juan avei rumo omahengatu yuvireco sese. Pedro aipo ehi chupe:

—Emahe ore rese —ehi.

<sup>5</sup> Evocoyase ahe mbia omahengatu sese ‘om-boura revo que mbahe cheu’ oya viña.

<sup>6</sup> Aipo ehi rumo ndoguatai vahe upe:

—Che ndarecoi guarepochi, oro avei. Co areco vahe rumo amondora ndeu: Jesucristo, Nazaret pendar, rer pipe epũha, eguata —ehi chupe.

<sup>7</sup> Evocoyase oipisi ipo yasu cotindar imopuha. Ahe ramoseve opa tupri ipi, ipiñuha avei ovĩracua.

<sup>8</sup> Evocoyase opũha, opo, uguata; oique oso tũparove supi. Opo-opo vorivetesave iyavei osapucaĩ Tũpa upe.

<sup>9</sup> Opacatu ava osepia yuvireco iguatase iyavei Tũpa upe isapucaise.

<sup>10</sup> Omahecuase sese, “¡Too!” ehi tẽi yuvireco. Iyavei ndoyembovihai aviyeteramo tẽi icuerase yuvireco. Esepia, evocoi ava oicuapa tũparo roquendipi Porañete serer vahesave chinise mbahe rese iporanduse yuvireco yepi.

*Pedro oñhe ava rehii upe tũparo Corero Salomón serer vahevrive*

<sup>11</sup> Ndoguatai vahecuer ndoyepipi potai Pedro, Juan sui. Yuvinoña ati, oyepihamondii ava sepia tũparo Corero Salomón serer vaheve yuvirecoise.

<sup>12</sup> Pedro evocoyase aipo ehi ava upe: “Che mu, ¿mahera vo peyemondii? ¿Mahera vo ore repia ati peye? Ndojavii co ore pĩratasa pipe tẽi iyavei

Tūpa rese ore pīhañemoñeta tupriśa pīpe tēi orombogüera vahe co mbīa pēu viña.

<sup>13</sup> Tūpa, ahe acoi Abraham, Isaac iyavei Jacob viroya yuvi reco aracahe iyavei opacatu yande ramoī eta avei no, ahe niha omondo güeco pīratasa tuvicha catu vahe Guahir Jesús upe. Pe rumo acoi pemondoño mborerecuar Pilato povrive. Acoi omose potase, pe evocoiyase ndapeipotaiño imose āgua chupe.

<sup>14</sup> Ahe seco maranehi vahe, seco ĩvi vahe renose rāgüer pīpe, peporandu: ‘Tosē oporapichi vahe’ peye.

<sup>15</sup> Ĕgüe peye acoi tecovesa ombou vahe yuca. Tūpa rumo ombogüerayevi omano vahe pāhu sui. Ahe niha ore oromombehu oroico pēu.

<sup>16</sup> Co Jesús rer rese yeroya pīpe ité niha oipisi pīratasa co mbīa ndoguatai vahecuer opacatu pe pesepia vahe iyavei peicua vahe. Jesús rese yeroyasa pīpe ité niha co pe rembiepiave ocuera tupri” ehi ava upe.

<sup>17</sup> “Che mu eta, che aicua acoi pe peipitivi vahe pe rerecuar Jesús yuca uca āgua pe icua tupriēhi pīpe cuese.

<sup>18</sup> Ĕgüe ehi Tūpa imboaviye aracahendar opacatu oñehe mombehugar upe güemimombegüer: ‘Che Rembiporavo Poropĩsirosar oiporarara mbahe-mbahe tēi rasićuer omano’ ehi vahe.

<sup>19</sup> Sese pemboasi pe angaipa; peyevi Tūpa upe. Ipīpe sui tomocañi pe angaipa pe sui. Aviyeteramo co sui omboura yande Yar pe reco morohisa āgua,

<sup>20</sup> ombou aveira Jesús, ahe yipisuipe iporavopri pe pĩsiro āgua.

21 Cūrītei rumo Jesucristo ivave vīte secoi acoi Tūpa opase voi omoingatu opacatu mbahe iyeve āgua. Aipo ehi acoi imoñehe uca aracahendar oñehe mombehusar ndaseco marai vahe.

22 Moisés yande ramoī yuvirecoi vahe upe aipo ehi imombehu aracahe: ‘Yande Yar Tūpa omopuhara ñepei oñehe mombehusar pe pāhuve che nungar. Ahe iñehe pesendura, pemboyeroya catu aveira.

23 Opacatu ndoviroyai vahe iñehe Tūpa omo-cañira güembiporavo pāhu sui’ ehi.

24 “Ēgüe ehi opacatu Tūpa ñehe mombehusar Samuel suiye aracahe omombehu avei co ari cūrītei yasepia vahe yuvireco.

25 Pëu nara naha Tūpa ñehe mombehusar remimombehugüer aracahendar. Pëu nara avei acoi Tūpa omombehu vahe güemimbotar yande ramoī eta upe. Esepia, aipo ehi Abraham upe aracahe: ‘Opacatu ava co ivi pipendar ahe sovasapri yuvirecoira nde suindar sui’ ehi.

26 Acoi Tūpa Guahir ombogüerayevise, pëu rane ombou pe rovasa āgua ‘toseyapa ñepei-pei güecocuera yuvireco’ oya” ehi Pedro ava rehi upe.

## 4

### *Pedro, Juan serasosa mborerecuar rovai*

1-2 Pedro, Juan reseve oñehe vīteseve ava rehi upe, ahese oñemoīrosa pipe pahi eta, tūparo rārosar sundao rerecuar, saduceo avei oyugüeru yuvireco chupe. Esepia, Pedro iyavei Juan ombohe ava yuvireco aipo ehi: “Jesús ocuerayevi; sese oime cuerayevisa omano vahe pāhu sui” ehi.

<sup>3</sup> Ichui oipisi seraso soquenda yuvireco ‘ayihive voi yanosera mbahe rese porandu ãgua’ ohesa pipe. Esepia, caharuse tēi osoquenda yuvireco.

<sup>4</sup> Setá rumo ava iñehesa osendu vahe viroya yuvireco. Ahe cuimbahe seroyasar retacuer güeraño seni cinco mil.

<sup>5</sup> Ahere ayihive mborerecuareta oñemonuha yuvireco Jerusalén ve: judío rerecuar, pahi eta rerecuar, Moisés porocuita rese oporombohe vahe,

<sup>6</sup> pahi rerecuar ivate catu vahe Anás, Caifás, Juan, Alejandro, opacatu omu reseve.

<sup>7</sup> Evocoyase güeru ucase Pedro iyavei Juan opãhuve yuvireco, oporandu yuvireco chupe:

—¿Ava pe cuaita pipe vo, ava rer pipe avei vo co mbahe peyapo? —ehi.

<sup>8</sup> Evocoyase Pedro, Espíritu Santo pĩratasa pipe, aipo ehi chupe:

—Pe, mborerecuareta co tecua pipendar, pe avei pahi rerecuar:

<sup>9</sup> peporandu niha co ava imbaheasi vahe ndoguata catui vahe mbogüera agüer rese oreu —ehi chupe—.

<sup>10</sup> Evocoyase tapeicuapa opacatu pe Israel suindar peico vahe ocuera co ava ndoguata catui vahecuer Jesucristo, Nazaret pendar, rer pipe. Ahe niha peyatica uca vahecuer curusu rese. Tũpa rumo ombogüerayevi iri omano vahe pãhu sui.

<sup>11</sup> Co Jesús pe remieroĩro, ahe rumo yande vĩracuasa. Pe evocoyase inungar oi mopuhasar omomboño vahe ita aviye catu vahe oi movĩracuasa rãgüer yepi.

12 Ndipoi que ambuae ava sui poropĩsirosa, Jesús güeraño ité oicatu oporopĩsiro. Esepia, Tũpa nomboui ambuae ava tẽi co ivi pĩpe yande pĩsiro ãgua —ehi.

13 Mborerecuar osepiase iyembosiquiyeẽhisa yuvireco, “¿Mara ehi pĩha co mbia? ¡Ava tẽi, ndoyembohei vahe niha!” ehi tẽi yuvireco chupe. Ichui oicua Jesús remimbohegüer secose yuvireco.

14 Iyavei acoi ava semimbogüeragüer supive ité secoise, sese ndoicatu chupe oñehe mara ãgua yuvireco.

15 Ipare, “Pesẽ ocarve” ehi mborerecuareta yuvireco chupe. Ahe güeraño evocoyase opĩta oi pĩpe oñemoñeta yuvireco sese

16 aipo ehi:

—¿Mara yahera vo co ava rereco? Esepia, opacatu ava Jerusalén pendar oicua co mbahe poromondiisa oyapose yuvireco. Ndiyai eté, “Ëgüe ndehi” yahe chupe.

17 Yambosiquiye ava upe Jesús rer rese iñehe iriẽhi ãgua yuvireco. Ipĩpe sui ava tosendu iri eme Jesús resendar ñehesa yuvireco —ehi.

18 Aipo ohe pare, “Perio” ehi yuvireco chupe. “Pesendu, co pĩpe suive peñehe iri eme tupri iyavei pembohe iri eme avei ava Jesús rer pĩpe” ehi yuvireco chupe.

19 Omboyeviño rumo oñehe yuvireco chupe:

—¿Mara ehi pe pĩhave? ¿Uma pĩha aviye catu Tũpa rovai? ¡Pe porocuaite tie oroviroya catura Tũpa ore cuaisa sui!

20 Ndiyai rumo mbahe ore rembiepia, mbahe orendu vahe avei mombehuẽhi ãgua oreu —ehi.

<sup>21</sup> Aipo ihese, mborerecuar ombosiquiye catu tēi yuvireco. Ichui rumo omose tupriño. Esepia, ava omboetei guasu Tūpa yuvireco co imbaheasi vahe mbogüera repiase. Sese ndoicatui eté mbahe apo yuvireco chupe.

<sup>22</sup> Evocoi ava oipisi vahe Tūpa poromondiisa ocuera ãgua, ahe oñiaro catu cuarenta araviter vireco vahe sui.

*Jesús reroyasar oporandu Tūpa upe siquiyeñhisa rese yuvireco*

<sup>23</sup> Yuvinosese Pedro, Juan avei, oyevi yuviraso omboetasa piri. Aheve oñemonuhasave opa omombehu pahi rerecuar oyeupe ñehe mara-mara tēisa yuvireco.

<sup>24</sup> Aipo rendu pare, oyoya guasu oyeroqui yuvireco Tūpa upe aipo ehi: “Ore Yar, nde niha Tūpa opacatu iva, ivi, para guasu, opacatu ipor reseve aposar ereico.

<sup>25</sup> Nde Espiritu Santo pipe aipo eremombehu uca nde rembiguai mborerecuar David upe aracahe: ‘¿Mahera vo co ava ndahei vahe judío oyamotarēhi yuvireco?

¿Mahera vo ipihañemoñeta rai tēi yuvireco?

<sup>26</sup> Mborerecuar guasu eta, ambuae mborerecuar reseve co ivi pipendar oñemonuha yuvireco yande Yar Tūpa iyavei sembiporavo amotarēhi ãgua’ ehi aracahe.

<sup>27</sup> “Ëgüe ehi eté oñemonuhase Herodes, Poncio Pilato avei, ava ndahei vahe judío, judío eta reseve yuvireco co tecua Jerusalén ve. Esepia, oñemonuha

yuvireco nde rembiguai aracaheve nde Rembi-  
poravo Poropĩsirosar Jesús, seco maranehi vahe,  
amotarēhi āgua.

<sup>28</sup> Ēgüe ehi yapo opacatu nde pĩhañemoñeta arac-  
ahendar rupi tupri ité yuvireco.

<sup>29</sup> Iyavei cūritei, ore Yar, emahe ore amo-  
tarēhisar rese. Embou nde pĩratasa nde rembiguai  
oroico vahe upe siquiyeēhisa pĩpe nde ñehengagüer  
mombehu vīte āgua.

<sup>30</sup> Ipare, nde pĩratasa pĩpe, embogüera imbaheasi  
vahe iyavei eyapo mbahe poromondiisa yavai  
vahe nde rembiguai Jesús rer maranehi pĩpe” ehi  
yuvireco oyerokuĩ.

<sup>31</sup> Iyeroqui pare, Tũpa omboriri opacatu mbahe  
iñemonuhasave yuvireco chupe. Ahese Espĩritu  
Santo opa oi que yuvireco sese. Sese osiquiyeēhisa  
pĩpe omombehu tupri Tũpa Ñehengagüer yuvireco.

*Jesús reroyasar ombahe opacatu oyeupe nara  
vireco yuvireco*

<sup>32</sup> Setá iteanga Jesús reroyasar yuvireco.  
Opacatu oyoya tupri ipĩhañemoñeta yuvireco.  
Ndipoi eté “co güeraño co che mbahe” ehi vahe;  
opacatu seroyasar mbahe rumo opacatu mbahe.

<sup>33</sup> Jesucristo apóstol omombehu vīte ipĩratasa  
pĩpe icuerayevi agüer yuvireco. Ipĩpe Tũpa oso-  
vasa catu vīte opacatu yuvireco.

<sup>34</sup> Ndipoi eté ipāhu pendar mbahe ndovirecoi  
vahe. Esepia, opacatu ivi vireco vahe iyavei oi  
omondo,

<sup>35</sup> ahe sepri omondo apóstol upe yuvireco yepi.  
Ahe evocoyase omboyaho-yaho opacatu upe  
mbahe ipane vahe rupi-rupi yuvireco.



<sup>36</sup> Ëgüe ehi ava judío ramoi Leví suindar, Chipre pendar, José serer vahe, apóstol osero, “Bernabé” ehi yuvireco chupe (‘porombovïhasar’ oya aipo ehi),

<sup>37</sup> ahe mbïa omondo oivï, güeru seprï apóstol upe.

## 5

### *Ananías iyavei Safira yemboangaipa agüer*

<sup>1</sup> Ambuae ava rumo, Ananías serer vahe, güembireco Safira reseve omondo ivï yuvireco.

<sup>2</sup> Ahe mbïa rumo omboyaho seprï, ñepeï iyahocuer vireco oyeupe nara, ambuae iyahocuer viraso apóstol upe, sembireco avei oicua tēi opacatu.

<sup>3</sup> Evocoyase Pedro aipo ehi chupe:

—Ananías, ¡mahera ereroya Carugar nde pïha pïpe Espíritu Santo mbopa ãgua, eremboyahoño tēi nde ivï reprï guarepochi ndeyeupe nara!

<sup>4</sup> ¿Ndahei vo nde mbahe ité ivï viña? Eremondo ité niha, evocoyase nde mbahe ité guarepochi. ¡Mahera ereyapo co nungar! Ndahei ava upe nde remira, Tüpa upe ité rumo nde remira —ehi chupe.

<sup>5</sup> Osenduse Pedro ñehesa, ovïapï sehögüer oso sovai. Ahese opacatu oyandu vahe osiquiye tēi yuvireco.

<sup>6</sup> Ipare mbïa chïhivahe yugüeru, osupï sehögüer, oipoque seraso yuvireco ñoti ãgua.

<sup>7</sup> Mbosapï hora pare, sembireco Safira serer vahe oïque oi pïpe. Ndoicua vïtei rumo omer mano.

<sup>8</sup> Ahese Pedro oporandu chupe:

—Emombehu cheu: ¿Co guarepochi retacuer rupi eté vo pemondo pe ivï? —ehi chupe.

—Evocoi rupive ité niha oromondo —ehiño avei cuña chupe.

<sup>9</sup> Evocoiyase aipo ehi ahe cuña upe:

—¡Mahera peyemboyoya pe pihañemoñetasa rese pe secoãha ãgua yande Yar Espíritu! Coi yugüeru nde mer tísarer. Nde avei nde reraso ãgua yuvireco eipeve —ehi chupe.

<sup>10</sup> Ahe ramoseve avei oviapi sehögüer Pedro rovai. Mbia chñhivahe yuviroiquese, oipoque voíño ité sehögüer seraso imer ivii ñoti ãgua yuvireco.

<sup>11</sup> Opacatu Jesús reroyasar, ambuae ava avei oyembosiquiye guasu yuvireco yanduse.

### *Setá poromondiisa yaposa*

<sup>12</sup> Evocoiyase apóstol pipe Tūpa omboyecua uca setá poromondiisa ava pãhuve yuvireco. Opacatu Jesús reroyasar oñemonuha judío tūparo ique, Salomón serer vahesave yuvireco.

<sup>13</sup> Opacatu ambuae ndoyemboyai yuvireco sese osiquiyepave. Ava rehii rumo, omboetei eteanga apóstol yuvirecoi vahe yuvireco.

<sup>14</sup> Oyemboeta catu yande Yar reroyasar setá cuimbahe, setá avei cuña.

<sup>15</sup> Iyavei ava rehii vinose yuvireco imbaheasi vahe supa reseve-seve Pedro renonera, “Oñocuase Pedro, aviyeteramo omohara ihãgüer. Ahese revo ombogüerara” ehi yuvireco oyeupe.

<sup>16</sup> Ava Jerusalén ivirindar avei güeru omonuha setá imbaheasi vahe, carugar rese yuvirecoi vahe apóstol upe imbogüerapirã. Ahe evocoiyase opacatu ombogüera yuvireco.

### *Apóstol yamotarēhipri yuvirecoi*

17 Ichui tēi pahi rerecuar ivate catu vahe, sādūceo yuvirecoi vahe oñemoiro yuvireco apóstol upe ava rese güecatēhisave.

18 Sese oipisi osoquendapa uca yuvireco.

19 Ipare rumo, pĩtu pipe, Tũpa rembiguai iba pendar ou omboi oquenda, vīnose ichui, aipo ehi chupe:

20 “Peso tũparo guasuve, pemombehu avei ava upe co ñehesa tecocuer piasu resendar” ehi chupe.

21 Co mbahe rendu pare, supi tupri ité oyapo yuvireco. Cōhe ramoseve yuviraso judío tũparo guasuve ava mbohe ãgua.

Aheseve pahi rerecuar ivate catu vahe, supindar avei osenoi opacatu tecua pipendar mborerecuar ñemonuha ãgua ivate catu vahesave; omondo yuvireco güembiguai apóstol reru ãgua soquendasa sui aheve nara viña.

22 Oyepotase rumo sembiguai yuvireco, osēca tēi soquendapri. Ichui oyevī tēi yuvireco imombehu

23 aipo ehi:

—Oroyepotase ava roquendasave, orosepia opacatu oquenda imboyapri tupri iyavei orosepia opacatu oquendipi rupi sãrosar osãro tupri ité viña. Oromboise rumo oquenda, ndipoi eté ava soquendapri ipipe —ehi tēi yuvireco.

24 Osenduse, pahi rerecuar ivate catu vahe, tũparo rãrosar rerecuar, pahi rerecuareta avei yuvireco, ipihañemoñeta tēi: “¿Que rupi vo opoira co mbahe sui yuvireco?” ehi tēi yuvireco oyeupe.

25 Aheseve ñepeī mbīa oyepota imombehu:

—Evocoi pesoquenda vahēcuer, ahe mbīa cūrītei oporombohe tũparove yuvireco —ehi chupe.

26 Evocoyase tũparo rãrosar rerecuar, sembiguai avei yuviraso seru ãgua mbahe tupri pipe, “Aviyeteramo yande api-api tiẽtera ava yuvireco yaru raise” ehi yuvireco.

27 Viroyepotase yuvireco ñemonuhasa ivate catu vahesave, ahese evocoi pahi rerecuar ivate catu vahe aipo ehi chupe:

28 —Ore mborerecuar tecua pipendar, ndoroipotai peporombohe evocoi mbia recocuer rese. Pe rumo pembohe opacatu Jerusalén pendar secocuer rese serer pipe. Pemombehu avei ava rehii upe ore mborerecuar oroyuca uca evocoi mbia —ehi pahi rerecuar chupe.

29 Pedro, omboetasa reseve, omboyevi pahi rerecuar ivate catu vahe upe yuvireco:

—Ore cuaita ité Tũpa mboyeroya, ndahei chira rumo ava tẽi rane oromboyeroyara —ehi yuvireco chupe—.

30 Yepe peyatica, peyuca uca Jesús curusu rese viña, yande Ru Tũpa rumo acoi yande ramoi eta viroya vahe, ahe ité ombogüerayevi.

31 Ipare osecomboivate ivave oacato coti imboguapi imoi. Ahe niha Mborerecuar guasu, Poropisirosar avei ‘tomboasi oangaipa, toyevi cheu, toipisi angaipa resendar ñeroisa yuvireco’ oya Tũpa Israel suindar upe.

32 Ore Tũpa rembiapo repiasarer imombehu ãgua oroico, Espiritu Santo avei oñehe ore ñehe rupi ava upe, ahe acoi Tũpa ombou vahe viroyasar upe —ehi.

33 Osenduse mborerecuar aipo ñehesa, oñemoiró iteanga yuvireco. Oyucapa pota opacatu apóstol yuvireco viña.

34 Mborerecuar pãhu pendar rumo oime mbia fariseo, Gamaliel serer vahe, ahe Moisés porocuita rese oporombohe vahe iyavei imboeteipri catu vahe. Ahe opũha oporocuai, “Toyuvĩnose raimi ocarve apóstol” ehi.

35 Ipare aipo ehi ambuae mborerecuareta upe:

—Che mu, judío, peicua catu, yandepihañemoñeta tupri rane mbahe apo ãgua renondeve co mbia upe yuvireco —ehi—.

36 Peyemomahenduha Teudas recocuer rese. Esepia niha, acoi oyemboivate aisa pipe viroguata cuatrociento ava oyeupi aracaco. Ipare acoi oyuca yuvireco. Ahese supindar opa oñemosai tẽi yuvireco. Ahe peve secocuer opa.

37 Coiye catu, omombehuse mborerecuar Roma pendar ava retacuer cua ãgua, ahese Judas, Galilea pendar, oyemomborerecu. Setá avei ava oguata yuvireco supi. Ahe avei rumo oyuca yuvireco, opa tupriño avei supindar oñemosai tẽi yuvireco —ehi—

38 Sese cũritei peyapoi rene mbahe co ava upe. Yaseyaño. Esepia, evocoi mbahe sembiapo ndipocopi chira oyapose opĩratasa pipe tẽi yuvireco.

39 Tũpa suindarse rumo ndapemombituhu catui chietera. Peicua catu, aní chira yayamotarẽhi Tũpa ipipe —ehi omboetasa upe.

Aipo ihese, opacatu imboetasa viroya yuvireco.

40 Ichui rumo güeru iri apóstol inupa uca ãgua iñhe iriẽhi ãgua Jesucristo rese yuvireco. Inupa pare opa omose yuvireco.

41 Ipipe apóstol ovihareté iteanga yuvireco. Esepia, Tũpa ombou chupe iparaisu ãgua yuvireco

Jesús rer rese iyeroyasa sui tēi.

<sup>42</sup> Ipare ndopoi eté ari yacatu Poropĩsĩrosar Jesús recocuer mombehusa sui yuvireco. Omombehuño ité tũparo pĩpe iyavei opacatu ava rēta rupi yuvireco.

## 6

*Siete iporavosa iparaisu vahe pĩtivĩi āgua yuvireco*

<sup>1</sup> Ahe araviter pĩpe aipo oyemboetase Jesús reroyasar yuvireco, griego pĩpe oñehe vahe oñehe rai oyeupe hebreo pĩpe oñehe vahe rese yuvireco: “Nihañeco tuprii ore mu imer mano vahecuer rese ari yacatu mbahe poropĩtivĩisa imondosase chupe” ehi oñehe yuvireco.

<sup>2</sup> Evocoyase doce apóstol omonuhapa uca opacatu Jesús reroyasar. Aheve aipo ehi yuvireco chupe:

—Ndiyai rumo ore oropoi tēi Tũpa Ñehengagüer mombehusa sui mbahe poropĩtivĩisa mondo āgua rese tēi —ehi yuvireco—.

<sup>3</sup> Sese ore rivireta, peiporavo siete mbia seco aviye vahe pe pãhu sui, yaracua vahe iyavei Espĩritu Santo viroya vahe ité opĩha pĩpe. Ahe mbia tihañeco co mboraviquisa rese yuvireco.

<sup>4</sup> Ore evocoyase, oroyerureñora iyavei oroporomboheño itera Tũpa Ñehengagüer rese —ehi yuvireco.

<sup>5</sup> Opacatu oipotaño yuvireco ñehesa oyeupendar. Ichui osenoi Esteban yuvireco, ahe oyeroya ité Tũpa rese iyavei viroya ité Espĩritu Santo opĩha pĩpe. Ichui oiporavo Felipe, Prócoro, Nicanor,

Timón, Parmenas iyavei Nicolás evocoi mbia Antioquía pendar, ahe viroya vahecuer judío aracuasa.

<sup>6</sup> Ichui virasopa apóstol upe yuvireco. Ahe omondo opo iharive oyeroqui yuvireco sese.

<sup>7</sup> Ahese Tūpa Ñhengagüer oyemosai catu tecua pipe. Ichui oyemboeta catu iri avei Jesús reroyasar yuvireco Jerusalén ve. Setá avei judío pahi viroya ñhengagüer yuvireco.

### *Esteban pisisa*

<sup>8</sup> Co mbia, Esteban, vireco ité Tūpa pīratasa iyavei Tūpa porovasasa oyese. Oyapo avei mbahe poromondiisa, yavai vahe opacatu ava pāhuve.

<sup>9</sup> Evocoiyase Jerusalén ve oime judío tūparo Mbiguaigüer serer vahe. Ahe pendar tecua Cirene iguar, Alejandría iguar, Cilicia iguar iyavei Asia ivirindar yuvirecoi vahe reseve oiñehepoepi-epi Esteban yuvireco.

<sup>10</sup> Ndoicatu rumo ñehe recopi āgua yuvireco. Esepia, ahe oñehe mbahecuasa Espiritu Santo omondo vahe pipe.

<sup>11</sup> Evocoiyase yamotarēhimbar omboepi ambuae ava upe semira tēi āgua sese yuvireco. “ ‘Ore orosendu co mbia oñehese mbahe naporai vahe rese Moisés amotarēhisave, Tūpa amotarēhisave avei’ aipo peyera peñehe” ehi yuvireco chupe.

<sup>12</sup> Evocoiyase ahe ava oyamotarēhi uca opacatu ava mborerecuar reseve iyavei judío porocuita rese oporombohe vahe upe avei yuvireco. Ichui oipisi yesapiha Esteban seraso mborerecuar uve porandusa ivate catu vahesave yuvireco.

<sup>13</sup> Iyavei oseca mbia semira tēi vahe oñehe va-herã sese yuvireco. Ahe aipo ehi:

—Co mbia oñehe-ñehe tēi yande tũparo guasu imaranehi vahe amotarēhisave, Moisés porocuita amotarēhisave avei.

<sup>14</sup> Ore orosendu iñehe: “Jesús Nazaret pendar omocañira tũparo guasu iyavei Moisés yande mbohesa avei aipo osecañarora” ehi —ehi yuvireco chupe.

<sup>15</sup> Ahese opacatu mborerecuar oñemonuha vahe yuvinoi aheve omahe Esteban rese yuvireco. Omahese aipo yuvireco sese, ndoyavi sepiaca Tũpa rembiguai ìva pendar rova.

## 7

### *Esteban oñehe oyepisa pipe*

<sup>1</sup> Evocoyase pahi rerecuar ìvate catu vahe oporandu chupe: “¿Supi eté vo aipo nde ñehe mara eico?” ehi chupe.

<sup>2</sup> Ahese omboyevi chupe: “Che mu eta, peyapisaca che ñehe rese: Tũpa imboeteipri oyemboyecua yande ramoi Abraham upe aracahe. Mesopotamia ve secoi vïtese, icho renondeve Harán ve seco ãgua,

<sup>3</sup> aipo ehi chupe: ‘Eso nde recua sui; eseyapa nde mu; eso evocoi tecuave che amboyecua ndeu’ ehi Tũpa chupe.

<sup>4</sup> Evocoyase osẽ Caldea ìvi sui oso tecua Harán ve güeco ãgua. Omano pare tu Harán ve, Tũpa ombou cohava yande recosave.

<sup>5</sup> Yepe oyepota tēi cohava aracahe, Tũpa rumo nomondoimi eté que chĩhi ìvi chupendar chupe.



‘Co ivi amondora ndeu nde mano pare nde suindar upe nara’ ehi Tũpa chupe (ahe rumo ndatahi vitei ahese).

<sup>6</sup> Tũpa aipo ehi avei chupe: ‘Nde suindar yuvirecoira ambuae ava recua rupi, ahe pendar ava secua vahe rembiguirã semimombaraisuguã tẽi avei yuvirecoira cuatrociento araviter rupi’ ehi.

<sup>7</sup> Tũpa rumo aipo ehi avei Abraham upe: ‘Che rumo, aicuara evocoi ava nde suindar mombaraisusar upe yuvireco. Ipare yuvinosera ipovri sui che mboetei iri ãgua cohava yuvireco’ ehi Tũpa chupe aracahe.

<sup>8</sup> Tũpa oyocuai güemimbotar pipe Abraham guahir mbocircuncida ãgua rese. Sese Abraham ombocircuncida guahir Isaac iha pare ocho ari pipe. Isaac ãgüe ehi avei guahir Jacob upe. Jacob ãgüe ehi avei guahireta upe, ahe doce vahe Israel suindar” ehi.

<sup>9</sup> “Ipare yuvirecoi vahe yande ramoi Jacob rahir omondo vivri guarepochi repirã yamotarẽhisa pipe yuvireco. Ahe tivri rer José omondo vahe Egipto pendar upe yuvireco. Tũpa rumo secoiño ité sese.

<sup>10</sup> Ichui vinose opacatu iparaisusa sui. Omondo ombahecuasa chupe iyavei seco aviye tupri ãgua Egipto pendar mborerecuar guasu faraón upe. Evocoiyase faraón ipotasa pipe omoingue mborerecuar seco ãgua opacatu ava ivi Egipto pendar cuai ãgua iyavei güẽta pipendar cuai ãgua avei.

<sup>11</sup> “Ipare ou tiavor opacatu Egipto ivi rupi, Canaán ivi rupi avei. Iparaisu yuvireco. Ahese yande ramoi ndoyosui mbahe güemihura yuvireco.

12 Oyanduse rumo Jacob Egipto ve oime vitesse trigo, ahese omondo guahır aheve seca, ahe yande ramoı yuvırecoı vahe. Ahe yıpındar ichosa Egipto ve yuvıreco.

13 Ichui yuvıraso yupagüe irise Egipto ve, ahese José oyecua uca vıquehır upe. Ëgüe ehi faraón upe oicua uca uma sui oyesu.

14 Evocoiyase José güeru uca oyesupa Jacob iyaveı opacatu omu, ahe imu retacuer setenta y cinco tuprı.

15 Ëgüe ehi Jacob yuvıraso Egipto ve yuvırecoı ãgua opacatu guahır reseve. Aheve omano iyaveı opacatu yande ramoı eta omano yuvıreco aracahe.

16 Imano pare rumo, suminogüer vıraso icangüer yuvıreco tecua Siquem ve. Aheve oñoti yuvıreco. Aheve acoi Abraham vırocua tuvıpa Hamor rahır sui aracahe” ehi mborerecuar upe.

17 “İpare, vırovıse arı ipapaprı Tüpa Ñehengagüer Abraham upendar, ahese yande ramoı setá catu-catu iri oyesu Egipto ve yuvıreco aracahe.

18 İpare oporocuai ambuae mborerecuar guasu Egipto ve. Ahe ndoicuai vahe ité yande ramoı José.

19 Evocoi mborerecuar guasu ombopa yande ramoı eta aracahe. Omombarısu aveı oyucapa uca israelita rahır cuimbahe pıtani. Ahe oyocuai iyepupa aipo ehi: ‘Peseya pe rahır oha ramomi vahe, tomanoño’ ehi yande ramoı upe aracahe.

20 Aheseve aveı aipo Moisés oha. Ahe pıtani avıye ité Tüpa uve. İhare, iyepupa mbosapı yasımı rupıve vıreco oyese güëtave yuvıreco.

21 Oseyase rumo iyepupa ıve yuvıreco, ahese

faraón rayri oseca ahe i rupi sui. Ichui vīnose seraso güētave, omboacua omembrī nungar ité sereco.

<sup>22</sup> Ichui Egipto pendar yaracua vahe opacatu ombahecuasa rese ombohe tupri Moisés sereco yuvireco. Evocoiyase Moisés ipīrata ité oñehese iyavei oyapose mbahe.

<sup>23</sup> “Virecose rumo Moisés cuarenta araviter, ipihañemoñeta: ‘Tasepia rane che mu israelita cohave yuvirecoi vahe’ ehi.

<sup>24</sup> Ipare aheve osepia Egipto pendar oinupanupa imu sereco yuvireco. Ahese oyuca Egipto pendar omu repicave.

<sup>25</sup> Ahe rumo, ‘Oicua revo che mu Tūpa vīnose uca āgua Egipto sui yuvireco cheu’ ehi viña. Imu rumo nomohai eté Moisés vīnose āgua yuvireco evocoi ava po sui.

<sup>26</sup> Ahere ayihive oso omu pāhuve. Aheve osepia ñuvirío mbia ovavase oyeupe yuvireco. Ahe rumo oipota tēi iñero āgua oyeupe yuvireco viña, aipo ehi chupe: ‘Che mu, oñemu mo peico, ¿mahera vo pevava peyese ae?’ ehi tēi chupe.

<sup>27</sup> Oyemoviracua catu vahe rumo omombo oyesui. Ichui ahe aipo ehi chupe: ‘¿Ava vo nde moingue ore pāhuve ore rerecuarā ore recocuer moingatu āgua?’ ehi chupe.

<sup>28</sup> ‘¡Che yuca pota avei tie eve inungar ereyuca evocoi Egipto pendar irapīpe!’ ehi chupe.

<sup>29</sup> Osenduse rumo co iñehe, oñemi voi eté oso Egipto sui ambuae ivi Madián ve. Aheve opita pucu. Ahe ivi rumo ndahei secua ité. Aheve oyesu ñuvirío tahir.

<sup>30</sup> “Omboaviyese cuarenta araviter Madián

ve, Tũpa rembiguai oyemboyecua ivitri Sinaí rerovicave ivi iporupirêhisave caha rese tata rendigüer pãhuve chupe.

<sup>31</sup> Osepiase mbahe sendi vahe oyepihamondii, oyemboya catu sese sepia tupri ãgua viña. Ahese osendu Yar ñehe aipo ehi vahe:

<sup>32</sup> ‘Che nde ramoi Tũpa aico. Nde ramoi Abraham, Isaac iyavei Jacob che reroya vahecuer yuvireco’ ehi. Evocoyase Moisés oririi osiquiyesa pipe nomahe pota iri sese.

<sup>33</sup> Evocoyase Yar aipo ehi chupe: ‘Esequi nde pitaqui. Esepia, ivi nimarai vahesave ereico’ ehi chupe.

<sup>34</sup> ‘Che asepia tupri ité Egipto ve nde mu che rembiporavo paraisuse; asendu avei ipoãse tẽisa yuvireco yepi. Sese agüeyi ndeu nde oromondora aheve senosepa ãgua’ ehi Tũpa Moisés upe arac-ahe.

<sup>35</sup> “Yepe yande ramoi ndoviroya potaiño ité yuvireco, ‘¿Ava vo nde moingue ore rerecuarã ore recocuer moingatu ãgua?’ ehiño yuvireco chupe, Tũpa ité rumo oyocuai güembiguai imbogüeyi tata rendigüer pãhuve imoñehe Moisés upe iporocuai ãgua, ava renosepa ãgua avei ivi Egipto pendar mborerecuar povri sui.

<sup>36</sup> Ipare ahe ité vinose yande ramoi eta Egipto sui, oyapo avei mbahe poromondiisa aheve ‘to-icua Tũpa yuvireco’ oya, para guasu Pïra vaheve avei oyapo poromondiisa iyavei ivi iporupirêhisa rupi avei cuarenta araviter rupi.

<sup>37</sup> Ahe avei aipo ehi israelita upe: ‘Tũpa vinosera pe pãhu sui ñepeï oñehe mombehusar che nungar’ ehi.

38 Ahe avei acoi ivi iporupirēhisa rupi ava pāhu rupi seci. Chupe avei oñehe Tūpa rembiguai ivitri Sinaí ve yande ramoi rese; ahe avei oipisi ñehesa tecovesa resendar yandeu imbou āgua.

39 “Yande ramoi eta rumo nomboyeroya potai eté Moisés yuvireco. Ipihañemoñetaño ité Egipto ve oyevi āgua rese yuvireco.

40 Evocoiyase aipo ehi Aarón upe yuvireco: ‘Eyapomi catu ava tūpa rahanga oreu ore reroguata āgua’ ehi yuvireco chupe. ‘¿Que vo catu Moisés, ore renosesarer Egipto sui, seci? Omano tie revo’ ehi tēi israelita yuvireco aracahe.

41 Ipare oyapo uca mbahe rahanga guaca repiaca nungar oyeupe yuvireco. Oyuca mbahe mimba ahe mbahe rahanga upe viropovēhe vaherā yuvireco iyavei oyemboviha pieta apo yuvireco güemiapo ucagüer rese tēi.

42 Sese Tūpa opoiño ahe ava sui, ‘Toyerure evocoiyase yasi, yasitata upe yuvireco’ ehiño chupe. Aipo ehi niha oñehe mombehusar icuachiapri pipe:

‘Pe peico vahe israelita, ndahei cheu peyuca mbahe mimba seropovēhe āgua cuarenta araviter pipe ivi iporupirēhisa rupi.

43 Pe rumo che mboeteiēhisa pipe peraso tūpa rahanga Moloc rēta iyavei yasitata rahanga Refán pe ae tēi peyapo vahe pe tūpaguã.

Sese che opovinosera pe recua sui pe mondo Babilonia cupe coi coti’ ehi Tūpa chupe aracahe.

44 “Ivi iporupirēhisa rupi yande ramoi eta vireco Tūpa porocuaíta rēta oyeupive yuvireco aracahe mbahe mimba pিরer apopri. ‘Na peyera yapo’ ehi

Moisés upe. Evocoyase ñehe rupi tupri oyapo uca.

<sup>45</sup> Ahese coiye catu yande ramoi eta vireco co oi Tũpa rēta mbahe pīrer apopri yuvireco iyavei Josué rupi yugüeru vahe güerũño ité avei yuvireco, omosepase Tũpa ambuae ava co yande recuavi sui. Ēgüe ehiño vite ité ahe sereco yuvireco mborerecuar guasu, David, secoise aracahe.

<sup>46</sup> Ahe David aviye ité Tũpa upe, oyapo pota setarã ‘toime tũparoguã yande ramoi Jacob rembieroya upe’ oya.

<sup>47</sup> Tahir Salomón rumo omopuha ité ahe tũparo.

<sup>48</sup> Tũpa rumo, seco ivate vahe, ndasecoi vahe tũparo ava tēi rembiapo pīpe. Inungar acoi omombehu vahe Tũpa ñehe mombehusar aracahe aipo ehi:

<sup>49</sup> ‘Iva che renda iyavei ivi che pīrunga.

¿Mbahe nungar oi vo peyapora cheu? ehi yande Yar.

¿Que vo evocoyase che pituhu ãgua?

<sup>50</sup> Che niha opacatu co mbahe aposar aico’ ehi Tũpa icuachiapri pīpe” ehi mborerecuar upe Esteban.

<sup>51</sup> Ichui aipo ehi chupe: “Pe rumo ndapeyapisaca potai vahe ité peico. Oime tēi pe nambi, pe pīha avei, ipīpe rumo ndapeicuai eté Tũpa. Peico Espíritu Santo amotarēhimbar tēi inungar pe ramoi aracahe yuvirecoi.

<sup>52</sup> ¡Uma profeta revo ndovireco meguai pe ramoi yuvireco! Ahe avei oyucapa yipindar omombehu vahe ndaseco marai vahe yusa resendar yuvireco. Cũritei ou ndaseco marai vahe cute. Pe avei evocoyase ahe yuca uca ãgua peporocuai.

<sup>53</sup> Pe pereco tēi Tūpa porocuita acoi Tūpa rembiguai güeru vahe yuvireco; ahe rumo ndaperoyaiño ité peico” ehi Esteban opacatu mborerecuar upe.

*Esteban mano agüer*

<sup>54</sup> Osendupase mborerecuar iñehe, omboasí iteanga yuvireco; oñeaimboterepri ité yamotarēhisave yuvireco.

<sup>55</sup> Esteban rumo vireco ité Espiritu Santo oyese. Evocoyase ìva rese omahese, osepia Tūpa porañetesa. Osepia avei Jesús opūha ohã Tūpa acato coti.

<sup>56</sup> Evocoyase aipo ehi:

—¡Pesepia! Asepia inungar ìva imboipri. Aheve asepia Ava Riquehîr Vu acato coti ihã —ehi.

<sup>57</sup> Mborerecuareta rumo osapucaî pîrata, oyopiño oapisacuar yuvireco ichui. Ahese yuvinoña guasu yuvireco chupe.

<sup>58</sup> Viraso güecua ivîi yuvireco. Aheve oseya oyeaosa Saulo pive ‘tosâro’ oya yuvireco chupe. Ipare oyapi-yapi ita pipe yuca yuvireco.

<sup>59</sup> Oapi-apiseve, Esteban oyerure Tūpa upe: “Che Yar Jesús, eipîsi che hã” ehi.

<sup>60</sup> Ipare oñenopiha, oñehe pîrata Tūpa upe: “¡Che Yar, ndeñero co ava che amotarēhisar angaipa upe!” ehi.

Aipo ohe pare, omano.

## 8

<sup>1</sup> Iyavei Saulo, “Peyuca ité” ehi catu-catu aheve ohã.

*Saulo oseca Jesús reroyasar mocañipa ãgua oico*

Ahe ari pipeve omboipi Jesús amotarẽhimbar seroyasar reca mara-mara tẽi catu sereco ãgua yuvireco Jerusalén ve. Evocoyase opacatu seroyasar oñemosai yuviraso Judea ivi rupi, Samaria rupi avei. Apóstol güeraño opita Jerusalén ve yuvireco.

<sup>2</sup> Oime ava Tũpa mboeteisar yuvirecoi vahe, ahe víraso Esteban rehögüer ñoti yuvireco. Itĩ pare, oyasehó iteanga yuvireco sese.

<sup>3</sup> Ahe pipeve avei aipo Saulo omombaraisu ava Jesús reroyasar yuvirecoi vahe seroya ucaẽhi ãgua viña. Yuviroique-iqueño tẽi aipo sẽta rupi cuimbahe, cuña mbotiriri senose soquenda ãgua yuvireco.

*Samaria pendar osendu ñehesa Jesucristo recocuer resendar yuvireco*

<sup>4</sup> Ava oñemosai vahecuer rumbo Jerusalén sui omombehuño ité ñehesa pĩsirosa resendar que yuvirasosa rupi yuvireco.

<sup>5</sup> Felipe oso Samaria rupi. Aheve omombehu ava upe: “Evocoi Jesús Tũpa Rembiporavo ava pĩsiro ãgua” ehi.

<sup>6</sup> Ahese ava rehii oñemonuha Felipe ñehere rendu ãgua yuvireco. Oyapisaca tupri iñehere rese yuvireco. Esepia, osepia mbahe sembiapo poromondiisa.

<sup>7</sup> Iyavei setá ava carugar rerecosar sui omose carugar. Osẽse ava sui, sãse yuvireco. Iyavei setá ava nomii vahe, ndoguatai vahe avei ombogüera.

<sup>8</sup> Evocoyase oviharete ahe tecua pĩpendar yuvireco.



<sup>9</sup> Aheve rumo mbia, Simón serer vahe, yipive ipaye ai oico, ombosiquiye-quiye ava Samaria pendar. “Che seco ivate vahe aico” ehi angahu ava mbopa.

<sup>10</sup> Evocoyase opacatu ava, cuacua vahe iyavei chihivahe catu vahe oyapisaca tupri ñehe rese, aipo ehi yuvireco: “Co niha Tūpa pīratasa tuvicha vahe” ehi oyeupe yuvireco.

<sup>11</sup> Omboyeroya pucu ité yuvireco. Esepia, opayesa pipe ava ombosiquiye etepri oico yepi.

<sup>12</sup> Oyepotase rumo Felipe Samaria ve omombehu ñehesa aviye vahe Tūpa mborerecuasa resendar, Jesucristo recocuer resendar avei. Ahese ava rehi viroya yuvireco. Ipare oñeapiramo ité yuvireco cuimbahe, cuña avei.

<sup>13</sup> Ahe Simón avei viroya. Oñeapiramo pare, oso Felipe rupi. Co mbahe poromondiisa iyavei Tūpa suindar ndayasepiai vahe rese oyepihamondi.

<sup>14</sup> Jerusalén ve apóstol yuvirecoi vahe oyandu Samaria ve setá ava oipisise Tūpa Ñehengagüer yuvireco. Evocoyase omondo aheve omboetasa Pedro iyavei Juan yuvireco.

<sup>15</sup> Oyepotase aheve yuvireco, oyerure opacatu ava Jesús reroyasar rese ‘Espíritu Santo toipisi yuvireco’ oya.

<sup>16</sup> Esepia, Espíritu Santo ndogüeyi vitei yuvireco sese; oñeapiramoño tēi vite yande Yar Jesús rer pipe yuvireco.

<sup>17</sup> Pedro iyavei Juan oyerurese, omondo opo iharive yuvireco. Ahese Espíritu Santo ogüeyi yuvireco sese.

<sup>18</sup> Ahe osepiase, Simón omondo pota guarepochi chupe,

19 aipo ehi:

—Cheu avei pemboumi tēi evocoi pīratasa, amon-dose che po que ava harive, togüeyi avei Espiritu Santo sese yuvireco —ehi Simón.

20 Omboyevi rumo Simón upe:

—¡Tocañipa nde guarepochi nde reseve! Es-epia, ndepihañemoñeta co Tūpa ombou vahe oreu, ererocua vaheñã nde guarepochi pīpe viña —ehi chupe—.

21 Ndeu ndiyai co nungar mbahe apo ãgua. Es-epia, nde pīhañemoñetasa ndahei ihīvi vahe Tūpa rovaque.

22 Sese epoi nde pīhañemoñeta raisa sui, eyerure Tūpa upe. Aviyeteramo iñerora ndeu —ehi—.

23 Aicua nde pīha naporai vite iyavei nde pīhañemoñeta raisa pīpe vite ereico —ehi chupe.

24 Evocoiyase Simón omboyevi chupe:

—Peyeruremi catu yande Yar upe che rese; tipo eme acoi mbahe pe remimombehu cheu —ehi chupe.

25 Yande Yar ñehesa mombehu pare ahe tecua pendar upe, apóstol omombehu-mbehu co ñehesa pīsirosa resendar Samaria pīpendar tecua rupi yuvireco. Ëgüe ehi oyepota yuviroyevi Jerusalén ve yugüeru.

*Felipe omombehu Jesucristo recocuer Etiopía pendar upe*

26 Ipape Tūpa rembiguai oyemboyecua Felipe upe aipo ehi chupe: “Epūha, eso irohī coti nde yepota ãgua evocoi peri ogüeyi vahe oso Jerusalén sui, Gaza ve” ehi. Evocoi Gaza piar osasa ivi iporupirēhi rupi oso.

27 Evocoyase opũha oso perĩ rupi. Aheve oso-vaĩchi ñepeĩ ava, ahe seco ivate vahe guarepochi apocatusar Etiopía pendar cuña mborerecuar upe nara yepi, ahe mbĩa oso vahe Jerusalén ve Tũpa mboeteĩ ãgua.

28 Oyevise ocãreto pipe, oyoeroqui Tũpa ñehe mombehusar Isaías rembicuachiagüer rese ou.

29 Evocoyase Espíritu aipo ehi Felipe upe: “Eyemboya cãretomi rese” ehi.

30 Evocoyase virovise ahe ava, osendu iyeroqui Isaías rembicuachiagüer pipe oĩ. Ahese oporandu chupe:

—¿Eresenducua aipo Tũpa Ñehengagüer nde yeroquisã eĩ? —ehi chupe.

31 Etiopía pendar mbĩa omboyevi chupe:

—¿Mara ahera vo che senducua viña ndipoise imombehu tuprisar cheu? —ehi chupe.

Ipare, “Erio, eyeupi, tereguapi cohave che piri” ehi Etiopía pendar chupe.

32 Ahe Isaías rembicuachía oyoeroqui vahe pipe aipo ehi:

“Inungar ava viraso ovesa yuca ãgua, ãgüe ehi avei ahe mbĩa seraso yuca ãgua yuvireco.

Iyavei inungar ovesa nasasei eté guagüer rocuase, ãgüe ehi avei ahe mbĩa noñehei eté.

33 Osecomomini yuvireco, ndipoi ava sepisar.

Ndipoi ichuindar.

Esepia, omocañi co ivi sui yuvireco” ehi Isaías rembicuachía pipe.

34 Oyoeroqui pare ahe Etiopía pendar oporandu chupe:

—Emombehumi cheu: ¿Ava rese p̄ha aipo Isaías oñehe: oyese ae p̄ha, ambuae ava rese tie? —ehi.

<sup>35</sup> Evocoyase co ñehesa sui omombehu ñehesa aviye vahe Jesús recocuer resendar Etiopía pendar upe.

<sup>36</sup> Ipare oguata catuse yuvireco, Etiopía pendar osepiá i. Aheve ahe aipo ehi chupe:

—Esepiá co i tui. ¿Ndiyai vo cohava che ãpiramomi t̄ei eve viña? —ehi.

<sup>37</sup> Ahese omboyev̄i chupe:

—Eroya itese opacatu nde piha pipe, iya ité ndeu —ehi.

—Aroya ité niha Jesucristo ahe Tũpa Rah̄ir secoi —ehi.

<sup>38</sup> Evocoyase omombita uca ocãreto, ichui ogüeyi ìve yuviraso. Aheve Etiopía pendar Felipe oñapiramo.

<sup>39</sup> Yuvinosese i sui, yande Yar Esp̄ritu viraso ahe Etiopía pendar sui. Ahese ndosepiá iri; ãgüe ehiño vorivete oso peri rupi.

<sup>40</sup> Felipe rumo oyemboyecua Azoto ve. Ichui oso co tecua Cesarea piar rupi, omombehu Jesús recocuer opacatu tecua rupi. ãgüe ehi oyepota Cesarea ve oso.

## 9

### *Saulo ñecuñaro agüer*

<sup>1</sup> Jerusalén ve rumo Saulo oñemoiró iteanga vite yande Yar reroyasar upe oico. Oyucapa potaño ité. Sese oso pah̄i rerecuar ivate catu vahe upe,

<sup>2</sup> oporandu chupe: “Ereyapomira mbahe icatupri vahe cheu” ehi. “Taso Damasco ve, taseca co Tecocuer P̄iasu rupi cuimbahe, cuña yuvirecoi

vahe” ehi. “Taipiſipa ſeru cohawe nde rer piſe” ehi, “evocoyase eremombehura cuachiar piſe Damasco pendar tũparo rerecuar upe” ehi paſi rerecuar ivate catu vahe upe.

<sup>3</sup> Ēgüe ehi yuvinoſe Jeruſalén ſui, yuviraſo Damasco ve ambuae ava reſeve. Virovi potaſe rumo Damasco yuviraſo, aviſeteramo tēi oſeſape guaſu iſa ſui chuſe.

<sup>4</sup> Evocoyase oviſipi oſo iviſe. Oſendu iſa pendar ñeheſa aipo ehi vahe: “Saulo, Saulo, ¿mahera vo che moña-moña eve?” ehi chuſe.

<sup>5</sup> Evocoyase oporandu chuſe: “¿Ava vo nde ereico, nde mbia?” ehi. “Che Jeſús, che niha co che moña che rereco eve” ehi chuſe.

<sup>6</sup> “Epũha, eique Damasco ve. Aheve amombehu ucara mbahe nde rembiapoguã ndeu” ehi chuſe.

<sup>7</sup> Ava rumo, yuviraſo vahe ſupi, oſiquiyé iteanga oſenduse ñeheſa iſa ſuindar yuviſeco. Eſepia, ndoſepiai eté ivate oñehe vahe yuviſeco.

<sup>8</sup> Ipare Saulo opũha, omahe tēi; ndoicatui rumo mbahe repia. Ichui ſupindar oipiſi iyiva reſe ſeraſo Damasco ve yuviſeco.

<sup>9</sup> Aheve mbosapi ari ndaſeſapiſoi, ndocarui, ndoihui avei oico.

<sup>10</sup> Aheve mbia Jeſucriſto reroyaraſa Ananíaſa ſerer vahe ſecoi. Ahe iquer nungarve oyemboye-  
cua yande Yar aipo ehi chuſe: “¡Ananíaſa!” ehi. “Co aico, che Yar” ehi imboyeſi chuſe.

<sup>11</sup> Evocoyase yande Yar aipo ehi chuſe: “Epũha, eſo calle Iñivi ſerer vahe rupi. Eporandu Ju-  
daſa rētave Saulo, tecua Tarſo pendar, reſe. Ahe oyerogui cũritei.

12 Oquerve angahu osepia mbia Ananías serer vahe omondose opo iharive omboesapiso iri” ehi.

13 Evocoyase omboyeve chupe: “¡Too! Che Yar, setá rumo evocoi mbia recocuer omombehu yuvireco cheu. Mbahe tēi oyapo vahe nde reroyasar reco maranehi upe Jerusalén ve.

14 Cūrtei ou rutei ahe mbia pahi rerecuar porocuaita rupi opacatu nde rer rese oyeroya vahe roquendapa āgua” ehi.

15 Yande Yar rumo aipo ehi chupe: “Eso. Esepia, aiporavo evocoi mbia che recocuer rese oñehe vaheṛā ava ndahei vahe judío upe iyavei serecuar guasu yuvirecoi vahe upe, judío upe avei.

16 Che ae amboyecua setá mbahe tēi chupe oiporara vaheṛā che remimbotar mboaviye āgua” ehi yande Yar chupe.

17 Evocoyase oso secosave. Oiquese ahe oi pipe, oso, omondo opo Saulo rese aipo ehi chupe:

—Che rivri, Saulo, yande Yar Jesús oyemboyecua vahe ndeu peri rupi nde yuse, ahe che mbou ndeu nde mboesapiso iri āgua. Toique avei catu Espiritu Santo nde rese —ehi Saulo upe.

18 Ahese voi eté pira pির nungar mbahe ovīapipa sesa sui. Ahese voi sesapiso iri. Ichui opūha. Ipare voi Ananías oñapiramo.

19 Ipare Saulo ocaruse, ipirata catu iri. Moviro ari tēi opita iri Jesús reroyasar piri Damasco ve.

### *Saulo omombehu Jesús recocuer Damasco ve*

20 Ipare voi oso oñehe judío tūparo yacatu rupi Damasco ve aipo ehi: “Jesús Tūpa Rahir ité secōi” ehi ahe pendar ava upe.

21 Ava opacatu osendu vahe iñehe,

—¿Mara ehi pĩha co? —ehi tẽi yuvireco—. ¿Ndahei vo acoi co mbĩa Jerusalén ve Jesús reroyasar mara-mara tẽi vireco vahe? ¿Ndahei vo acoi co avei ou cohava ava Jesús reroyasar ha pendar pĩsi ãgua serasopa ãgua avei Jerusalén ve pahi rerecuar upe viña? —ehi yuvireco chupe.

<sup>22</sup> Saulo rumo omombehu tupri catu Jesús recocuer. Osecopi opacatu omu Damasco pendar. Omboyecua catu chupe Jesús Tũpa Rembiporavo ava pĩsiro ãgua secosa. Sese ndoicatui judío iñehe mboyevi yuvireco.

### *Saulo oñemi omu sui oamotarẽhise*

<sup>23</sup> Setá ari pare judío ahe pendar omboguai yuca ãgua Saulo yuvireco viña.

<sup>24</sup> Ahe rumo oyandu omboguaisa judío osãrose tecua ãchisa roquendipive ari, pĩtu momba yuvireco yuca ãgua viña.

<sup>25</sup> Jesús reroyasar rumo pĩtu pipe tecua tapia ãchisa oyere tupri vahe tecua rese, icupe rupi ombogüeyi iruova guasu pipe imoñemi imondo yuvireco.

### *Saulo Jerusalén ve secoi*

<sup>26</sup> Coiye Saulo oyepota Jerusalén ve. Aheve oyemboya pota tẽi Jesucristo reroyasar rese. Osiquiye rumo yuvireco ichui. “Aviyeteramo co Saulo, ‘Aroya Jesucristo cute’ ehi tupri tẽira yandeu” ehiño oyeupe yuvireco.

<sup>27</sup> Ipare rumo Bernabé vıraso Saulo apóstol yuvirecoi vahe upe. Aheve Bernabé omombe-hupa chupe aipo ehi: “Co mbĩa Saulo osepia yande Yar peri rupi iyavei yande Yar oñehe chupe. Ichui

co oñehe osiquiyeeñhisa pipe Damasco ve Jesús recocuer rese” ehi.

<sup>28</sup> Evocoyase Saulo opita aheve ipiri. Ari yacatu rupi apóstol rupi oguata yepi, iyavei omombehu yande Yar recocuer osiquiyeeñhise.

<sup>29</sup> Oñehepoepi avei secocuer rese judío griego pipe oñehe vahe yuvireco. Ichui rumo oyuca potaño yuvireco.

<sup>30</sup> Oicuase rumo Jesucristo reroyasar yuvireco, viraso voi eté Saulo Cesarea ve. Ichui omondo Tarso ve yuvireco.

<sup>31</sup> Evocoyase opacatu Jesús reroyasar yuvirecoi vahe Judea rupindar, Galilea rupindar iyavei Samaria rupindar, chupe oime mbahe tupri. Iyavei oyemoviracua tupri catu yuvireco yande Yar mboeteisa pipe, Espíritu Santo oipítivi iyemboeta catu água yuvireco.

### *Eneas mbogüera agüer*

<sup>32</sup> Pedro oguata opacatu rupi oso Jesucristo reroyasar repia. Ahe oso, osepia avei tecua Lida pendar Jesús reroyasar.

<sup>33</sup> Aheve osepia mbia Eneas serer vahe, ahe ndoguatai vahe. Vupave tēi tui vahe ocho araviter rupi.

<sup>34</sup> Pedro aipo ehi chupe:

—Eneas, Jesucristo nde mbogüera —ehi—. Eñarapuha, emoingatu nde rupa —ehi chupe.

Eneas evocoyase oñarapuha voi.

<sup>35</sup> Osepia opacatu Lida pendar, Sarón pendar co ndoguatai vahecuer guatase, viroyapa voi eté yande Yar yuvireco.

### *Dorcas cuerayevi agüer*



<sup>36</sup> Ahe araviter pipe Jope ve cuña Tabita serer vahe secoi, griego ñehe pipe rumo Dorcas serer. Ahe Jesucristo reroyasar secoi. Ahe secocuer aviye vahe oporopitivi yepi.

<sup>37</sup> Imbaheasi guasu rumo. Coiye omano. Ipare ava sehögüer oyosei yuvireco. Ichui viroyeupi oi ivate vahesave seraso yuvireco.

<sup>38</sup> Jope namombriimi Lida sui. Evocoiyase oyan-duse Jesús reroyasar Jope pendar Pedro Lida ve secoise, ahese omondo ñuvirío mbia seru poyava ñgua Jope ve yuvireco.

<sup>39</sup> Evocoiyase Pedro oso supi yuvireco oyepota yuviraso Jope ve. Aheve viroyeupi oi ivateve seraso tehögüersave yuvireco. Opacatu cuña imer mano vahecuer oyere ati voi, oyaseho Pedro ivi yuvireco. Omboyecua avei oturucuar ihari pendar reseve Dorcas rembiapogüer yuvireco chupe.

<sup>40</sup> Ipare Pedro omosepa rane opacatu ava ocarve. Ahese ahe ae oñenopiha, oyerure Tüpa upe. Ichui omahe ahe cuña omano vahe rese aipo ehi chupe:

—¡Tabita, eñarapuha! —ehi sehögüer upe.

Aipo oyeupe hese, Tabita omboi güesa. Pedro repiase, oñarapuha oí.

<sup>41</sup> Ahese oipisi Tabita po rese imoñarapuha. Ipare, “Perio” ehi opacatu Jesús reroyasar, cuña imer mano vahecuer upe avei, “Pesepia ocuer-ayevi” ehi chupe.

<sup>42</sup> Serãcua oyanduse opacatu Jope rupi yuvireco, setá ava yande Yar viroya yuvireco.

<sup>43</sup> Evocoiyase Pedro opita setá ari aheve, mbia mbahe pিরer mopítasar, Simón serer vahe, piri.

# 10

## *Pedro iyavei Cornelio*

<sup>1</sup> Tecua Cesarea ve mbia Cornelio serer vahe secoi, ahe cuartel Italiano serer vahe pendar cien sundao rerecuar.

<sup>2</sup> Ahe mbia omboetei Tūpa opacatu guahir, güembireco reseve yepi. Iyavei omondoño ité judío pītiviĩ āgua guarepochi, oyerokuĩ avei Tūpa upe yepi.

<sup>3</sup> Ñepeĩ arĩ, caharuse las tres rupi, osepia oquer nungar pipe Tūpa rembiguai güecosave aipo ehi chupe: “¡Cornelio!” ehi.

<sup>4</sup> Omahengatuse sese, “¿Mbahe, che Yar?” ehi osiquiyepave. Tūpa rembiguai rumo omboyevi chupe: “Tūpa oipisi nde yeruresa; osepia avei nde poroparisuerecosa” ehi chupe.

<sup>5</sup> “Émondo mbia Jope ve Simón reca. Ahe serer avei acoi Pedro.

<sup>6</sup> Ahe secoi ambuae Simón, mbahe pirer mopitasar piri. Ahe sēta para guasu popive chini” ehi chupe.

<sup>7</sup> Osose Tūpa rembiguai ichui, Cornelio oñehe ñuvirío güembiguai upe iyavei ñepeĩ sundao Tūpa mboeteisar upe, sese acoi oyeroya vahe yepi.

<sup>8</sup> Opacatu Tūpa rembiguai ñehe mombehu pare, omondo Jope ve.

<sup>9</sup> Ahere ayihive vırovıse Jope yuvıraso, Pedro oyeupi oi ipe vahe harıve mbıter arı senıse oyerokuĩ āgua.

<sup>10</sup> Vıeporēhıse ocaru pota viña. Omoıngatu vıtesevı rumo semıhura yuvıreco, avıyeteramo tēı osepia mbahe oquer pendar nungar:

11 ahese osepia ìva oyemboise, ahe ichui turucuar tuvicha vahe pìpe ogüeyi mbahe, ñapichimbri ipopi yacatu ou chupe.

12 Ahe turucuar pìpe, osepia opacatu mahembiar vai, mboi, vïrai vai tēi avei.

13 Ahese osendu ñehesa aipo ehi vahe: “Pedro, epũha, eyuca, ichui ehu” ehi chupe.

14 Pedro rumo omboyevi chupe: “Aní, che Yar, che rumo ndahui vahe ité co mbahe roho ava remimbotarēhi ndihusai vahe yepi” ehi chupe.

15 Osendu iri ñehesa aipo ehi vahe chupe: “Tũpa remimbotapuri upe, ‘Ava remimbotarēhi, ndihusai vahe’ nderei chira” ehi.

16 Ēgüe ehi mbosapi oyupagüer rupi chupe. Ipare turucuar oyevi ivave oso.

17 Pedro ipihañemoñeta vïtese mbahe osepia vahecuer rese oquer nungar pìpe: “¿Mbahe rese pĩha co oyemboyecua cheu?” ehi vïte oico. Aheseve Cornelio remimondo oporandu-randu pare yuvireco, oyepota Simón rēta roquendipive yuvireco.

18 Oñehe pucu oi pìpendar upe yuvinoha: “¿Ave vo Simón, ahe Pedro serer vahe, secoi?” ehi yuvireco.

19 Ipihañemoñeta vïteseve Pedro mbahe oyemboyecua vahecuer rese, Espiritu Santo aipo ehi chupe: “Pedro, esendu rane, pe mbosapi mbia nde reca yuvireco.

20 Eyemoingatu, egüeyi chupe, eso supi. ‘¿Asora pĩha?’ erei rene. Esepia, che ambou evocoi mbia nde reca” ehi Espiritu Santo Pedro upe.

21 Evocoiyase ogüeyi oso chupe.

—Che, che reca vahe peye. ¿Mbahe rese vo peyu cheu? —ehi chupe.

<sup>22</sup> Ahe evocoyase omboyeve iñehe yuvireco chupe:

—Ore oroyu sundao rerecuar Cornelio ore cuaisa pipe, ahe mbia seco ñvi vahe, Tūpa mboeteisar opacatu judío osaisu, oipota rai yuvireco. Tūpa rembiguai oyocuai nde rese ereso vaheñã sētave, ahe osendu vaheñã nde ñehesa —ehi yuvireco Pedro upe.

<sup>23</sup> Evocoyase omoinguepa, omombitapa oyepiri ñepe pĩtu. Ahere ayihive oso supi, moviro Jesús reroyasar Jope pendar yuviraso avei supi Cesarea ve yuvireco.

<sup>24</sup> Ahere ayihive oyepotase Cesarea ve, yuviraso sētave. Cornelio rumo osãro opacatu omu eta rese yuvireco iyavei omboriparete güembisoho reseve avei.

<sup>25</sup> Oyepotase sētave oso, Cornelio rane osẽ voi, osovañchi, oñenopiha sovai imboeteisa pipe.

<sup>26</sup> Pedro rumo aipo ehi chupe:

—Epũha, che niha nde nungar avei aico —ehi chupe.

<sup>27</sup> Evocoyase ahe omoñeta seroique seraso oi pipe. Aheve ava oñemonuha vahe setá osepia yuvireco.

<sup>28</sup> Ahe ava upe aipo ehi:

—Pe peicua judío porocuita aipo ehi vahe: “Peiquei rene ndaheí vahe judío piri. Aní chiaveira pembori evocoi ava peico” ehi acoi —ehi Cornelio rēta pipendar upe—. Tūpa rumo omombehu cheu che quer nungar pipe: “ ‘Ava

remimbotarēhi peico' erei rene ambuae ava upe” ehi cheu.

<sup>29</sup> Pe pemondo ava che reca. Che evocoyase nacheatēhi che yu āgua pēu. Sese che aicua pota, ¿mahera vo che reru uca peye? —ehi.

<sup>30</sup> Evocoyase Cornelio aipo ehi chupe:

—Opa co irungatu ari, caharuse co hora rupi tupri avei, che cohove che rētave aicose, ndacarui eté che yerure āgua Tūpa upe. Aheseve oyemboye-cua mbia Tūpa rembiguai iturucuar rendí iteanga vahe cheu.

<sup>31</sup> Ahe aipo ehi cheu: “Cornelio, Tūpa osendu nde yeruresa iyavei oicua avei nde poroparaisuerecosa.

<sup>32</sup> Emondo nde rembiguai Jope ve Simón Pedro serer vahe reca. Ahe oicove ambuae Simón rētave, ahe mbahe pিরer mopítasar. Ahe sēta para guasu popíve chini” ehi cheu.

<sup>33</sup> Sese amondo voi eté nde reca āgua. Aviye nde ereyu cohove. Cūritei co opacatu yaico cohove Tūpa rovaque. Orosendu pota opacatu nde ñehe yande Yar nde cuai vahe nde ñehe āgua oreu —ehi Cornelio chupe.

### *Pedro oñehe Cornelio rētave*

<sup>34</sup> Evocoyase Pedro aipo ehi chupe:

—Aicua cute, supi eté Tūpa nomboyahoi yande raisu.

<sup>35</sup> Sese ambuae ivi pipendar omboetei vahe Tūpa, oyapo vahe avei mbahe tupri yuvireco, ahe oipisira Tūpa.

<sup>36</sup> Aracahe Tūpa oñehe avei Israel suindar upe, omombehu ñehesa tupri yeamotarēhiēhisa

resendar Jesucristo rembiaporã sui, ahe opacatu ava co ivi pipendar yuvirecoi vahe Yar.

<sup>37</sup> Pe peicua tupri ité co mbahe oime vahe opacatu judío ivi rupi. Ahe omboipi Galilea ve Juan ñeapiramosa mombehu pare.

<sup>38</sup> Peicua revo Tũpa omondo Jesús Nazaret pendar upe opĩratasa, oEspĩritu Santo avei. Ipare Jesús oguata opacatu rupi mbahe tupri apo oico. Om-bogũera avei opacatu ava iparaisu vahe carugar povrive yuvirecoi vahe. Esepia, Tũpa seci sese.

<sup>39</sup> Ore orosepia opacatu Jesús rembiapogũer Judea ivi rupi, tecua Jerusalén pipe avei. Aheve imu oyatica uca curusu rese yuca yuvireco.

<sup>40</sup> Tũpa rumo ombogũerayevi imombosapisa ari pipe. Ipare omboyecua iri oreu.

<sup>41</sup> Nomboyecuai rumo opacatu ava upe, om-boyecua ore sembiporavo oroico vahe upeñomi. Ore piri niha ocaru, oihu avei ocuerayevi pare.

<sup>42</sup> Iyavei ahe ore cuai: “Pemombehu ava upe. Co che Jesucristo, Tũpa Rembiporavo, aico opacatu ava recocuer rese porandu ãgua oicove vite vahe, omano vahe avei” ehi oreu.

<sup>43</sup> Ahe secocuer avei opacatu Tũpa ñehe mombehusar omombehu yuvireco aracahe aipo ehi: “Opacatu acoi seroyasar, ahe virecora Tũpa ñeroisa serer pipe angaipa rese yuvireco” ehi —ehi Pedro Cornelio rēta pipe yuvinoi vahe upe.

*Espĩritu Santo oique ava ndahei vahe judío pihapipe*

<sup>44</sup> Pedro oñehe viteseve, Espĩritu Santo ogũeyi opacatu ava osendu vahe rese.

45 “¡Too! Evocoyase ndahei vahe judío upe avei Tũpa omondo Espĩritu Santo inungar ombou yandeu” ehi Jesũs reroyasar judío yuvirecoi vahe Pedro rupi yugũeru vahe yuvireco.

46 Esepia, osendu ahe oñehese ñehesa ndicuasai vahe pĩpe yuvireco Tũpa upe.

47 Evocoyase aipo ehi vupindar upe:

—¿Oime pĩha ndoipotai vahe co ava ñeapiramo ãgua yande pãhu pendar? Esepia, co oipisi Espĩritu Santo yuvireco inungar yande —ehi vupindar upe.

48 Sese,

—Yañapiramopa Jesucristo rer pĩpe yuvireco —ehi.

İpare Cornelio rĩata pĩpe yuvinoi vahe aipo ehi: “Epĩata vitemi moviro ari ore pĩri” ehi yuvireco chupe.

## 11

*Pedro remimombehu Jerusalén pendar Jesũs reroyasar upe*

1 Evocoyase ambuae apóstol iyavei Jesũs reroyasar Judea ve yuvirecoi vahe oyandu yuvireco ava ndahei vahe judío viroya avei Tũpa Ñehengagũer yuvireco.

2 Oyevisẽ rumo Pedro Jerusalén ve oso, ahese setá judío Jesucristo reroyasar viroĩro sovai eté yuvireco,

3 aipo ehi:

—¡Mahera eresoño tẽi eté ndahei vahe judío pĩri! İyavei nde erecaruño tẽi eté ipãhuve yuvireco no —ehi yuvireco chupe.

4 Pedro rumo omombehu tupri yipisui opacatu mbahe güembiepia yuvireco chupe aipo ehi:

<sup>5</sup> —Che, tecua Jope ve aicose, ayerure. Ahese che quer nungarve asepia turucuar tuvicha vahe nungar ipopi yacatu ñapichisa vahe ogüeyi ou che rovai iva sui.

<sup>6</sup> Asepia ipipe opacatu mahembiar ihupirēhi, mbahe mimba, mboi, vīrai vai tēi avei —ehi—.

<sup>7</sup> Iyavei ahese asendu ñehesa aipo ehi cheu: “Pedro, epūha, eyuca, ehū” ehi cheu.

<sup>8</sup> Che rumo aipo ahe chupe: “Aní, che Yar, che rumo ndahui vahe ité co mbahe roho ava remimbotarēhi yepi” ahe chupe.

<sup>9</sup> Ichui asendu iri ñehesa: “Tūpa remimbocatupri upe, ‘Ava remimbotarēhi’ erei rene” ehi cheu.

<sup>10</sup> Ëgüe ehi mbosapi oyupagüer rupi cheu. Ipare opacatu oyevi iri ivave oso.

<sup>11</sup> Aheseve avei mbosapi mbia imboupri Cesarea sui oyepota yuvireco che recosave che reca.

<sup>12</sup> Espiritu Santo che cuai che so āgua che atēhiēhisa pipe supi yuvireco. Co seis mbia Tūpa reroyasar, yande mu, yuvirasō avei che rupi. Ipare aheve oroyepotase oroso, oroique Cornelio rētave.

<sup>13</sup> Ahe omombehu oreu osepia vahecuer güētave Tūpa rembiguai oyemboyecua vahe sovai iyavei aipo ehi vahe chupe: “Emondo mbia tecua Jope ve Simón Pedro reru āgua.

<sup>14</sup> Ahe omombehura ndeu nde ñepisiro āgua iyavei opacatu nde rēta pendar ñepisiro āgua avei” ehi Tūpa rembiguai Cornelio upe —ehi—.

<sup>15</sup> Añehe ramoseve chupe, Espiritu Santo ou sese yuvireco inungar yande rese ou aracaco.

<sup>16</sup> Evocoyase che chemahenduha voi eté yande Yar ñehengagüer rese aipo ehi vahecuer: “Supi eté



i pīpe Juan oporoãpiramo, pe rumo Espíritu Santo pīpe peñeapiramora” ehi vahe.

17 Tūpa Espíritu Santo omondo chupe inungar ombou yandeu yayeroyase yande Yar Jesucristo rese. Sese ndaipotai eté Tūpa ayamotarēhira —ehi Pedro omu upe.

18 Osenduse rumo co Pedro ñehe, imu noñehe iri sese yuvireco. Ahe rumo,

—¡Too, evocoyase Tūpa ombou avei ndahei vahe judío upe secocuer recuñaro āgua, tecovesa apirēhi vahe rereco āgua! —ehi Tūpa mboeteisa pīpe yuvireco.

### *Ava Jesús reroyasar Antioquía ve*

19 Iyavei Esteban yucare, Jesús reroyasar oñemosai Jerusalén sui yuvireco. Esepia, Jesús amotarēhimbar oyamotarēhi catu yuvireco. Evocoyase amove Jesús reroyasar yuviraso oñemi Fenicia ve, ambuae Chipre ve, ambuae Antioquía ve. Oguatasa rupi omombehuño ité judío upe güeraño Jesús recocuer yuvireco.

20 Amove oñemosai vahe Chipre pendar iyavei Cirene pendar oyepota tecua Antioquía ve yuvireco. Omombehu rumo ndahei vahe judío upe avei ñehesa aviye vahe yande Yar Jesús recocuer resendar yuvireco.

21 Yande Yar pīratasa vireco yuvireco. Evocoyase setá ava viroya; oseyá ité yipīndar güembieroya yuvireco yande Yar reroya āgua.

22 Serācua oyepotase Jesús reroyasar upe Jerusalén ve, ahese omondo Bernabé yuvireco Antioquía ve.

<sup>23</sup> Oyepotase aheve, osepia Tūpa sovasase. Ahese sorivete aipo ehi chupe: “Peyemoviracua catu yande Yar rese. Peyapo semimbotar opacatu pe piha pipe” ehi chupe yuvireco.

<sup>24</sup> Bernabé aviye etepri vahe, viroya ité Espíritu Santo iyavei oyeroya ité yande Yar rese. Evocoiyase setá ava oyemboya yande Yar rese yuvireco.

<sup>25</sup> Ipare oso Tarso ve Saulo reca.

<sup>26</sup> Oyosuse, güeru Antioquía ve. Aheve oyemboya yuvireco ambuae viroya vahe rese imbohe ãgua ñepe araviter rupi. Setá ava oyembohe ipiri yuvireco. Ahese Jesús reroyasar Antioquía pendar upe yipindar, “Cristo reroyasar” ehi yuvireco.

<sup>27</sup> Aheseve Tūpa ñehe mombehusar yugüeru Antioquía ve Jerusalén sui.

<sup>28</sup> Ñepe ipãhu pendar, Agabo serer vahe, opūha aipo ehi Espíritu Santo pīratasa pipe chupe: “Oura tiavor guasu opacatu ivi rupi” ehi, (ahe tiavor oyepota mborerecuar guasu Claudio recose).

<sup>29</sup> Evocoiyase Jesús reroyasar Antioquía pendar omondo pota voi guarepochi Jesús reroyasar Judea pendar pītivi ãgua yuvireco ocatugüer rupi.

<sup>30</sup> Ēgüe ehi yande Yar reroyasar rãrosar Judea pendar upe porerecosa mondo. Bernabé, Saulo ahe porerecosa viraso yuvireco.

## 12

*Santiago mano agüer iyavei Pedro roquenda agüer*

<sup>1</sup> Ahe araviter pipe avei mborerecuar guasu Herodes omboipi Jesús reroyasar mombaraisu.

<sup>2</sup> Ahese oyuca uca quise pucu pipe Santiago, ahe Juan riquehir.

<sup>3</sup> Oyanduse mborerecuar guasu rembiapo, sorivete judío rerecuar yuvireco. Sese Herodes oipisi uca Pedro Pascua pieta pipe. Ahe ari rupi ohu judío pan ndayapepoi vahe yuvireco yepi.

<sup>4</sup> Pedro roquenda pare omondo irungatu imar sui irungatu-ngatu sundao omondo sãro ãgua yuvireco. Mborerecuar ipihañemoñeta: “Opase co Pascua pieta, amboyecua ucara ava rovaque” ehi viña.

<sup>5</sup> Evocoyase Pedro opita voquendasave sãrombri tupri chini. Jesús reroyasar rumo oyerogui pĩrata Tũpa upe yuvireco sese.

*Tũpa omose uca Pedro soquendasa sui*

<sup>6</sup> Ahe ari vinose potase Herodes Pedro soquendasa sui, ahe pĩtu pipe Pedro oque ñuvirío sundao guãrosar rese. Ñapichisa ñuvirío carena pipe ou, ñuvinohambe avei sãrosar soquendasa roquendipive.

<sup>7</sup> Aviyeteramo tẽi Tũpa rembiguai oyemboyecua ique viteseve chupe. Ahese sendi guasú iteanga soquendasa pipe. Ahe oñatoi Pedro iqueve imom-ahe: “¡Epũha poyava!” ehi chupe. Ipũhase, opa voi oyerã carena ipo sui.

<sup>8</sup> Ahese Tũpa rembiguai aipo ehi chupe: “Eyemonde, emonde nde pĩtaqui” ehi. Evocoyase Pedro omonde. Ipare aipo ehi iri: “Emonde avei nde yeaosa, eyu che raquicuei” ehi chupe.

<sup>9</sup> Ëgüe ehi oso saquicuei. Ahe rumo ndoicuai Tũpa rembiguai oyeupe ëgüe ehise. Ndoyavii iquerve tẽi ëgüe ehi vahe chupe.

10 Ichui yuvínose, oñocua yipíndar guãrosar yuvíreco. Ipare yuvíraso catumi ambuae imoñuvíriosa guãrosar oñocua avei. Oyepota oquenda guasu guarepochi apoprive ocarve yuvínose ãgua yuvíreco. Ahe oquenda oyemboi ahe ae ité chupe yuvíreco. Ipare yuvínose yuvíraso pucumi ocarusu rupi. Aviyeteramo tēi Tūpa rembiguai ndoyecua iri chupe.

11 Evocoyase Pedro aipo ehi oyeupe: “¡Too! Supi eté Tūpa ombou cheu güembigui che renose ãgua Herodes povri sui. Tūpa che pĩsiro judío rereciar che yuca rãgüer sui” ehi oyeupe.

12 Oyese opíhañemoñeta pare, oso, oyepota Juan Marcos si María rētave oso. Aheve setá ava oñemonuha oyerogui yuvíreco sese.

13 Oñehese Pedro oquenda ocar cotíndarve, cuñatai, Rode serer vahe, osẽ imboi ãgua chupe.

14 Osenduse rumo Pedro ñehe, oquenda omboi rãgüer sui, oña oique oi pipe vorivetesave, omombehu: “Pe Pedro ihãi oquendipive” ehi oi pipendar upe.

15 Ahe rumo,

—¿Nanderocoi vo eico? —ehiño yuvíreco chupe.  
“¡Aní! Supi eté” ehiño Rode chupe.

—Ndahei ahe, Tūpa rembiguai mo aipo sãrosar — ehiño yuvíreco chupe.

16 Aheseve Pedro oñehe viteño ité oquendipive ohã. Ichui omboise oquenda yuvíreco chupe cute, oyembosiquiye iriño tēi sepiase yuvíreco.

17 Pedro rumo opo omopuha imonguiriri ãgua. Ichui opa omombehu yande Yar opĩsiro agüer voquendasa sui chupe yuvíreco. Ipare aipo ehi chupe:

—Pemombehupa Santiago upe iyavei ambuae Jesús reroyasar upe —ehi.

Ichui oseño, ambuaeve oso.

<sup>18</sup> Cõhese sundao oyepihamondii eteanga yuvireco. “¿Que pñha Pedro?” ehi tõi oyeupe yuvireco.

<sup>19</sup> Ipare Herodes omondo sundao Pedro reca. Ndoyosui eté rumo yuvireco. Evocoyase Herodes porocuita rupi oporandu tupri sãrosar upe: “¿Que vo secoi?” ehi tõi chupe. Sese oyocuai ambuae sundao opacatu ahe sãrosar yucapa ãgua. Ipare Herodes osẽ Judea sui oso Cesarea ve oyemboerecua.

### *Herodes mano agüer*

<sup>20</sup> Yipindar rumo Herodes ndasori eté ava Tiro pendar upe, Sidón pendar upe avei. Evocoyase ahe pendar oyoya ipihañemoñeta yuviraso vaheřã mborerecuar rovai. Ahe evocoyase oyembori Blasto rese yuvireco, ahe mborerecuar Herodes mboyoyasar. Ahe oporandu Blasto upe Herodes moñero uca ãgua rese yuvireco. Esepia, Herodes porocuita sui oipisi mbahe güemihura yuvireco.

<sup>21</sup> Herodes evocoyase omombehu ari oñehe vaheřã chupe. Osupitise ahe ari, omunde sese iturucuar mborerecuar secosa resendar yivirindar yuvireco. Ipare güenda imboeteipri harive uguapi oĩ. Aheve oñehe ava rehi upe.

<sup>22</sup> Evocoyase ava rehi osapucái pĩrata yuvireco aipo ehi: “¿Co mbia oñehe vahe ndahei ava tõi, Tũpa ité!” ehi yuvireco Herodes upe imboeteisave.

<sup>23</sup> Ava aipo iheseve voi, ñepeí Tũpa rembiguai oyapo mbaherasi guasu chupe. Ichui mbahe rasoí

ocaru yaviter rupi yuvireco. Esepia, nombotei eté Tūpa. Sese omano.

<sup>24</sup> Tūpa Ñehengagüer rumo imombehusa catu opacatu rupi.

<sup>25</sup> Iyavei Bernabé, Saulo ocuaita mboaviye pare, viroyevi Juan Marcos seraso yuvireco.

## 13

*Tūpa oiporavo Bernabé, Saulo oyeupe mboraviqui apo āgua*

<sup>1</sup> Evocoyase Jesús reroyasar Antioquía pendar pāhuve oime Tūpa Ñehengagüer mombehusar, sese oporombohe vahe avei. Ahe Bernabé, Simón (chupe, “Avañ” ehi yuvireco), Lucio evocoi Cirene pendar, Manaén (ahe mbia oyoya ocuacua mborereciar Herodes, Galilea pendar reseve) iyavei Saulo.

<sup>2</sup> Ñepeí arí opacatu Jesús reroyasar oñemonuhase yande Yar mboetei āgua, oyecuacu avei, ahese Espíritu Santo aipo ehi chupe: “Peiporavo Bernabé iyavei Saulo. Evocoi mbia aiporavo cheyeupe mboraviqui apo āgua” ehi Espíritu Santo yuvireco chupe.

<sup>3</sup> Evocoyase oyeruqui pare, omondo opo yuvireco iporavopri āca harive sovasa āgua. Ipare omondo yuvireco ambuae tecua rupi Jesús recocuer mombehu āgua.

*Apóstol yuvirecoi Chipre rupi*

<sup>4</sup> Evocoyase Bernabé, Saulo Espíritu Santo remimondo yuviraso Seleucia ve. Ichui yuviraso carite pipe caha pāhu Chipre ve.

<sup>5</sup> Oyepota yemboyasa Salamina ve yuvıraso. Aheve omombehu Tūpa Ñehengagüer judío tūparo rupi yuvıreco. Juan avei oso supı ipıtıvıı āgua.

<sup>6</sup> Opase ité oguata caha pāhu Chipre pıpe yuvıreco, oyepota ambuae tecua Pafos serer vahesave yuvıraso. Aheve judío ipaye vahe Barjesús serer vahe osepia yuvıreco. Ahe oporombohe tēi: “Che añehe Tūpa Ñehengagüer rese” ehi tuprı tēi vahe.

<sup>7</sup> Ahe ipaye vahe oicove Chipre pendar mborerecuar Sergio Paulo serer vahe pıri, ahe mborerecuar yaracua vahe. Ahe güeru uca Bernabé, Saulo avei Tūpa Ñehengagüer rendu potasave oyeupe.

<sup>8</sup> Ipaye vahe rer griego ñehe pıpe Elimas. Ahe ndovıroya ucai güerecuar upe ñehesa supı eté vahe.

<sup>9</sup> Evocoiyase Saulo, Pablo serer vahe, vıreco ité vahe Espıritu Santo opıha pıpe, omahe tuprı sese.

<sup>10</sup> Ipare aipo ehi chupe:

—ıNde iporombopa serai vahe ereico! ıNdıpıhai vahe, Caruguar rahır tēi ereico! Opacatu mbahe avıye vahe amotarēhisar tēi avei ereico no. ıMaha nderepoi potai yande Yar porombohesa supı eté vahe reroırosa sui.

<sup>11</sup> Eyapısaca, cūritei yande Yar nde mombarısura. Nande mboesapısoi chira movıro arı rupi. Ichui ndereicatu iri chietera arı rendıgüer repia āgua —ehi Pablo chupe.

Aipo ehi ramoseve voi, opacatu pıtumımbi chupe. Oñehe tēi ava güeraso āgua upe.

<sup>12</sup> Ahe mbahe repiase, mborerecuar vıroya yande Yar. Oyepıhamondıi porombohesa yande

Yar resendar renduse.

*Pablo, Bernabé reseve yuvirecoi Antioquía ve Pisidia ivi pipe*

<sup>13</sup> Evocoiyase Pablo, supindar avei, yuviraso carite pipe Pafos sui Panfilia rupindar Perge ve. Juan rumo oseya oyevi Jerusalén ve oso.

<sup>14</sup> Perge sui yuviraso Antioquía ve, ahe namombrii Pisidia sui. Aheve, mbituhusa ari pipe, yuviroique judío tūparove oguapi yuvinoi.

<sup>15</sup> Oyeroqui pare Tūpa porocuita resendar cuachiar pipe, Tūpa ñehe mombehusar cuachiar pipe avei, tūparo pendar rerecuar omondo oñehe Pablo upe:

—Ore mu, perecose mbahe pemombehu vahe rã co ava monguerẽhi ãgua, pemombehumi yandeu cūrítei —ehi.

<sup>16</sup> Evocoiyase Pablo opūha ohã. Omopuha avei opo ‘toyapisaca che ñehe rese yuvireco’ oya aipo ehi:

—Che mu eta, Israel iguar, iyavei pe ndahei vahe judío Tūpa mboeteisar, pesendu che ñehe —ehi—.

<sup>17</sup> Israel iguar Tūpa oiporavo yande ramoi oyeupe nara, ahe Egipto ivi pipe omboeta secua ambuae vahe secosa pipe. Ipare opĩratasa pipe vinosepa ahe ivi sui aracahe.

<sup>18</sup> Ipare Tūpa oñemosañõ yande ramoi reco ai upe cuarenta araviter rupi, oguatase yuvireco ivi iporupirẽhisa rupi.

<sup>19</sup> Ipare omocañi ava eta Canaán pipendar siete tupri yuvirecoi vahe serecuar reseve-seve. Ipare omondo Canaán ivi yande ramoi upe nara.

<sup>20</sup> Ëgüe ehi cuatrocientos cincuenta araviter rupi yapo yuvireco —ehi.



“Ipare Tũpa ombou ava recocuer moingatusar oporocuai vaheã. Ipa vahe ipãhu pendar serer Samuel aracahe. Ahe Tũpa ñehe mombehusar avei.

<sup>21</sup> Ahese yande ramoi eta oporandu yuvireco Tũpa upe mborerecuar guasu rese. Evocoiyase Tũpa omondo Saúl chupe, ahe Cis rahir, ahe yande ramoi Benjamín suindar secoi. Oporocuai cuarenta araviter rupi oico.

<sup>22</sup> Ipare Tũpa virocua imborerecuasa ichui; omondo David upe yande ramoi cuai ãgua. Ahe secocuer rese aipo ehi: ‘Co David, Isaí rahir, oyapo che remimbotar yepi. Ahe omboaviyera che porocuaita’ ehi Tũpa.

<sup>23</sup> Ahe David suindar sui, Tũpa ombou Jesús Israel iguar pĩsiro ãgua. Aracaheve Tũpa omombehu co yande ramoi upe.

<sup>24</sup> Yande Yar yu renondeve, Juan omombehu opacatu Israel iguar upe: ‘Pemboasi pe angaipa, peyevi Tũpa upe pe ñeapiramo ãgua’ ehi chupe.

<sup>25</sup> Juan omboaviye senimise ocuaita, aipo ehi ava upe imombehu: ‘Pepihañemoñeta revo: co ité yande pĩsirora, peye cheu viña. Oura rumo ambuae che raquicuei. Ahe che sui ivate catu vahe sese cheu ndiyai ipitaquisã yora ãgua ipi sui’ ehi Juan” ehi judío tũparo pendar upe imombehu.

<sup>26</sup> “Che mu eta, pe Abraham suindar iyavei ndahei vahe Abraham suindar Tũpa mboeteisar, opacatu yandeu nara ombou Tũpa co ñehesa pĩsirosa resendar.

<sup>27</sup> Jerusalén pendar rerecuar avei ndoicuai evocoi Jesús Tũpa remimbou secoise yuvireco. Iyavei

ndosenducuai Tūpa ñehe mombehugar cuachiar pīpe oyerōquise mbītuhusa arī yacatu yuvireco. Ichui ahe ae oyuca uca yuvireco. Ēgüe ehi imboaviye Jesús rese Tūpa ñehe mombehugar rembicuachiagüer pīpendar yuvireco.

<sup>28</sup> Yepe ndoyosui mbahe sembiapo rai yuca uca āgua yuvireco viña, ahe rumo oporandũño Pilato upe yuca uca āgua rese yuvireco” ehi.

<sup>29</sup> “Ichui omboaviyese opacatu icuachiapri pīpendar yuvireco, ovīroyī uca curusu sui ñoti āgua yuvireco.

<sup>30</sup> Tūpa rumo ombogüerayevi iri.

<sup>31</sup> Setá arī rupi oyemboyecua oyeupi oguata vahe upe, evocoi ava yugüeru vahe supi Galilea sui, Jerusalén ve. Cūrītei ahe ava ité omombehu Jesús recocuer ava upe yuvireco” ehi tūparo pendar upe.

<sup>32</sup> “Sese che mu eta, cūrītei oromombehu pēu evocoi ñehesa aviye vahe Tūpa omondo vahe yande ramo upe aracahe.

<sup>33</sup> Tūpa omboaviye ramo güemimombehugüer yande Israel suindar yaico vahe upe, ombogüerayevise Jesús. Evocoi güemimombehu oicuachía uca Salmo moñuviriosa pīpe aipo ehi: ‘Co pīpe nde che Rahir ereico; che nde Ru aico’ ehi Tūpa chupe.

<sup>34</sup> Tūpa omombehu avei güemimbogüerayevi sete tuyuēhi āgua icuachiapri pīpe aracahe aipo ehi: ‘Che niha oroovasara acoi David upe che ñehe maranehi supi tupri vahe mboaviye āgua’ ehi.

<sup>35</sup> Sese omombehu avei ambuae icuachiapri pīpe: ‘Nde, Tūpa, ndereseyai chira nde rembiguai

Ava seco maranehi vahe rete ituyupa ãgua' ehi.

<sup>36</sup> Supi eté, David omboaviye ocuaita ava rese ohañecosa pipe yepi. Ipare omano. Evocoiyase oyapocatu tuvipave imu pãhuve yuvireco. Ahe setecuer rumo opaño ité ituyu" ehi.

<sup>37</sup> "Acoi Tũpa ombogüerayevi vahe retecuer rumo ndituyui eté" ehi tũparo pendar upe imombehu.

<sup>38</sup> "Sese, che mu eta, peyapisaca, tapeicua evocoi Jesús recocuer sui oime ñeroisa angaipa rese yandeu. Ahe co amombehumi pẽu. Moisés porocuita sui ndipoi ñeroisa angaipa rese yande reco mohivi ãgua.

<sup>39</sup> Jesús recocuer sui rumo oime ñeroisa ñepeipei viroya vahe upe" ehi.

<sup>40</sup> "Peicua catu co mbahe sui, toviapi eme pe harive acoi Tũpa ñehe mombehusar rembicuachi-güer pipe aipo ehi vahe:

<sup>41</sup> 'Esepia, pe seroĩrosar peico vahe. Peyepihamondi, ipare pecañi tẽira. Esepia, che ayapora mbahe pe recoveseve. Yepe ambuae omombehu tupri itera pẽu che rembiaporã viña, pe rumo ndaperoyai chietera' ehi Tũpa" ehi Pablo tũparo pendar upe.

<sup>42</sup> Yuvinose potase tũparo sui, omombita Pablo yuvireco: "Teremombehu irimi eremombehu vahe ñehesa ambuae mbĩtuhusa ari pipe oreu" ehi yuvireco chupe.

<sup>43</sup> Yuvinosese ava rehi tũparo sui, setami judío iyavei ambuae oyembojudío vahe yuviraso Pablo, Bernabé rupi yuvireco. Ahese, "Peico tupri catu Tũpa pe rovasasa pipe" ehi ava upe yuvireco.

<sup>44</sup> Ambuae mbituhusa ari pipe seni opacatu ava ahe pendar oñemonuha yuvireco Tũpa Ñehengagüer rendu água.

<sup>45</sup> Osepiase ava rehi, judío rerecuar oñemoiró iteanga Pablo upe, supindar upe avei yuvireco. Viroĩro Pablo ñehe ava upe yuvireco.

<sup>46</sup> Evocoiyase Pablo, Bernabé reseve oñehe yuvireco judío upe osiquiyeẽhisave:

—Tũpa ore cuai pẽu rane ore ñehe água. Pe rumo ndapeyapisaca potai ñehengagüer rese. Ipipe sui ndiyai peipisi tecovesa apirẽhi vahe. Evocoiyase orosora, oroñehe ava ndahei vahe judío upe.

<sup>47</sup> Esepia, yande Yar ombou ore cuaitarã co ñehesa rese aracahendar aipo ehi vahe:

‘Che oroporavo tataendi nungar nde reco água ndahei vahe judío yuvirecoi vahe upe pĩsirosa reroguata água opacatu ivi rupi’ ehi.

<sup>48</sup> Ava ndahei vahe judío osenduse co ñehesa, oviharete yuvireco, omboetei avei Tũpa Ñehengagüer. Opacatu ava iporavopri tecovesa apirẽhi vahe pisi água, ahe viroya yuvireco.

<sup>49</sup> Evocoiyase Tũpa Ñehengagüer omombehu opacatu ahe ivi rupi yuvireco.

<sup>50</sup> Judío rumo omonguerẽhi cuña imboyeroy-apri Tũpa mboeteisar iyavei mbia seco ivate vahe Pablo, Bernabé mose uca água güecua sui yuvireco yamotarẽhisave.

<sup>51</sup> Ahese Pablo, Bernabé oipipete opitaqui ivi sui yuvireco ‘Tũpa toicua mbahe sembiapo ai rese yuvireco chupe’ oya. Ichui yuviraso Iconio ve.

<sup>52</sup> Jesús reroyasar rumo oviharete yuvireco, vireco ité Espiritu Santo oyese yuvireco.

## 14

*Pablo, Bernabé reseve omombehu Tūpa Ñehengagüer Iconio ve yuvireco*

<sup>1</sup> Pablo, Bernabé oyepota Iconio ve yuvirasos. Aheve yuviroique judío tūparo pipe, omombehu tupri yande Yar recocuer yuvireco. Sese setá ava viroya iñehesa yuvireco judío, ndahei vahe avei judío.

<sup>2</sup> Judío ndoviroyai vahe rumo oipihañemoñeta rerova yuvireco ava ndahei vahe judío Pablo, Bernabé iyavei ambuae Jesús reroyasar amotarēhi āgua.

<sup>3</sup> Ahe rumo opita pucu yuvireco Iconio ve, omombehuño yande Yar recocuer osiquiyēhisave yuvireco. Aheve Tūpa ombou opiratasa mbahe yavai vahe apo āgua chupe ‘ichui toicua yuvireco Pablo, Bernabé che poroaisusa mombehuse’ oyapave.

<sup>4</sup> Ahe tecua pendar rumo ipihañemoñeta yovi yuvireco: ñepi judío pihañemoñetasa rupindar; ambuae evocoyase apóstol pihañemoñetasa rupindar yuvireco.

<sup>5</sup> Oime judío iyavei ndahei vahe judío oyemboyoya mborerecuar rese mara-mara tēi sereco āgua yuvireco, “Ita pipe avei yayapi-yapi” ehi yuvireco chupe viña.

<sup>6</sup> Oyanduse rumo yuvireco, oñemi voi yuvirasos Licaonia rupi, Listra ve, Derbe ve, ipopi rupi avei.

<sup>7</sup> Supi omombehu ñehesa aviye vahe Jesús re-sendar yuvireco.

*Pablo yapi-yapisa ita pīpe Listra ve*

<sup>8</sup> Listra ve yuvirecoise, oime mbia oha ramomi suive ndoguatai vahe. Ahe mbia uguapi oĩ

<sup>9</sup> oyapisaca Pablo ñehese. Ahese Pablo omahengatuse sese, oicua ndoguatai vahe oyeroya ité Tūpa rese ocuera āgua.

<sup>10</sup> Evocoyase aipo ehi pīrata chupe:

—¡Epūha! —ehi.

Ahese opo, opūha, uguata voi.

<sup>11</sup> Osepiase ava rehi mbahe sembiapo yuvireco, osapucaĩ pīrata Licaonia ñehese pīpe yuvireco:

—¡Tūpa ité ava nungar ogüeyi yuvireco yandeu! —ehi yuvireco Pablo, Bernabé upe viña.

<sup>12</sup> Ipihañemoñeta yuvireco Bernabé ahe tūpa Zeus iyavei Pablo ahe tūpa Hermes viña. Esepia, Pablo oñehese vahe.

<sup>13</sup> Ahese co tūpa Zeus pahi güeru tivi, mbahe potri avei. Ahe tecua tapi roquendave, ahe Zeus tūparo tecua pīpe ava reiquesa rupi chini. Oyuca pota tivi Pablo, Bernabé mboeteĩ āgua yuvireco viña.

<sup>14</sup> Oicuase rumo Bernabé, Pablo, ahese omondoro oturucuar yuvinoña ava pāhuve; oñehese pīrata yuvireco:

<sup>15</sup> —Mbia, ¿mahera ēgüe peye oreu? —ehi—. Ore rumo ava tēi pe nungar avei oroico. Oromombehu: “Pepoi co mbahe ēgüe ehi tēi vahe mboeteisa sui; peroya Tūpa supi eté vahe” orohe pēu. Ahe oyapo vahe i va, i vi, para guasu, opacatu ipor reseve.

16 Aracahe rumo Tūpa, “Ēgüe tehi oguata ndahei vahe judío opihañemoñetasa rupi yuvireco” ehi viña.

17 Tūpa rumo ndasesarai ava upe mbahe tupri apo ãgua sui. Ahe ombou amar pẽu mbahe miti ha aviye ãgua yepi. Ēgüe ehi mbahe tembihu imbou iyavei viharetesa pẽu – ehi ava upe yuvireco.

18 Yepe aipo omombehu yuvireco chupe, ava rehi rumo seniño ité tivi oyuca yuvireco chupe imboetei ãgua viña.

19 Ahese oyepota moviro judío Antioquía sui, Iconio sui avei. Oipihañemoñeta rerova ava rehi yuvireco. Ichui oyapi-yapi ita pipe Pablo yuvireco. Ipare ombotiriri seraso yuvireco tecua ivi. Ipihañemoñeta: “Yayuca ité” ehi yuvireco chupe viña.

20 Oyere tupri Pablo rese Jesús reroyasar yuvireco. Ahe rumo oñarapuha, oi que iri oso tecua pipe. Ahere ayihive yuvinose oyevi yuviraso Bernabé reseve Derbe ve.

21 Omombehu tuprise co ñehesa icatupri vahe Derbe rupi, setá ava viroya yande Yar yuvireco. Ipare oyevi yugüeru Listra rupi, Iconio rupi avei, oyepota Antioquía ve yuvireco.

22 Ahe supi omonguerēhi catu opacatu Jesús reroyasar yuvireco, aipo ehi imombehu: “Yepe ava yande mombaraisura yuvireco viña, yaroyaño itera rumo Jesucristo. Sese peseya eme ité seroyasa. Yandeu aviye catu ité mbahe-mbahe tēi pipe yande recose Tūpa mborerecuasave yande reique ãgua” ehi yuvireco Jesús reroyasar upe.

23 Ipare oiporavo ava Jesús reroyasar rãro ãgua ñepeipei ñemonuhasa rupi. Oyeroqui iyavei oye-

cuacu. Ipare vıropovêhe yande Yar upe iporavıqui ãgua yuvıreco.

*Pablo, Bernabé oyevi yuvıreco Antioquía ve Siria ivı rese*

<sup>24</sup> Ipare yuvıraso Pisidia rupi, oyepota Panfilia ivı rese.

<sup>25</sup> Omombehu Tūpa Ñehengagüer yuvıreco Perge ve. Ipare yuvıraso Atalia ve.

<sup>26</sup> Ahe ichui yuvıraso carite pıpe Antioquía ve, ahe tecua pıpe yıpındar imondoprı Tūpa upe sovasaprı yuvırecoi mboravıqui apo ãgua. Aheve tuprı avei imboaviye pare oyevi yuvıreco.

<sup>27</sup> Oyepotase Antioquía ve yugüeru, omonuha opacatu Jesús reroyasar yuvıreco. Aheve omombehu opacatu Tūpa mbahe oyapo vahe oyese yuvıreco iyavei aipo ehi: “Yande Yar ombou avei ava ndahei vahe judío upe Guahır reroya ãgua yuvıreco” ehi yuvıreco omboetasa upe.

<sup>28</sup> Aheve Pablo, Bernabé opıta pucu yuvıreco ipıri.

## 15

*Jesús reroyasar oñemonuha Jerusalén ve yuvıreco*

<sup>1</sup> Evocoiyase movıro mbıa Jesús reroyasar judío yugüeru Judea sui Antioquía ve. Ahe ombohe Jesús reroyasar yuvıreco aipo ehi: “Aracahe Tūpa oyocuai Moisés yande ramoı cuai ãgua: ‘Pembo-circuncida opacatu pe mu cuimbahe cheu nara’ ehi Tūpa aracahe” ehi yuvıreco. “Cūrıteı acoı êgüe ndapeyese Jesús reroyasar upe, noñepısiroi chıetera yuvıreco” ehi Antioquía pendar upe yuvıreco.



2 Pablo, Bernabé reseve rumo oñehe pĩrata yuvireco chupe. Nomoingatu catuise rumo mbahe yuvireco, ahese Jesús reroyasar omondo Pablo, Bernabé iyavei ambuae omboetasa Jerusalén ve apóstol upe iyavei Jesús reroyasar rãrosar upe aipo mbahe moingatu ãgua yuvireco.

3 Ëgüe ehi Jesús reroyasar Antioquía pendar yocuai imondo yuvireco. Oñocuase Fenicia, Samaria avei yuviraso, oguatasa rupi omombehu-mbehu Jesús reroyasar upe ndahei vahe judío recocuer yuvireco aipo ehi: “Setá ava ndahei vahe judío opa oseyá aracadendar aracuasa Tũpa rupi oguata ãgua yuvireco” ehi. Ahese opacatu Jesús reroyasar oyembovĩharete yuvireco senduse.

4 Yuviroyepotase Jerusalén ve, apóstol, Jesús reroyasar rãrosar iyavei ambuae Jesús reroyasareta oipisi tupri yuvireco. Aheve omombehu Tũpa mbahe oyapo vahe oyese yuvireco.

5 Osenduse rumo, moviro Jesús reroyasar fariseo opũha voi aipo ehi yuvireco chupe:

—Aní —ehi—. Pembocircuncida rane ité catu opacatu Jesús reroyasar ndahei vahe judío —ehi yuvireco—. Peyocuai avei opacatu ambuae Moisés porocuita mboaviye ãgua yuvireco —ehiño ité yuvireco.

6 Ahese apóstol, Jesús reroyasar rãrosar avei oñemonuha oyemomborandu ãgua aipo mbahe rese yuvireco.

7 Yemomborandu viteseve, Pedro opũha ipãhuve aipo ehi:

—Che mu, peicua niha aracaco Tũpa che poravo pe pãhu sui co ñehesa poropĩsirosa resendar

mombehu ãgua ava ndahei vahe judío upe ‘toviroya yuvireco’ oyapave.

<sup>8</sup> Tũpa oicua ité opacatu ava pĩhañemoñetasa. Chupe avei omondo Espíritu Santo inungar yandeu. Ipipe sui yaicua Tũpa oipisi avei ahe ava oyeupe nara —ehi—.

<sup>9</sup> Evocoyase, “Judío aviye catu vahe ava ndahei vahe judío sui” ndehi Tũpa. Esepia, opacatu oyoya pãve Tũpa upe yaico. Sese omoatiro ipĩhañemoñeta rai sui oyese yeroyasa pipe.

<sup>10</sup> ¡Pe tie pesecoãha pota Tũpa! ¡Mahera peyocuai uca pota co Jesús reroyasar mbahe yavai rai vahe apo ãgua! Aní rumo. Esepia, yande ramoi ndoicatui Tũpa porocuita mboaviye ãgua yuvireco, yande avei ãgüe yahe —ehi—.

<sup>11</sup> Co rumo, yaroyase yande Yar Jesucristo, yande pĩsirora oporoaisusa pipe, inungar co ava ndahei vahe judío yuvirecoi —ehi Pedro.

<sup>12</sup> Evocoyase opacatu oyemonguiriri yuvireco, osendu Bernabé, Pablo ñehesa, mbahe sembiapo avei yuvireco. Evocoyase omombehu ndayasepiai vahe poromondĩisa Tũpa oyapo uca ava ndahei vahe judío pãhuve yuvireco chupe.

<sup>13</sup> Osendupase ñehhe yuvireco, ahese Santiago aipo ehi:

—Che mu, Jesús reroyasar, peyapisacami che ñehhe rese:

<sup>14</sup> Simón omombehu yandeu Tũpa osaisu avei ava ndahei vahe judío. Sese oiporavo ahe ava oyeupe nara —ehi—.

<sup>15</sup> Oyoya tupri Tũpa ñehhe mombehusar rembicuachiagüer rese. Ñepi ipãhu pendar oicuachía

aracahe aipo ehi:

16 ‘Coiye catu ayevíra vitu. Ahese ayapo piásu irira che rēta David oyapo uca vahecuer, ahe oi imocañipirer. Ambopiásu irira oitipa vahecuer yuvireco.

17 Ëgüe ahera yapo opacatu ambuae ava, toseca oYar yuvireco, che yapave opacatu ava ndahei vahe israelita cheu nara ipehapri reseve.

18 Evocoi yande Yar rembiaporã icuapri aracahe suive’ ehi Tūpa ñehe mombehusar aracahe.

19 “Sese chepihañemoñeta iya ndayayocuai chira Moisés porocuita rupi oñecuñaro vaherã ndahei vahe judío Tūpa rupi uguata ãgua yuvireco” ehi.

20 “Aviye rumo yaicuachiase chupe co mbahe resendar güeraño: Pehui rene mbahe mimba yucapri mbahe rahanga tēi upe seropovēhepri iyavei ndapeaguasai chira, pehui rene mbahe mimba yucapri suvi renosepirēhi, mbahe ruvi avei” ehi.

21 “Esepia, opacatu tecua rupi yuvirecoi ava omombehu vahe Moisés porocuita ñepeipei mbituhusa ari pipe judío tūparo pipe aracahe suive. Aipo rupive” ehi Santiago.

### *Icuachiapri ndahei vahe judío upe nara*

22 Ahese apóstol, Jesús reroyasar rãrosar, ambuae Jesús reroyasar avei omondo pota opãhu pendar Pablo, Bernabé rupi Antioquía ve yuvireco. Oiporavo yuvireco ñuvirío mbia, ahe Judas Barsabás iyavei Silas. Ahe imboyeroyapri omboetasa pãhuve yuvireco.

23 Ahe supi aipo ehi icuachía imondo yuvireco:

“Ore apóstol, Jesús reroyasar rãrosar, pe mboetasa oroico vahe. Pe mboaviravesa, ndapemarai revo pe ndahei vahe judío Antioquía pendar, Siria pendar, Cilicia pendar avei.

<sup>24</sup> Oroyandu amove ava ore pãhu pendar pe mañeco tõi aipo oporombohesa pipe yuvireco. Ahe ava ndahei ore ocuaita pipe yuviraso põi pe pihañemoñeta rerova.

<sup>25</sup> Sese oyoya orepihañemoñeta oroiporavo ñuvirío mbia ore rembiaisu ore rivri Bernabé, Pablo rupi imondo eipeve põi.

<sup>26</sup> Ahe acoi oyemondo vahe mbahe-mbahe tõi povrive yande Yar Jesucristo recocuer rese yuvireco.

<sup>27</sup> Oromondo Judas, Silas avei põi: ahe tei-eté omombehura opacatu cuachiar pipendar põi yuvireco.

<sup>28</sup> Aviye Espiritu Santo upe, oreu avei co porocuita güeraño oromondo vahe rese põi. Ndape cuaisa pota iri rumo ambuae mborocuita rese.

<sup>29</sup> Pehui rene mbahe mimba yucapri seropovẽhepri mbahe rahanga tõi upendar, ndapehui chiaveira mbahe ruvi, mbahe mimba yucapri suvi renosepirẽhi vahe iyavei ndapeguasai chira. Pepoise evocoi mbahe naporai vahe sui, oimera mbahe tupri põi. Aipo rupive. Peico tupri” ehi.

<sup>30</sup> “Aviye” ohe pare, yuviraso, oyepota Antioquía ve. Aheve opase omonuha Jesús reroyasar yuvirecoi vahe omondo cuachiar yuvireco chupe.

<sup>31</sup> Ahe cuachiar rese oyerouise, oyemboviharete yuvireco.

<sup>32</sup> Judas, Silas Tūpa suindar ñehesa mombehugar avei yuvirecoi. Sese omboviharete catu iyavei omonguerēhi catu avei ahe ava yuvireco oñehe pipe.

<sup>33</sup> Opitase moviro ari aheve, Jesús reroyasar Antioquía pendar aipo ehi: “Aviye. Peyevi tupri pe mbousar upe” ehi yuvireco chupe.

<sup>34</sup> Silas rumo opita potaño ité aheve.

<sup>35</sup> Pablo, Bernabé avei opita viteño ité aheve yuvireco, ahe setá ambuae Jesús reroyasar reseve imbohe vite ãgua yande Yar resendar ñehesa rese yuvireco.

*Imoñuviriosa Pablo guata agüer Jesús recocuer mombehu ãgua*

<sup>36</sup> Coiye Pablo aipo ehi Bernabé upe:

—Yaso, yasepia iri Jesús reroyasar opacatu yande Yar ñehengagüer yamombehu vahecuer rupi, ¿mara ehi pīha ahe yuvireco? —ehi.

<sup>37</sup> Ahese Bernabé viraso pota Juan Marcos oyeupi viña.

<sup>38</sup> Nomboyoyai rumo Pablo ipihañemoñeta rese. Esepia, cuese Juan Marcos oseyaño oyepotase yuvireco Panfilia ve. “Taipitiviño iporaviquisa rese” ndehi chupe.

<sup>39</sup> Nomoingatuisse mbahe oyeupe yuvireco, oyepepiño yuvireco oyesui. Ahese Bernabé viraso Marcos oyeupi carite pipe Chipre ve.

<sup>40</sup> Pablo rumo oiporavo Silas oyeupi icho ãgua. Yuvinose ãgua Antioquía sui, Jesús reroyasar ahe pendar aipo ehi yuvireco chupe: “Tape rovasa Tūpa oporoaisusa pipe” ehi yuvireco imondo.

<sup>41</sup> Ipare yuvıraso Siria, Cilicia rupi Jesús reroyasar monguerẽhi catu ãgua yuvıreco.

## 16

### *Timoteo oso Silas ndugüerã Pablo rupi*

<sup>1</sup> Pablo ondugüer reseve yuvıraso Derbe ve, Listra ve avei. Aheve osepia Jesús reroyasar, Timoteo serer vahe, judía, Jesús reroyasar membri. Iyesupa rumo griego.

<sup>2</sup> “Evocoi Timoteo avıye etepri” ehi Jesús reroyasar Listra pendar, Iconio pendar avei yuvıreco chupe.

<sup>3</sup> Pablo vıroguata potaño ité Timoteo oyeupi. Sese seroguata renondeve, ombocircuncida uca seroıroẽhi ãgua judío yuvırecoi vahe upe. Esepia, opacatu oicua Timoteo ru griego secose yuvıreco.

<sup>4</sup> Evocoiyase opacatu tecua iguatagüer rupi omombehu ahe mborocuaite apóstol, Jesús reroyasar rãrosar Jerusalén pendar ombou vahe yuvıreco chupe.

<sup>5</sup> Sese Jesús reroyasar ahe tecua rupindar oye-movıracua catu yuvıreco Jesús reroyasa pipe iyavei oyemboeta catu yuvıreco arı rupi.

### *Tũpa omondo uca Pablo Macedonia ve iquer nungar pipe*

<sup>6</sup> Espıritu Santo ndoipotai Asia rupi yuvıraso vaherã Tũpa Ñhengagüer mombehu ãgua. Sese oyahuva yuvıraso Frigia rupi, Galacia rupi avei.

<sup>7</sup> Ëgüe ehi oyepota Misia popıve yuvıreco. Ichui yuvıraso pota tẽi Bitinia ve. Jesús Espıritu rumo ndoipotai icho ãgua supı.

8 Ahese osasaviño yuviraso Misia sui carite guasu yemboyasa Troas ve oyepota ãgua yuvireco.

9 Oyepotase aheve, ahe pĩtu pipe Pablo oquer nungar pipe osepia mbia, Macedonia pendar, “Ereyumira Macedonia ve ore pĩtivĩ ãgua viña” ehi ohã chupe.

10 Ipare ore oroyemoingatu voi eté Macedonia ve ore so ãgua. Esepia, ore oroicua ité Tũpa aheve ore mondora ñehesa pĩsirosa resendar mombehu ãgua.

### *Pablo, Silas Filipino ve yuvirecoi*

11 Oroso carite pipe Troas sui oromohiviño voi oroso evocoi ivi para guasu Samotracia ve. Ahere ayihive oroyepota Neápolis ve.

12 Ichui oroso ivi rupi Filipos ve, ahe tecua seroy-apri catu vahe ambuae tecua sui, ahe ivi Macedonia rupindar. Aheve Roma iguar oyeyecuai, oyocuai avei opacatu tecua ivirindar ava yuvireco. Aheve moviro ari tẽi oroico.

13 Mbituhusa ari pipe orosẽ evocoi tecua sui iai popive. “Aheve oñemonuhara judío oyeroqui ãgua” orohe. Aheseve cuña oñemonuha yugüeru. Aheve oroyepota chupe, oroguapi ipãhuve. Ipare oromombehu co ñehesa pĩsirosa resendar yuvireco chupe.

14 Ñepeĩ imboetasa, Lidia serer vahe, Tiatira pendar, oyapisaca ore ñehe rese oĩ. Ahe Tũpa mboeteisar secoi, turucuar suendi vahe mbovendesar avei secoi. Yande Yar omohivi ipihañemoñetasa iyapisaca ãgua Pablo remimombehu rese.

15 Sese ñapiramosa, opacatu sêta pendar reseve. Ipare ore mombîta pota güêtave.

—Che reroyase peye yande Yar reroyasar che recose, pepîtara che rêtave —ehi oreu.

Ëgüe ehi ore monguerêhi. Sese oropîta sêtave ipîri.

16 Ipare ambuae arî oroso irise oroyeroqui ãgua, cuñatai ore rovaïchi, ahe cuñatai caruguar pîratasa pîpe mbahe mombehuse. Oicatu ava upe mbahe oime vaherã mombehu. Omombehuse mbahe, setá oipîsi seprî guarepochi güerecuar yuvîrecoi vahe upe nara yepî.

17 Ahe cuñatai ou ore raquîcui,

—¡Co ava Tûpa ivate catu vahe upendar oporavîqui yuvîreco omombehu: “Na ehira Tûpa yande pîsîro” ehi yuvîreco! —ehi pucu-pucu ore mombehu ava upe.

18 Setá arî ëgüe ehi oico oreu. Omañeco têise rumo Pablo, oyemboyere chupe cute, aipo ehi icaruguar upe:

—Che orocuai Jesucristo rer pîpe: esê co cuñatai sui —ehi.

Aheseve voi caruguar osê ichui.

19 Evocoyase cuñatai rerecuar oyanduse, “Ndoipîsi uca iri chira guarepochi yandeu” ehi yuvîreco. Imboasîpave oipîsi Pablo, Silas mborerecuar upe ocarusuve seraso yuvîreco.

20 Ipare mborerecuar yuvîrecoi vahe upe aipo ehi yuvîreco:

—Co ñuvîrío mbia orogüeru vahe peu, judío têi yuvîrecoi. Ayeve omboavû guasu têi yuvîreco yande recua pîpe.



21 Oporombohe güecocuer rese yuvireco. Secocuer rumo naporai oreu. Ore Roma iguar oroico, sese ndoroicatui secocuer moña ãgua —ehi yuvireco mborerecuar upe.

22 Evocoiyase ava eta oyamotarẽhi Pablo iyavei Silas yuvireco iyavei mborerecuar, “Pesequi iturucuar ichui. Ipare peinupara ivira pipe” ehi.

23 Inupá iteanga pare, osoquenda yuvireco. Oyocuai pĩrata soquendapri rãrosar yuvireco, “Esãro tupri” ehi yuvireco chupe.

24 Aipo oyeupe he ramoseve, soquendapri rãrosar omoingue Pablo, Silas oi ava nose catui vahesa pipe. Aheve omopaha cepo pipe.

25 Ahe pĩtu mbiter rupi rumo Pablo, Silas oyoeroqui, osapucaí Tũpa mboeteisave yuvireco. Ambuae ava soquendapri evocoiyase osenduño tẽi yuvireco isapucaí.

26 Ahese aviyeteramo tẽi ivi orirĩi eteanga. Opa omomara ava roquendasa moviracuasa, opacatu oquenda oyemboi iyavei opacatu carena oyera soquendapri sui.

27 Ahese soquendapri rãrosar omahe yesapiha. Osepiase oquenda imboipri, ahese vinose oquise pucu siru sui oyeyuca ãgua viña. Esepia niha, “Opacatu ité revo soquendapri yuviraso” ehi viña.

28 Pablo rumo,

—¡Ereyapoi rene mbahe tẽi ndeyeupe! ¡Esepia, opacatu oroicoveño cohavel —ehi pucu soquendapri rãrosar upe.

29 Evocoiyase soquendapri rãrosar, “Emboumi tataendi” ehi ondugũer upe. Ichui oña oi que, orirĩi, osiquiyepave oñenopiha Pablo, Silas rovai oso.

<sup>30</sup> Vinose pare soquendasa sui oporandu chupe:  
—Mbia, ¿mara ahera vo che ñepisiro água vichico?  
—ehi chupe.

<sup>31</sup> —Eroya yande Yar Jesucristo. Ichui ahe nde p̄sirora, nde rēta pendar avei —ehi yuvireco chupe.

<sup>32</sup> Ahese omombehu yuvireco Tūpa Ñhengagüer soquendapri rārosar upe, opacatu sēta pendar upe avei.

<sup>33</sup> Ahe p̄itu pipeve avei soquendapri rārosar viraso oyeupi, yapichasa oyoseipa chupe. Ahese Pablo, Silas oñapiramo guārosarer, sēta pendar avei yuvireco.

<sup>34</sup> Viraso pare sārosar güētave, ombocarú. Ahe sēta pendar avei oviharete ité yuvireco Tūpa reroyasa rese.

<sup>35</sup> Cōhese mborerecuareta omondo sundao ava rese icuaipri soquendasave yuvireco. Oyepotase yuvireco, aipo ehi: “Emosepa evocoi mbia judío” ehi.

<sup>36</sup> Ahese soquendapri rārosar omombehu co ñehesa Pablo upe:

—Mborerecuar ombou yuvireco ñehesa cheu pe mose água. Peso tupriño peico —ehi chupe.

<sup>37</sup> Omboyevi rumo chupe,

—Ore niha romano oroico viña, ore nupasa rumo opacatu ava rovaque. Ndoporandu rane angai eté rumo mbahe rese oreu. Ore roquendapa voiño tēi yuvireco. Ipare aipo ava rembiepiaēhive tēi ore mosepa uca pota viña. ¡Aní eté rumo! Ahe teieté ru toyugüeru ore mose água —ehi soquendapri rārosar upe.

<sup>38</sup> Ipare sundao ava rese icuaipri omombehu güerecuareta upe Pablo ñehe. Oyanduse Pablo, Silas romano secose, osiquiyé iteanga yuvireco.

<sup>39</sup> Ahese ahe teieté yuviraso Pablo, Silas oyeupe ñero ãgua rese yuvireco: “Peso tupriño ore recua sui” ehi yuvireco chupe.

<sup>40</sup> Pablo, Silas yuvinosese voquendasa sui, yuviraso iri Lidia rētave. Oñemonuha irise ambuae Jesús reroyasar pãhuve, omonguerēhi catu yuvireco. Ipare yuviraso ichui.

## 17

### *Ava yaivu guasu tēi Tesalónica ve yuvireco*

<sup>1</sup> Oguatase Pablo iyavei Silas, oñocua Anfípolis iyavei Apolonia rupi yuviraso. Ëgüe ehi oyepota tecua Tesalónica ve yuvireco. Aheve oime judío tũparo.

<sup>2</sup> Secocuer rupi eté mbituhusa ari pipe Pablo oique judío tũparove, oñemoñeta ava eta upe mbosapi mbituhusa ari rupi Tũpa Ñhengagüer rese.

<sup>3</sup> Omboyecua tupri imombehu Tũpa Rembiporavo ava pĩsĩro ãgua iparaisu rane itera, omanora, ipare rumo ocuerayevi iriño itera. Ipare aipo ehi:

—Jesús, acoi amombehu vahe pẽu, ahe ité niha Tũpa Rembiporavo ava pĩsĩro ãgua —ehi.

<sup>4</sup> Amove ipãhu pendar seroyasa pipe oyemboya sese yuvireco. Setá avei ava griego yuvirecoi vahe, Tũpa mboeteisar judío aracuasa reroyasar avei. Ipãhuve setá avei cuña oyemboetei vahe oyemboya sese yuvireco.

<sup>5</sup> Judío rumo ndoviroyai vahe oñemoïrombave secatêhi ava rese yuvireco. Sese omonuha ava yuvireco têi vahe, ndipihai vahe yuvireco. Imonuha pare, ahe omboaivu guasu uca têi ahe ava upe opacatu güecua pipe yuvireco. Yuviraso Jasón rêtave Pablo, Silas reca, vïnose pota ava rehi pãhuve yuvireco viña.

<sup>6</sup> Ndoyosuisse rumo aheve yuvireco, virasoño Jasón, ambuae Jesús reroyasar avei güecua rerecuar rovai yuvireco. Viroãse guasu sereco yuvireco,

—¡Evocoi mbia Pablo iyavei Silas virova vahe ava recocuer opacatu tecua rupi yuvireco, cūrtei oyepotapa yuvireco cohave!

<sup>7</sup> Co Jasón omombituhu güêtave. ¡Opacatu co yuvirecoi vahe ndoviroyai Cesar porocuaita yuvireco iyavei omombehu yuvireco: “Oime ambuae mborerecuar guasu, ahe Jesús” ehi niha aipo yuvireco! —ehi yuvireco mborerecuar upe.

<sup>8</sup> Aipo ñehesa renduse, oyepihamondii guasu ava eta, mborerecuar avei tecua pipendar yuvireco.

<sup>9</sup> Mborerecuar rumo oipisipase guarepochi Jasón sui, ambuae Jesús reroyasar sui avei, ahese opa omose.

*Pablo, Silas omombehu Tũpa Ñehengagüer Berea ve yuvireco*

<sup>10</sup> Ahe pĩtu pipeve voi ava Jesús reroyasar omondo Pablo, Silas tecua Berea ve yuvireco. Oye-potase aheve, yuviroique judío tũparo pipe.

<sup>11</sup> Berea pendar ava aviye catu ava Tesalónica pendar sui. Êgüe ehi ipisi ohãpisiẽhisa pipe ñehesa yuvireco iyavei ari yacatu rupi oseca Tũpa

Ñehengagüer pipe ‘¿supi eté pñha Pablo ñehesa?’ oyapave yuvireco.

<sup>12</sup> Evocoiyase setá avei Pablo ñehhe reroyasar iyavei setá griego viroya yuvireco, ndahei cuimbahe güeraño, cuña oyemboetei vahe avei.

<sup>13</sup> Judío Tesalónica pendar rumo oyandu yuvireco Pablo porombohesa Tūpa Ñehengagüer rese Berea ve. Sese yuviraso aheve imboaiyu guasu tēi uca āgua ava upe yuvireco.

<sup>14</sup> Evocoiyase Jesús reroyasar Berea pendar Pablo viroguata poyava voi tecua sui para guasu coti yuvireco. Silas iyavei Timoteo rumo opita viteño aheve yuvireco.

<sup>15</sup> Evocoiyase Pablo rupi yuviraso vahe viroyepota Atenas ve seraso. Ahe ichui viroyevi Pablo ñehhe Silas upe iyavei Timoteo upe avei yuvireco yuviraso voi āgua Pablo piri ahe tecuave yuvireco.

### *Pablo Atenas ve secoi*

<sup>16</sup> Pablo osãro viteseve Silas iyavei Timoteo Atenas ve oico, ndoyembovīhai osepiase opacatu rupi tūpa rahanga-anga tēi.

<sup>17</sup> Sese judío tūparo pipe omombehu Jesús recocuer judío eta upe iyavei ambuae Tūpa mboeteisar upe avei. Iyavei ari yacatu omoñeta ava osepia vahe ocarusu rupi ava ñemonuhasave ahe tecua pipe.

<sup>18</sup> Evocoiyase amove mbīa oyembohe vahe epicúreo aracuasa rese iyavei mbīa oyembohe vahe estoico aracuasa rese oñemoñeta Pablo rese yuvireco. Amove aipo ehi Pablo upe yuvireco seroĩrosave:

—¿Mbahe rese angahu pñha co mbia ñehe papa rai ava upe oico? —ehi.

Ambuae aipo ehi yuvireco:

—Ndoyavii co mbia ñehe vahe ambuae ava Tũpa rese tẽi —ehi yuvireco.

Esepia, omombehu Jesús recocuer iyavei cuer-ayevisa resendar.

<sup>19</sup> Evocoyase ahe oyembohe vahe viroyeupi Pablo Areópago serer vahesave seraso yuvireco. Aheve ava ñemonuhasave aipo ehi yuvireco chupe:

—¿Ndiyai vo eresenducua uca tupri catumira co porombohesa piasu resendar oreu viña?

<sup>20</sup> Supi eté niha erembobehu mbahe ndorosendu vitei vahe, ore oroicua tupri pota, ¿mara oyapave ité vo aipo ehi? —ehi yuvireco Pablo upe.

<sup>21</sup> Atenas pendar iyavei yugüeru vahe Atenas ve, oyembohe pota serai vahe yuvireco. Ahe ñemoñetaño, omombehuño mbahe oyeupe yuvireco yepi iyavei osendu pota rai ñehesa ipiasu vahe. Aheño ité ipihañemoñetasa yuvireco.

<sup>22-23</sup> Evocoyase Pablo opũha ahe ava pãhuve aipo ehi:

“Pesendu rane Atenas iguar. Aguatase ocar rupi asepia pe tũpa eta pemboetei vahe. Ahese asepia ñepe i tũpa upe seropovẽhepri renda. Sese asepia icuachiapri aipo ehi oĩ: ‘Tũpa ndicuasai vahe upendar’ ehi. Evocoi Tũpa ndapeicua vitei vahe, ahe secocuer niha amombehu pẽu” ehi.

<sup>24</sup> “Evocoi Tũpa oyapo vahe co ivi, opacatu mbahe ipor avei. Ahe niha ivi, iva Yar secoi. Sese ndasecoi tũparo ava tẽi rembiapo pipe.

25 Ndahei ava rembiapo pīpe sui tēi oicove. Esepia, ndipoi mbahe ipane vahe chupe. Ahe ité niha opacatu upe ombou tecovesa, pĩtuhesa iyavei opacatu mbahe oime vahe ivi, ivave” ehi.

26 “Tũpa oyapo opacatu-catu tēi ava ñepei ava sui ava yesu ãgua opacatu ivi rupi. Omondo ivi ava yemboerecua ãgua ñepei-pei upe. Ari avei omondo co ivi pīpe iyemboerecua ãgua yuvireco chupe.

27 Ēgüe ehi ava upe ‘tache reca yuvireco’ oya, ‘ipīpe sui aviyeteramo che reroyara yuvireco’ oyapave. Ēgüe ehi rumo Tũpa yande resevemi eté.

28 Esepia niha, Tũpa sui yaicove, ipĩratasa pīpe yayembovava, ichui avei yareco yande recovesa, inungar oicuachía amove pe recua pendar yuvireco, aipo ehi: ‘Yaico ité Tũpa suindar’ ehi yuvireco.

29 Sese yande Tũpa suindar yaicose, ‘Co mbahe rahanga oro apopri iyavei guarepochi, ita apopri, ahe revo Tũpa’ ndayahei chira. Esepia, mbahe rahanga ava rembiapo tēi, ndahei Tũpa” ehi.

30 “Pe ramoi ndoicua tupriise yuvireco arac-ahe, Tũpa oñemosañño mbahe sembiapo rese chupe. Cũritei rumo oyocuai opacatu ava co ivi pipendar ‘tomboasi oangaipa, toyevi yuvireco cheu’ oya.

31 Esepia, ahe oiporavo ari opacatu ava recocuer rese porandu uca ãgua güecocuer ĩvi tupriisa pīpe ñepei güembiporavo upe. Ahe ombogüerayevi güembiporavo omano vahe pãhu sui ‘toicua opacatu ava güecocuer rese iporandu ãgua’ oya” ehi Atenas pendar upe.

32 Osenduse yuvireco cuerayevisa resendar, ahese oime ava oyoyai catu yuvireco seroĩrosave.

Ambuae rumo aipo ehi yuvireco:

—Torosendu irimi aipo ñehesa curi —ehi yuvireco.

<sup>33</sup> Sese Pablo osẽ ipãhu sui oso.

<sup>34</sup> Moviro rumo mbia oyemboya sese, viroya ité vahe ñehesa yuvireco. Ahe ipãhuve secoi mbia Dionisio serer vahe, ahe Areópago pãhu pendar iyavei cuña Dámaris serer vahe. Ambuae oime vite yuvireco seroyasar.

## 18

### *Pablo Corinto ve secoi*

<sup>1</sup> Coiye catu Pablo osẽ Atenas sui, oso Corinto ve.

<sup>2</sup> Aheve oyoepia mbia judío, Aquila serer vahe rese yuvireco. Ahe mbia aipo Ponto ve oha vahecuer. Yugüeru ramo rumo Italia sui güembireco Priscila reseve. Yuvinose ñepi tecua Italia rupindar Roma sui oyocuaise mborerecuar guasu Claudio: “Toyuvinose ité opacatu judío Roma sui” ehise. Pablo oso,

<sup>3</sup> opita Aquila piri oporaviqui água. Esepia, Pablo, Aquila avei ahe mbahe pিরer mbovivisar pãve yuvirecoi.

<sup>4</sup> Mbituhusa ari yacatu rupi Pablo omombehu Jesucristo recocuer ava upe judío tũparo pipe ‘toviroya Jesús judío iyavei ndahei vahe judío yuvireco’ oyapave.

<sup>5</sup> Oyepotare rumo Silas, Timoteo Macedonia sui yuvireco, ahese Pablo oyemondo ité Jesús recocuer mombehu água rese güeraño judío eta upe aipo ehi: “Jesús niha Tũpa Rembiporavo ava pĩsiro água secoi” ehi.



<sup>6</sup> Iñehe-ñehe tēi rumo seroĩrosave yuvĩreco chupe. Sese Pablo oipĩpete oturucuar sovaque ‘oimera mbahe tēi pēu’ oya, iyavei aipo ehi chupe yuvĩreco:

—Pe ae niha peseca Tũpa ñemoĩrosa peyeupe pe recocuera sui. Ndahei rumo che resera mbahe. Esepia, che amboaviye tupri che cuaita pēu. Che rumo, co pĩpe suive, amombehu catuño itera co ñehesa ava ndahei vahe judío upe vichico —ehi Pablo judío upe.

<sup>7</sup> Evocoyase Pablo osē judío tũparo sui, oique mbia Ticio Justo serer vahe rētave, ahe Tũpa mboeteisar avei secoi. Ahe sēta judío tũparo iqueve.

<sup>8</sup> Crispo, ahe judío tũparo rerecuar viroya avei yande Yar, opacatu sēta pendar avei viroya yuvĩreco. Setá ambuae Corinto pendar avei viroya osenduse ñehesa yuvĩreco. Seroya pare, oñeapiramopa uca yuvĩreco.

<sup>9</sup> Ñepei pĩtu pĩpe yande Yar oñehe Pablo upe iquer nungarve: “Eresiquiyei rene, ereñehe ava upe, che mombehuño eve, erepoi rene che mombehusa sui.

<sup>10</sup> Esepia, che nde reseve aico. Sese ndiyai ava upe nde momara uca ãgua. Supi eté che areco setá che rahirã co tecua pĩpe” ehi yande Yar chupe.

<sup>11</sup> Evocoyase opĩta ñepei araviter yemombitesa rupi Corinto ve oico. Aheve ombohe Tũpa Ñehengagüer rese ahe pendar ava.

<sup>12</sup> Galión mborerecuar secose opacatu Acaya rupi, judío oñemonuha Pablo amotarēhisave. Ichui viraso ahe mborerecuar upe porandusa ivate catusave yuvĩreco,

13 aipo ehi yuvireco chupe:

—Co mbia oipihañemoñeta rerova tēi ava oTūpa mboetei āgua. Ndaheĩ rumo Roma pendar porocuita rupi ēgüe ehi yuvireco —ehi yuvireco seroĩrosave chupe.

14 Oñehe pota tēi viña, Galión rane rumo oñehe judío upe:

—Peyapisaca mbia judío. Pemombehuse cheu ava rembiapo naporai vahe, ahese ayemonguerēhira che yapisaca āgua pe remimobehu rese viña.

15 Pe rumo peporandu cheu mbahe pe yembohesa resendar, pe Tūpa rer resendar iyavei pe Tūpa porocuita resendar rese tēi. Pemoingatu pe ae pe recocuer; ndaipotai aipo nungar mbahe moingatu āgua —ehi Galión ahe ava upe.

16 Ipare opa omboyepẽ porandusa sui.

17 Ahese opacatu griego oipisi judío tūparo rerecuar Sóstenes yuvireco. Ipare yuvirocua-rocua Galión rovai ahe peve yuvireco sese. Galión rumo, “Mara etemo che areco viña” ehiño chupe.

### *Pablo yevi irisa Antioquía ve*

18 Pablo secoi pucu vite pare Corinto ve, “Asora vichico cute” ehi Jesús reroyasar upe. Ipare yuviraso Aquila, Priscila reseve. Oyepotase Cencrea ve yuvireco para guasu popive, aheve Pablo oñeapipa tupri oñehe mboavive āgua. Ipare yuviraso carite pipe Siria ve.

19 Siria piar rupi yuviraso Efeso ve. Aheve opita Aquila, Priscila yuvireco. Ichui Pablo oique judío tūparo pipe Jesús resendar ñehesa mombehu āgua chupe yuvireco.

20 Ahe pendar omombita pota vite tēi yuvireco viña, Pablo rumo ndopita potai aheve.

21 Evocoyase, “Aviye, taso rane” ehiño chupe yuvireco. “Tūpa oipotase cheu, ayevi irira vitu pe piri” ehi.

Ipare oso Efeso sui carite pipe.

22 Oyepotase Cesarea ve, oso Jerusalén ve “avirave” apo āgua Jesús reroyasar upe. Ipare oso Antioquia ve.

23 Opita pucu pare aheve, osē, oguata iri Galacia rupi, Frigia rupi opacatu Jesús reroyasar monguerēhi catu āgua.

### *Apolos omombehu Jesús recocuer Efeso ve*

24 Aheseve avei judío Apolos serer vahe oso Efeso ve, ahe Apolos, Alejandría iguar. Oñehe tupri ai vahe, oicua tupri avei Tūpa Ñehengagüer.

25 Ahe oyembohe vahe avei yande Yar recocuer rese. Omombehu oquerēhisa pipe secocuer ava upe, oporombohe tupri ai avei sese. Ahe rumo oicua Juan oāpiramo agüer güeraño tēi.

26 Ahe osiquiyeēhisave judío tūparo pipe omombehu Tūpa Ñehengagüer. Osenduse Aquila, Priscila iñehesa, omombita yuvireco oyepiri. Ahese omombehu tupri catu Tūpa recocuer chupe yuvireco.

27 Oso potase Apolos Acaya coti, ahese Jesús reroyasar Efeso pendar omonguerēhi catu. Oyapo cuachiar Acaya pendar upe imondo yuvireco sese hañeco tupri āgua. Ipare oyepota oso Acaya ve. Aheve oime ava Tūpa guaisusa pipe sui viroya vahe Jesús yuvireco. Ahe ava Apolos oipitivi seroya tupri catu āgua yuvireco.

28 Omboyecua opacatu rovaque judío pihañemoñetasa co coti tēi vahe. Ahese opa osecopi oñehe pipe ahe ava. Esepia, Tūpa Ñehengagüer pipe omboyecua ité: “Jesús Tūpa Rembiporavo ava pĩsiro ãgua secoi” ehi eté judío eta upe.

## 19

### *Pablo omombehu Jesús recocer Efeso ve*

<sup>1</sup> Evocoyase Apolos Corinto ve ipitaseve, ahe tecua Acaya rupindar, Pablo oñocua ivivaté vahe oyepota Efeso ve oso. Aheve osepia setá Jesús reroyasar.

<sup>2</sup> Evocoyase oporandu ahe ava upe:

—¿Peipisi vo Espíritu Santo pe piha pipe peroyase Jesús? —ehi chupe.

—Ore ndorosendui eté aipo Espíritu Santo re-sendar ñehesa —ehiño yuvireco chupe.

<sup>3</sup> Ichui oporandu iri chupe:

—Evocoyase, ¿mbahe nungar vo ãpiramosa peipisi? —ehi.

—Juan poroãpiramosa oroipisi —ehi ahe ava yuvireco chupe.

<sup>4</sup> Evocoyase aipo ehi ahe ava upe:

—Juan niha oñapiramo acoi omboasi vahe oan-gaipa oyevisé Tūpa upe. Ipare rumo omombehu ava upe: “Peroya ahe eté vahe ou vaherã che raquicuei” ehi. Ahe ou vaherã, “Jesús upe” aipo ehi —ehi Pablo chupe.

<sup>5</sup> Osenduse Pablo ñehe, opacatu oñeapiramo uca Jesucristo rer pipe yuvireco.

<sup>6</sup> Omondose Pablo opo iharive yuvireco, ahese ogüeyi Espíritu Santo, oi que ipiha pipe yuvireco.

Ipare aviyeteramo tēi oñehe ambuae ñehesa pīpe iyavei omombehu Tūpa suindar ñehesa yuvireco.

<sup>7</sup> Ēgüe ehi Tūpa ahe doce mbia yuvirecoi vahe upe.

<sup>8</sup> Mbosapi yasi rupi Pablo oi que omombehu Tūpa Ñehengagüer judío upe osiquiyeeñisave itūparo pīpe ipihañemoñeta rerova ñgua Tūpa mborerecuasa resendar reroya ñgua rese.

<sup>9</sup> Amove rumo judío ipihavĩracua ité seroyaēhi ñgua yuvireco. Ipīpe iñehe-ñehe tēiño co tecocuer ipiasu vahe mombehusa rese yuvireco ava rehii rovaque. Evocoyase Pablo oyepepi ichui, vinosepa oyeupi Jesús reroyasar yeroquisa Tirano serer vahesave seraso. Aheve ari yacatu rupi oñehe yepi.

<sup>10</sup> Ēgüe ehi ñuvirío araviter rupi. Sese opacatu ava Asia rupindar judío, ava ndahei vahe judío avei osendu yuvireco yande Yar ñehengagüer.

<sup>11</sup> Tūpa omondo güeco pĩratasa Pablo upe poromondiisa apo ñgua.

<sup>12</sup> Sese pañueru iyavei turucuar Pablo rese imboyapri, ahe serasosa imbaheasi vahe upe imbogüera ñgua. Carugar avei opa yuvinose yuvireco ichui.

<sup>13</sup> Amove oime judío oguata vahe ocar rupi carugar mose ñgua ava sui. Sese nara oiporu pota yande Yar Jesús rer yuvireco.

<sup>14</sup> Evocoyase aipo ehi carugar upe: “Pablo Jesús recocuer omombehu vahe rer pīpe, ‘Peyepipi co mbia sui’ ahe pēu” ehi. Ēgüe ehi pota avei siete Esceva rahir mbahe apo yuvireco viña. Ahe iyesupa judío pahi rerecuar secoi.

15 Carugar rumo omboyevî chupe: “Che aicua Jesús recocuer, aicua avei Pablo; pe rumo ndopocuai, ¿ava vo catu pe peico?” ehiño carugar chupe.

16 Aheseve ahe cuimbahe carugar vîreco vahe opo ipãhuve oso. Opacatu opĩratasa pîpe opa ité oscopî siete mbîa yuvîrecoi vahe. Omomara-mara tẽi oguayîẽhîsa pîpe imonanipa tuprî imondo.

17 Co mbahe sembiapo rêracua opa oyepota opacatu Efeso pendar upe, judío upe, ava ndahei vahe judío upe avei. Evocoyase oyembosiquiye guasu yuvîreco. Ipîpe sui opacatu oicua yande Yar Jesús rer yuvîreco.

18 Setá Jesús vîroya ramo vahe yugüeru opacatu mbahe güembiapocuer naporai vahe mombehu yuvîreco

19 iyavei setá ipaye vahe Jesucristo vîroyase, omonuhapa ocuachiar ombopayesa resendar sapi ãgua opacatu ava rovaque yuvîreco. Sapi pare, opa ahe cuachiar repri vînose yuvîreco. Ahe seprî cincuenta mil tuprî arî mboraviqui repri.

20 Êgüe ehi Tũpa opĩratasa pîpe ombouvicha oñehengagüer iyavei iñehe pĩratasa oyecua catu ava rese.

21 Ipare Pablo ipîhañemoñeta Jerusalén ve oso ãgua ivî Macedonia, Acaya rupi. “Coiye catu aheve che reco vîteseve, ichuive che asora Roma ve” ehi.

22 Evocoyase omondo ñuvîrío opĩtîvîisar Timoteo, Erasto Macedonia ve güenonera. Ahe rumo opîta vîtemî Asia rupi oico.

*Ava Efeso pendar yaîvu guasu yuvîreco*

23 Ahe arî pîpe Efeso pendar yaîvu guasu yuvîreco co tecocuer ipîasu vahe rese.

24 Aheve mbia Demetrio serer vahe secoi. Ahe oyapo Artemisa rēta rahanga guarepochi apopri guarepochi piſi āgua. Ambuae ava mbahe rahanga aposar oipisi tupri avei oporaviqui repri ipiri yuvireco.

25 Sese Demetrio omonuha mbahe rahanga aposar, omonuha avei ambuae oporaviqui vahe Artemisa rahanga rese, ava mboaiſu guasu uca āgua. “Pe mbia, peicua yayapose mbahe Artemisa nungar, yaipisi tupri yande poraviqui repri” ehi omboetasa upe.

26 “Peicua avei Pablo opa ovirova ava eta piha Artemisa mboeteisa sui ‘ndahei Tūpa ité’ ohesa pipe yande rembiapo uve. Ndahei rumo cohapeño ēgüe ehi, opacatu Asia rupi ēgüe ehi avei imombehu.

27 Aviyeteramo mbahe tēi oimera yandeu yande poraviquisa mocañi tēi āgua, tūparo guasu Artemisa upendar aviyeteramo ocañi tēi aveira. Opacatu Asia pendar iyavei ava opacatu ivi rupindar omboetei acoi Artemisa rahanga guasu yuvireco viña. Aviyeteramo rumo ava nombotei iri chira, iyavei viroirora yande rembiapo catupriſa yuvireco” ehi.

28 Osenduse aipo ihe ava yuvireco, oñemoiroſa pipe virosapucai aipo ehi yuvireco: “¡Imboeteipri catu Artemisa yande recua pendar tasecoi!” ehi yuvireco.

29 Opacatu Efeso rupi ava yaivu guasu tēi. Osapucai vahe oipisi Gayo iyavei Aristarco, ahe ñuvirío Pablo rupindar yugüeru vahe Macedonia sui. Oipisise, omombo-mombo seraso yuvireco ava ñemonuha guasusave.

<sup>30</sup> Pablo oique pota tēi ava rehi pãhuve, ambuae Jesús reroyasar rumo nomoingue uca potai yuvireco.

<sup>31</sup> Iyavei moviro mborerecuar imboripar Asia rupindar omondo oñehe chupe aipo ehi: “Ereiquei rene ava ñemonuhasa guasuve” ehi avei yuvireco chupe.

<sup>32</sup> Ñemonuhasave amove ava osapucaí pĩrata ñepeí mbahe rese, amove osapucaí ambuae mbahe rese. Esepia, yaivu tēi yuvireco. “¿Mahera vo evocoyase yañemonuha?” ehi tēi setá ipãhu pendar yuvireco.

<sup>33</sup> Amove rumo ava rehi pãhuve yuvirecoi vahe judío, ahe ombohe-mbohe imoañi-añi imondo Alejandro mbahe mombehu ãgua ava rehi rovaque yuvireco. Alejandro evocoyase omopuha tēi opo ava monguiriri ãgua viña. Osepi pota omu judío ava rehi rovaque viña.

<sup>34</sup> Ava rehi rumo oicuase Alejandro judío secose yuvireco. Opacatu guasu osapucaí pĩrata yuvireco. “¡Imboetepri catu Artemisa yande recua pendar tasecoi!” ehi pucu-pucu yuvireco. Ëgüe ehi ahe osapucaí ñuvirío hora rupi rutei yuvireco.

<sup>35</sup> Evocoyase tecua pipendar mbahe cuachiasar oicatusé ava monguiriri ãgua, aipo ehi chupe: “Peyapisaca mbia pe Efeso pendar, ndipoi ava ndoicuai vahe yande Artemisa tũparo rese yande hañecosa iyavei sahanga iva sui oviapi vahe rese avei hañecosa.

<sup>36</sup> Ndipoi niha ava, ‘Aní’ ehi vaherã che remi-mombehu rese. Sese peyemonguiririño, peyapoi rene mbahe pe yapisacaẽhisave.

<sup>37</sup> Peruño tēi eté co ñuvirío mbia cohava, ndoyapoi rumo mbahe tēi Artemisa upe yuvireco. Ni-



mondai mbahe rese itũparove, ndoviroĩroi avei serer yuvireco.

<sup>38</sup> Sese Demetrio iyavei oporaviqui vahe supi ahe oñemoi rose que ava upe, toyuviraso rane ava recocuer moingatusar upe yuvireco; aheve tomoingatu güecocuer yuvireco.

<sup>39</sup> Pemoingatu potase que ambuae mbahe, peso ranera yemomborandusave imoingatu ãgua.

<sup>40</sup> Mborerecuar revo oyandura yande rembiapo co pipe, ‘¿Mahera peaivu guasu tẽi? ¿Che amotarẽhimbave tie êgũe peye?’ ehi tiẽtera yandeu. Oporanduse yandeu, ndayaicatui chitiẽtera imboyevi ãgua iñehe chupe. Esepia niha, co yañemonuha yande remimbotar tẽi cohavẽ” ehi chupe.

<sup>41</sup> Aipo ihe pare, omomba aheve oñemonuhasa yuvireco.

## 20

### *Pablo guata agüer Macedonia, Grecia rupi*

<sup>1</sup> Ava aivu guasu pare, Pablo, “Toyugüeru” ehi ava Jesús reroyasar upe. Ahese omboaracua ahe ava. Chupe, “Aviye” ohe pare, oso Macedonia ve.

<sup>2</sup> Oguatase Macedonia rupi, omonguerẽhi-rẽhi avei ambuae Jesucristo reroyasar yuvirecoi vahe tecua-tecua rupi. Ipare oyepota Grecia ve oso.

<sup>3</sup> Aheve opita mbosapi yasi. Oso potase Siria ve carite pipe, judío ipihañemoñeta mara sereco ãgua rese yuvireco. Oyanduse, carite pipe oso rãgüer sui, oyevi iri oso Macedonia ve ivi rupi.

<sup>4</sup> Yuviraso moviro mbia supi, ipãhuve ñepei Berea pendar, Pirro rahir Sópater; ñuvirío Tesalónica pendar, Aristarco, Segundo; ñepei

Derbe pendar, Gayo; ñuvirío Asia pendar, Tíquico, Trófimo. Timoteo oso avei supi.

<sup>5</sup> Evocoi mbia yuviraso Pablo renondeve sãro ãgua Troas ve.

<sup>6</sup> Pieta pan ndayapepoi vahe hu pare, orosẽ tecua Filipino sui carite pipe, cinco ari rupi oroyepota Troas ve. Ahe tecuave oropita siete ari rupi.

### *Pablo Troas ve secoi*

<sup>7</sup> Domingu pipe, ore oroñemonuha pan hu ãgua. Ahese Pablo oporombohe oico pĩtu mbiter rupi. Esepia, ahe osẽ pota ahese ayihive voi ichui.

<sup>8</sup> Ahe oi ivate vahesave ñemonuhasa pipe setá tataendi.

<sup>9</sup> Mbã chĩhivahe, Eutico serer vahe, metanave oguapi oĩ. Pablo rumo oñehe pucú iteanga. Evocoyase omboopesi ahe chĩhivahe. Ipare oqué; aviyeteramo tẽi oviapi oi ivate vahe mbosapisa sui. Ahese ava ogüeyi sehõgüer rupi ivi sui yuvireco.

<sup>10</sup> Evocoyase Pablo ogüeyi ou chupe, oñeno oso sese icuhaguã. Ipare aipo ehi Jesús reroyasar upe: —Pesiquirei rene; nomanoi moco —ehi.

<sup>11</sup> Ipare oyeupi iri oso ombohi pan igua. Ichui oñehe pucu vite. Omomba cõhe senise; ipare oso cute.

<sup>12</sup> Evocoyase co mbã chĩhivahe viroyevise secosave, opacatu oyembovaha guasu catu yuvireco. Esepia, nomanoi eté.

### *Pablo yuviraso Troas sui Mileto ve*

<sup>13</sup> Pablo oso pota ivi rupi, ore ranengatu rumo oroso carite pipe Aso ve. Aheve oroyepota Pablo reraso ãgua semimbotar rupi.

14 Oroyoepiase aheve, oha carite pīpe ore pīri. Ichui oroso cute Mitilene ve.

15 Ahere ayihive carite pīpe oroñocua Quío oroso. Ambuae ari rese oroyepota Samos ve. Ichui oroso no oroyepota Mileto ve.

16 Pablo ipoyava. Esepia, oipota Jerusalén ve Pentecostés pieta pīpe tupri güeco ãgua. Sese Efeso oroñacuasaño oroso.

*Pablo ñehesa Jesús reroyasar rãrosareta Efeso pendar upe*

17 Mileto ve ore recose, Pablo omondo oñehe Efeso ve ‘toyugüeru Jesús reroyasar rãrosar cheu’ oya.

18 Oyepotase yuvireco chupe, aipo ehi: “Pecua niha che recocuer aviye ité yipisuive ari che reique ramosa resendar co Asia ve.

19 Ari yacatu rupi aporaviqui yande Yar upe pe pãhuve vichico che reco asiñhisave che yasehosa pīpe. Yepe judío che mboguai etepri che recoãhasave pe recuave yuvireco viña,

20 che rumo ndaicutui ñehesa aviye vahe mombehuñhi pñu mbahe aviye ãgua yepi. Che opombohe ava rehi rovaque, opombohe avei ñepei-pei pe rēta rupi yepi” ehi.

21 “Amombehu ñehesa judío upe, ava ndahei vahe judío upe avei aipo ahe: ‘Pemboasi pe angaipa; peyevi Tũpa upe, peroya avei yande Yar Jesús’ ahe” ehi.

22 “Cũritei asora Jerusalén ve vichico. Aheve che so ãgua Espíritu che cuai che piha pīpe. ‘¿Mara ehira piha yuvireco peve cheu?’ aipo ahe.

23 Co güeraño che aicua: opacatu tecua che sosa rupi Espíritu Santo aipo ehi cheu che roquenda

ãgua iyavei che mombaraisu ãgua yuvireco yepi” ehi.

24 “Ndacherecatẽhi rumo cheyese che mano ãgua. Che rumo amboaviye potaño ité che poraviqusa Tũpa upe, ahe yande Yar Jesucristo che cuai vahe co ñehesa icatupri vahe mombehu ãgua. Co Tũpa oporoaisusa pipe ombou ñepi vahe Guahir ava pĩsiro ãgua” ehi.

25 “Opa niha Tũpa mborerecuasa amombehu pẽu. Che rumo aicua ndache repia iri chira peye.

26 Sese tapeicua cũritei: ndayavi eté che cuaita mboaviye ãgua co tecocuer aviye vahe mombehu pipe pẽu.

27 Esepia, ndaicuacui eté Tũpa Ñhengagüer mombehu; che rumo amombehuño ité opacatu Tũpa recocuer pẽu.

28 Sese peñearo tupri, pesãro avei opacatu Jesús reroyasar Espíritu Santo porocuita rupi. Inungar ovesa rãrosar, ãgüe peye tupriã sãro. Ahe Tũpa remimboepi yuvirecoi. Esepia, Jesús oipiyere vuvi opacatu ava angaipa repirã.

29 Aicua che opoeyare, oyugüerura ambuae ava mahembiar oñaro ai vahe nungar pe pãhuve opacatu Jesús reroyasar mocañipa pota ãgua.

30 Oime aveira que ava pe pãhu pendar pe mbopa pota aveira yuvireco pe reraso ãgua oyeupi.

31 Sese pemahemoha tupri peyese. Pema-henduha acoi opomboaracua tuprise mbosapi araviter rupi, pĩtu, ari yacatu rupi avei che yasehosa pipe pe rereco” ehi.

32 “Sese, che rivireta, opoeyara Tũpa povrive

iyavei iñehesa iporovasasa resendar p̄ipe. Ahe pe moviracua catura pe rereco iyavei omboura opacatu mbahe güemimombehu p̄eu opacatu ambuae güembiporavo reseve.

<sup>33</sup> Ndahei pe guarepochi, que oro iyavei pe turucuar pota raisa p̄ipe aso pe p̄ahuve.

<sup>34</sup> Peicua niha acoi che po p̄ipe ité aporaviqui che recove ãgua, che rupindar recove ãgua avei.

<sup>35</sup> Ëgüe ahe amboyecua che recocuer p̄eu. Supi avei ëgüe peyera; yaporaviqui tupri iparaisu vahe rese hañeco ãgua. Pepihañemoñeta acoi yande Yar Jesús remimombehu rese: ‘Sorivete catu ava iporeco vahe, mbahe oipisi vahe sui’ ehi aracahe” ehi Efeso pendar Jesús reroyasar rãrosar upe.

<sup>36</sup> Oñhe pare, oñenopiha oyerure ãgua opacatu omboripar reseve.

<sup>37-38</sup> Ndoyembov̄ihai eté, “Ndache repia iri chira peye” oyeupe ihese. Sese opacatu oyasehó iteanga yuvireco, oyaco-yaco, osovaup̄ite-p̄ite iri t̄ei avei yuvireco saisupave. Ipare yuvirasoño ité yuvireco supi carite yemboyasave.

## 21

### *Pablo so agüer Jerusalén ve*

<sup>1</sup> Evocoiyase oroseyase ore rivireta yuvireco, oromohivi voi oroso carite p̄ipe Cos ve. Ahere ayihive oroyepota Rodas ve, ichui oroyepota Pátara ve oroso.

<sup>2</sup> Aheve orosepia carite oso vaheã Fenicia ve, ahe ip̄ipe oro, oroso.

<sup>3</sup> Orosasase para guasu oroso, orosepia caha p̄ahu guasu Chipre serer vahe. Ahe oroñocua yande mbahe rese pocoñhisa coti, oroso ivi Siria

ve, para guasu rovai. Carite rumo seroyemboyasa tecua Tiro ve ipipendar mbahe reya ãgua.

4 Aheve orosepia Jesús reroyasar yuvirecoi vahe. Ahese oropita siete arí ipiri. Yepe ahe Jesús reroyasar aipo ehi Pablo upe yuvireco: “Espíritu Santo oñehe oreu. Evocoyase eresoi rene Jerusalén ve” ehi yuvireco chupe viña,

5 siete arí pare rumo, orosoño ité para guasu popive. Opacatu Jesús reroyasar yugüeru, güembireco, guahir reseve-seve ore rupi. Aheve oroñenopihapa ore yerure ãgua.

6 “Aviye, toroso rane” ore he pare chupe yuvireco, oroha carite pipe. Ahe evocoyase oyeví yuviraso güêtave.

7 Tiro sui oroso Tolemaida ve. Oroyepotase, oroso Jesús reroyasar repia ãgua. Aheve oropita ñepei arí.

8 Ahere ayihive oroso Cesarea ve. Aheve oroique, oropita Felipe rêta ve, ahe oguata vahe Jesús recocuer mombehu. Ahe mbia iporavopri secoi aracaco ambuae seis yuvirecoi vahe pãhuve.

9 Evocoi Felipe vireco irungatu guayri ndomendai vahe. Tayri Tũpa ñehe mombehusar pãve yuvirecoi.

10 Oropitase setá arimi ipiri, ahese oyepota Judea sui mbia Agabo serer vahe oreu. Ahe avei Tũpa ñehe mombehusar secoi.

11 Ouse ore pãhuve, vırocua Pablo rumbicuasa ichui. Ipipe oñapichi opi, opo avei. Ahese aipo ehi oreu:

—Espíritu Santo oicua uca cheu, na ehira judío Jerusalén pendar co tumbicuasa yar ãpichi

yuvireco iyavei omondora ava ndahei vahe judío upe —ehi Agabo imombehu oreu.

<sup>12</sup> Orosenduse aipo ihe, ore, evocoi Cesarea pendar avei, oromombehu Pablo upe: “Eresoi rene Jerusalén ve” orohe tēi chupe.

<sup>13</sup> Omboyevi rumo oreu:

—¡Mahera peyaseho che rese, ndache mbovīhai peye! Che rumo ayemoingatu voi che āpichi uca āgua, che mano āgua rese avei Jerusalén ve yande Yar Jesús recocuer rese —ehi oreu.

<sup>14</sup> Ndroicatuise ipihañemoñetasa rerova āgua, oropoiño ichui aipo orohe:

—Tayaposa ayase yande Yar remimbotar —oroheño chupe.

<sup>15</sup> Ipare cute oroyemoingatu ore so āgua Jerusalén ve.

<sup>16</sup> Ichui yuviraso avei moviro ore rupi Jesús reroyasar Cesarea pendar. Ahe ore reraso Chipre pendarer Mnasón rētave. Ahe ore moingue oyepiri. Ahe yipive ité viroya yande Yar oico.

### *Pablo ombori Santiago*

<sup>17</sup> Oroyepotase Jerusalén ve, ahe pendar Jesús reroyasar nihapisii ore pisi yuvireco.

<sup>18</sup> Ahere ayihive Pablo, ore avei oroso Santiago repia. Aheve yuvirecove avei opacatu Jesús reroyasar rārosar Jerusalén pendar.

<sup>19</sup> Pablo, “Avirave” ehi opacatu oñemonuha vahe upe. Ipare omombehu tupri yipisuiwe oyeupe Tūpa mbahe oyapo uca vahe ava ndahei vahe judío pāhu rupi.

<sup>20</sup> Osenduse, omboetei guasu Tūpa yuvireco. Omombehu Pablo upe yuvireco:

—Che mu, ereicua setá iteanga judío viroya Jesús yuvireco. Ahe setacuer setá catu mil vahe sui cute. Opacatu evocoi ava iquerēhi vahe Moisés porocuaita aracahendar mboaviye āgua yuvireco —ehi—.

21 Osendu tēi nde rembiapo yuvireco. Omombehu tēi avei aipo nde he yande mu ambuae tecua rupindar yuvirecoi vahe upe: “Peseya Moisés porocuaita. Pembocircuncida iri rene pe rahir. Peico iri rene yande recocuer aracahendar pīpe’ aipo ehi tēi oico” ehi nde mombehu yuvireco —ehi Pablo upe yuvireco—

22 ¿Mara yahera vo? Esepia, oyandura nde yepotasa cohava yuvireco.

23 Aviye catu ereyapora ore porocuaita oromombehu vahe ndeu. Oime irungatu mbia ore pāhuve. Ahe mbia omboaviyera güemimombehu Tūpa upe yuvireco.

24 Eraso co mbia ndeyeupi, eñemoatiro supi eso, emboepi avei mbahe Tūpa upe icuavēhepri. Ahese ahe mbia oicatura oñeapi yuvireco. Eremboaviyese evocoi mborocuaita, opacatu judío nde reroyara, oicua ara va semira tēise mbahe nde rembiapo rese yuvireco. Oicua aveira, nde ereroya vite Moisés suindar mborocuaita —ehi yuvireco chupe—.

25 Ndoroyocuai rumo ava Jesús reroyasar ndahei vahe judío evocoi nungar mbahe rese. Esepia, opa icuachiasa chupe: “Pehui rene mbahe mīmba yucapri mbahe rahanga tēi upendar seropovēhepri, pehui rene mbahe ruvi, pehui rene mbahe mīmba yucapri suvi renosepirēhi



vahe iyavei peaguasai rene” orohe chupe —ehi yuvireco.

*Judío oipisi Pablo tũparo guasu pipe yuvireco*

<sup>26</sup> Evocoyase Pablo viraso ahe irungatu mbia yuvirecoi vahe oyeupi. Ahere ayihive oyoya oñemoatiro yuvireco. Ipare yuviroique judío tũparo guasu pipe, omombehu yuvireco pahi upe: “Oroñemoatiro ramo. Sese oroyevira siete ari pipe oromombase ore ñemoatirosa. Ahese oromondo pota ndeu porerecosa Tũpa porocuaita rupi icuavẽhepirã” ehi yuvireco pahi upe.

<sup>27</sup> Opa potase evocoi siete ari, judío Asia pendar osepia Pablo tũparo pipe yuvireco. Ahese omoñemoiro uca opacatu ava rehi tũparo pendar. Ipare ipisise,

<sup>28</sup> sãse yuvireco: “¡Ore mu, ore pĩtívii peye co mbia oropisi vahe rese! Esepia, oguata opacatu rupi. Oñehe tẽi yande rese, Moisés porocuaita rese, yande tũparo rese avei iyavei viroique ava ndahei vahe judío yande tũparo pipe. Sese omonguiha tẽi yande tũparo maranehi” ehi yuvireco chupe.

<sup>29</sup> Co rese aipo ehi. Esepia, cuese osepia Pablo viroguatase Trófimo oyeupi, ahe mbia Efeso pendar ndahei vahe judío. Sese ipihañemoñeta ‘Pablo viroguata ava ndahei vahe judío yande tũparo pipe’ oya yuvireco viña.

<sup>30</sup> Opacatu Jerusalén pendar ndasorii yuvireco. Cũriteimi ava yuvinoña guasu tũparove. Oipisi Pablo ombotiriri senose tũparo pipe sui yuvireco. Ahese omboya voi guaquicuei tũparo roquenda yuvireco.

<sup>31</sup> Oyuca potase yuvireco, ahese yaivu rēracua oyepota sundao rerecuar guasu upe.

<sup>32</sup> Cūriteimi serecuar viraso sundao, yuvinoña yaivu vahe upe yuviraso. Osepiase ava sundao rerecuar guasu, isundao avei yuvireco, ndoyuvirocua iri Pablo rese yuvireco.

<sup>33</sup> Ahese ahe sundao rerecuar guasu oyemboya oso Pablo rese, oipisi uca. Ipare oyocuai osundao, “Tapeicuhacua ñuvirío carena pipe” ehi. Evocoyase oporandu ava upe: “¿Ava vo co mbia? ¿Mbahe vo oyapo pēu?” ehi judío eta upe.

<sup>34</sup> Ahese amove ava ñepei mbahe rese oñehe, ambuae, ambuae mbahe rese tēi yuvireco. Evocoyase sundao rerecuar ndoicatui supi eté vahe mbahe rendu āgua yaivu guasu vahe pāhuve. Sese, “Peraso cuartelve” ehi.

<sup>35</sup> Viroyepotase yeupisave, ichui osupi sundao oachihive seraso yuvireco ava rehii ñemoiró iteangasa sui.

<sup>36</sup> Ava rehii rumo yuvirasoño ité saquicuei, “¡Tomano!” ehi pucu-pucu yuvireco chupe.

### *Pablo oyoepi ava rehii rovaque*

<sup>37</sup> Omoingue potase Pablo cuartel pipe yuvireco, aipo ehi sundao rerecuar guasu upe:

—¿Iyacatu vo yañemoñeta raimi? —ehi.

Evocoyase, omboyevi mborerecuar chupe:

—¿Ereicua vo griego ñehe? —ehi—.

<sup>38</sup> ¿Ndahei vo nde Egipto pendar, vavasa oyapo vahecuer ereico? Nde revo acoi ereraso oporoyuca vahe pāve cuatro mil tupri ivi iporupirēhisa rupi —ehi sundao rerecuar chupe.

<sup>39</sup> Evocoyase,

—Che judío, tecua Tarso pendar aico. Ahe tecua Cilicia pīpendar imboeteipri vahe secoi. Eyapomi mbahe icatupri vahe cheu, tañehemi rane catu ava upe —ehi.

<sup>40</sup> Evocoiyase mborerecuar, “Aviye” ehi chupe. Ipare opūha yeupisa harive, omopuha opo ava eta monguiriri āgua. Ahe se oyapisaca tupri ava rehi yuvireco. Ahe ava upe oñehe hebreo ñehe pīpe aipo ehi:

## 22

<sup>1</sup> “Che mu eta, peyapisaca, che añehemira che yoepi āgua pēu cūrtei” ehi.

<sup>2</sup> Oñehe hebreo ñehe pīpe. Sese osenduse, oyapisaca tupri catu yuvireco.

<sup>3</sup> “Che judío aico. Aha Cilicia ivi pīpe Tarso ve. Cohave rumo acuacua, Jerusalén pīpe, Gamaliel che mbohe oyerquisave. Aheve ayembohe tupri yande ramoi porocuita rese. Ahe che mbohesa pīpe avei ayembohe Tūpa mboetei āgua rese vichico inungar pe peico cūrtei.

<sup>4</sup> Che yipindar aseca-seca catu ava co Tecocuer Piasu rupi oguata vahe yamotarēhisave. Supitisave, añapichi-pichi yuvireco yepi, asoquenda-quenda cuimbahe, cuña avei. Ayuca uca pota rai ahe ava yuvireco.

<sup>5</sup> Pahi rerecuar ivate catu vahe iyavei opacatu tecua pendar rerecuar oicua che reco yuvireco. Ichui niha aipisi cuachiar aru vahe rã yande mu tūparo rerecuar Damasco pendar upe, ‘Taso Damasco ve pahi rerecuar rer pīpe ava Jesús reroyasar pisi āgua. Ichui tarupa cohove imombaraisu āgua’ ahe viña.

*Pablo omombehu oñecuñaro agüer*

<sup>6</sup> “Evocoyase aso Damasco ve. Ahe ipiar rupi arovise vicho mbiter ari rupi, aviyeteramo tēi osape guasu ìva sui oreu.

<sup>7</sup> Ahese aviapi ìvive. Asendu avei ñehesa: ‘Saulo, Saulo, ¿mahera vo che amotarēhi etepri eve?’ ehi vahe cheu.

<sup>8</sup> Ahese aporandu: ‘¿Ava vo nde ereico, Mbia?’ ahe chupe. ‘Che Jesús, Nazaret pendar aico. Che niha che amotarēhi etepri che rereco eve’ ehi cheu.

<sup>9</sup> Che rupindar osepia sendigüer, osiquiye avei yuvireco ichui. Ndosendui rumo ñehesa cheundar yuvireco.

<sup>10</sup> Aipo ahe chupe no: ‘¿Che Yar, mara ahera vo vichico?’ Ahese ahe aipo ehi cheu: ‘Epūha, eso Damasco ve. Aheve ava opara omombehu mbahe nde rembiaporā’ ehi cheu.

<sup>11</sup> Sendí iteanga vahe, ndache mboesapisoise, ahese che rupindar che po pisi che reraso Damasco ve yuvireco” ehi.

<sup>12</sup> “Aheve mbia, Ananías serer vahe, ou cheu. Ahe Tūpa mboyeroyasar ité, viroya tupri vahe avei iporocuaite; sese opacatu judío secua pendar: ‘Co mbia aviye vahe ité’ ehi yuvireco chupe.

<sup>13</sup> Oyepotase, aipo ehi: ‘Che rivri, Saulo, esareco iri’ ehi. Aheseve iporēhi iri mbahe cheu.

<sup>14</sup> Ipare aipo ehi: ‘Yande ramoi rembieroya, yande Ru Tūpa, nde poravo güemimbotar cua ãgua. Oipota avei eresepia vaherā ichuindar ava seco ìvi vahe, eresendu aveira iñhe’ ehi.

<sup>15</sup> ‘Nde evocoyase eremombehura secocuer opacatu ava upe; eremombehura nde rembiepia,

eresendu vahe avei' ehi cheu.

<sup>16</sup> 'Evocoyase, cūritei ndiya iri eresāro' ehi. 'Epūha, toroãpiramo. Eporandu yande Yar upe nde reco moatiro āgua nde angaipa sui' ehi Ananías cheu.

*“Tūpa che mondo ava ndahei vahe judío upe” ehi Pablo*

<sup>17</sup> “Coiye catu, ayevi irise Jerusalén ve, ayerure tūparo guasu pīpe. Ahese che quer nungarve asepia mbahe.

<sup>18</sup> Asepia yande Yar. Ahe aipo ehi cheu: 'Nde poyava, eso voi Jerusalén sui. Esepia, Jerusalén pendar ndoyapisaca potai chira eremombehuse ñehesa che resendar' ehi Jesús cheu.

<sup>19</sup> Che aipo ahe chupe: 'Che Yar, opacatu che cua nde reroyasar roquenda-quendase, ainupa-nupa ucase avei aguatase judío tūparo yacatu rupi' ahe.

<sup>20</sup> Aipo ahe avei chupe: 'Oyucase Esteban yuvireco, ahe nde recocuer mombehusar, che ahese asepia. Chepihañemoñeta rupi aviyeyño oyucase yuvireco. Sese asāro yucasar yeaosa vihā' ahe chupe.

<sup>21</sup> Che Yar rumo omboyevi cheu: 'Eso, oromondora coi rupi ava ndahei vahe judío pāhuve' ehi che Yar cheu” ehi Pablo ava rehi upe.

*Pablo sundao rerecuar guasu povrīve secoi*

<sup>22</sup> Aipo rupi osendu iñehe yuvireco. Ahese rumo osapucaī pīrata yuvireco chupe: “¡Tomano co mbia! ¡Toicove vite iri eme co ivi pīpe!” ehi yuvireco chupe.

23 Osapuca-pucai, osequipa oyeaosa oñemoirombave yuvireco iyavei omombo-mombo ivi cuhi ivate coti yuvireco yamotarēhimbave.

24 Ahese sundao rerecuar guasu omoingue uca cuartelve, aipo ehi osundao upe: “Peinupa, ahese revo omombehura mbahe sui vo sãse ati yamotarēhimbave ava yuvireco chupe” ehi osundao upe.

25 Oñapichise rumo inupa ãgua yuvireco, Pablo omombehu ñepeí sundao rerecuar upe:

—Yepe che judío, che rumo romano avei aico. ¿Iyacatu pñha peinupara romano chupe mbahe rese poranduēhiseve? —ehi mborerecuar upe.

26 Osenduse ñehe, oso voi omombehu güerecuar upe.

—Eicua catu, aipo mbia romano secoi —ehi.

27 Evocoyase sundao rerecuar guasu ou chupe:

—¿Supi eté vo aipo nde romano ereico? —ehi.

—Taa, ahe ité niha aico —ehi.

28 Ahese sundao rerecuar guasu aipo ehi chupe:

—Che rumo setá guarepochi amondo romano che reco ãgua —ehi.

—Che rumo che ha ramo suive, romano aico —ehiño sundao rerecuar upe.

29 Ahese oinupa pota vahe osiquiyepave oyepepi yuvireco ichui; sundao rerecuar guasu avei oicuaase Pablo romano secosa rese, osiquiye ñapichi ucasse.

*Pablo oyopei judío porandusa ivate catu vahe-save*

30 Ahere ayihive sundao rerecuar guasu oicua tupri pota: ¿Mbahe sui pñha judío oyamotarēhi Pablo yuvireco? Evocoyase oyora. Ahese oyocuai

porandusa pendar ivate catu vahe ahe opacatu judío pahi rerecuar, opacatu ambuae judío rerecuar iñemonuha ãgua yuvireco. Ahese oviraso uca Pablo yuvireco chupe.

## 23

<sup>1</sup> Aheve Pablo omahengatu ava oñemonuha vahe rese ohã aipo ehi chupe:

—Che mu, che rembiapo mbahe tupri Tũpa rovaque areco yepi che pihañemoñeta tupri sa pipe —ehi.

<sup>2</sup> Ahese Ananías, ahe pahi rerecuar ivate catu vahe, yipi pendar uve, “Peiyurupete” ehi.

<sup>3</sup> Ahese Pablo omboyevi chupe:

—¡Tũpa nde nupara, nde aviye tupri tẽi angahu vahe ereico! Nde mbahe rese porandu ãgua cheu porocuita rupi ereĩ. Evocoyase, ¿mahera ereporocuai che yurupete ãgua mborocuita mboyeroyaẽhisa pipe? —ehi chupe.

<sup>4</sup> Yivirindar aipo ehi yuvireco chupe:

—¡Ereñehe rai rutei seroĩrosa pipe co Tũpa rembiporavo, co yande pahi rerecuar ivate catu vahe upe! —ehi yuvireco.

<sup>5</sup> Ahese omboyevi chupe:

—Che mu, ndaicuai co oñehe vahe pahi rerecuar ivate catu vahe secose. Esepia, icuachiapri pipe aipo ehi yandeu: ‘Peñehe rai eme pe rerecuar upe’ ehi —ehi.

<sup>6</sup> Ahese oicuase oñemonuha vahe pãhuve amove oime saduceo, amove fariseo. Ahese oñehe pĩrata chupe:

—Che mu, che fariseo aico iyavei fariseo che yesupa yuvirecoi. Oroviroya avei ava ocuerayevi

vaherã curi. Sese revo co imboasipave oporandu mbahe rese yuvireco cheu —ehi.

<sup>7</sup> Aipo he ramoseve voi, fariseo, saduceo oñeñehopoepi-epi yuvireco. Sese oyemboyaho yuvireco.

<sup>8</sup> Esepia, saduceo ndoviroyai vahe cuerayevisa iyavei “ndipoi Tũpa rembiguai, que espĩritu” ehi vahe yuvireco. Fariseo rumo viroyaño ité opacatu aipo mbahe yuvireco.

<sup>9</sup> Sese sãse guasu yuvireco. Ahese oime amove opũha vahe Moisés porocuita rese oporombohe vahe fariseo Pablo repisave yuvireco aipo ehi:

—Co mbia ndoyapoi eté mbahe tẽi. Aviyeteramo espĩritu que Tũpa rembiguai revo oyemboyecua mbahe mombehu ãgua chupe —ehi yuvireco.

<sup>10</sup> Yaivu guasu catu-catu irise yuvireco, ahese sundao rerecuar guasu aipo ehi: “Aviyeteramo ombohi-mbohira Pablo yuvireco” ehi. Ahese oyocuai osundao, “Penose ava pãhu sui, pemoingue iri cuartel pipe” ehi.

<sup>11</sup> Ahe pĩtu pipe, yande Yar oyemboyecua chupe aipo ehi: “Eyemonguerẽhi catu, Pablo, inungar che mombehu nde siquiyeẽhisa pipe cohava Jerusalén ve, ãgũe ere aveira che mombehu Roma ve” ehi.

### *Omboguai Pablo yuca ãgua yuvireco*

<sup>12</sup> Ahere ayihive setá judío oñemonuha, omboguai Pablo yuca ãgua yuvireco: “Tũpa rovaque ndayayucaise Pablo, ndayacarui chira, ndayaihui chiaveira; yayucase voi, yacarura, yaihura” ehi yuvireco.

<sup>13</sup> Ahe ava aipo ehi vahe retacuer setá catu cuarenta sui.



14 Ichui yuviraso pahi rerecuar upe, tecua pendar rerecuar upe avei aipo ehi:

—Oromboguai Tūpa rovaque Pablo; ndorocarui chira ndoroyucaise —ehi yuvireco chupe—.

15 Sese pe, ambuae porandusa ivate catu vahe pendar avei peporandu ahe sundao rerecuar guasu upe aipo peyera imombehu chupe: “Ayihive emose uca irimi Pablo oreu; oroicua uca pota iri mbahe sembiapo chupe” peyera —ehi yuvireco—. Osēse, oroquētirora sese. Oyepotase ou, oroyucara —ehi yuvireco.

16 Pablo rihir rumo oyanduse sēracua, oso cuartelvel chupe imombehu.

17 Ahese Pablo oñehe sundao rerecuar upe aipo ehi imombehu chupe:

—Erasomi tēi co mbia chīhivahe sundao rerecuar guasu upe. Omombehu pota mbahe chupe —ehi.

18 Evocoyase mborerecuar viraso ahe chīhivahe güerecuar upe aipo ehi:

—Pablo soquendapri oñehe cheu aipo ehi: “Eraso co mbia chīhivahe sundao rerecuar guasu upe” ehi. Co chīhivahe omombehu pota mbahe ndeu —ehi.

19 Ahese mborerecuar guasu oipisi ipo rese, viroyepipi ambuae sui, oporandu chupe:

—¿Mbahe vo eremombehu pota cheu? —ehi.

20 Evocoyase ahe aipo ehi:

—Judío rerecuar oyemboyoya yuvireco. Oporandu angahu tēira Pablo rese seraso iri āgua ñemonuhasa ivate catu vahesave ayihive yuvireco. “Oroporandu pota iri Pablo upe sembiapo rese” aipo ehi tēira yuvireco ndeu —ehi—.

21 Ndereroyai chira ahe iporandusa yuvireco. Esepia, cuarenta sui setá catu ava oquẽtiro va-herã yuvireco sese. Omboguai eté yuca ãgua yuvireco. Ndocarui, ndoihui chira aipo ndoyucaise yuvireco. Cũritei oyemoingatu, osãro vıteño nde porocuita yuvireco –ehi mbia chĩhivahe chupe.

22 Ipare sundao rerecuar guasu omboyevi imondo, aipo ehi chupe: “Eremombehui rene ambuae ava upe eremombehu vahe cheu” ehi.

*Pablo imondosa mborerecuar guasu Félix rovai*

23 Sundao rerecuar guasu ñuvirío opovri pendar sundao rerecuar upe aipo ehi yocuai: “Pemoingatu doscientos sundao Cesarea ve yuviraso vaheerã opı rese, ambuae setenta sundao cavayu harıve iyavei doscientos tuprı toguata lanza re-sendar yuvireco. Ipare pesopara pıtuse las nueve pipe” ehi.

24 “Pemoingatu uca avei cavayu Pablo yeupi ãgua. Ęgüe peye pesãro tuprıra seraso yande rerecuar Félix upe” ehi.

25 Evocoyase sundao rerecuar guasu oicuchía Félix upe imondo. Aipo ehi chupe:

26 “Imboeteiprı ore rerecuar Félix. Che, Claudio Lisias, amondó che mahenduhasa ndeu.

27 Iyavei co amombehu pota ndeu: judío oipısi co mbia yuvireco yuca ãgua viña. Che rumbo aicua romano seco rese, ahese araso sundao sepi ãgua judío eta sui

28 ‘¿mbahe rese pıha ndoyambotai yuvireco?’ viya. Sese araso judío porandusa ivate catu vahe pendar upe iñemonuhase yuvireco.

29 Ahese aicua yamotarēhisa judío porocuita sui tēi iyavei ndoyapoi mbahe tēi oreu. Sese ndiyai yuca āgua oreu, soquenda āgua avei.

30 Ayanduse rumo judío oquētiro sese yuvireco, amondo voi evocoi mbia ndeu. Ipare amombehu yamotarēhisar upe: ‘Peporandu potase Pablo recocuer rese, pesora Félix rovai’ ahe chupe yuvireco. Aipo rupive” ehi.

31 Evocoiyase ahe pĩtu pipe sundao viroguata Pablo ocuaita rupi yuvireco, viraso Antípatris ve yuvireco.

32 Ahere ayihive sundao yuviraso vahe opi rese oyevi yugüeru cuartelve. Sundao cavayu ari pendar güeraño rumo yuvirasoño vite.

33 Viroyepotase Cesarea ve, omondo cuachiar mborerecuar guasu upe yuvireco. Aheseve avei Pablo omondo yuvireco chupe.

34 Oyerogui pare mborerecuar cuachiar rese, oporandu Pablo upe: “¿Que pendar vo nde erico?” ehi. “Che Cilicia cotindar aico” ehi.

35 —Oyepotase nde amotarēhisar yuvireco, asendura nde yoepisa —ehi Félix chupe.

Evocoiyase oyocuai opĩtiviisar Pablo rãro āgua güētave Herodes rembiapogüer pipe.

## 24

### *Pablo oyoepi mborerecuar Félix rovai*

1 Cinco arĩ pare, Ananías, ahe pahi rerecuar ivate catu vahe, tecua pipendar rerecuar avei yugüeru Cesarea ve. Ou avei mbia ava mbahe aposar pĩtiviisar oñhe vaheã Pablo amotarēhi

uca ãgua, ahe serer Tértulo. Ahe yugüeru Pablo recocuer mombehu ãgua mborerecuar Félix upe.

<sup>2</sup> Evocoyase Félix güeru uca Pablo. Ahese Tértulo omboipi sese oñehe aipo ehi Félix upe:

—Nde imboyeroyapri ereico. Aviye ndeu nde porocuai tupriresa rese. Esepia, ndipoi vavasa ore recua rupi. Ereyapo uca avei ore recua pipe mbahe iporañete vahe nde poroaisusa pipe.

<sup>3</sup> Opacatu rupi nde ereyapo tupri vahe oroipisi. Sese, “Aviye ndeu” orohe ndeu, imboyeroyapri Félix.

<sup>4</sup> Ndoromombita pucu potai rumo che ñehe pipe. Sese eyapisaca raimi tēi catu che ñehe rese —ehi—.

<sup>5</sup> Oroyandu co mbia ava mañeco tēisar oguata opacatu ivi rupi. Ore judío, ore mboyaho ore yeamotarēhi uca ãgua, ahe Jesús, Nazaret pendar, reroyasar rerecuar —ehi—.

<sup>6</sup> Viroique avei ava ndahei vahe judío ore tūparo pipe. Ēgüe ehi ore tūparo momara. Sese co oroipisi —ehi—.

<sup>7</sup> Evocoi sundao rerecuar guasu Lisias rumo oyepota ore pãhuve. Ahe opĩratasa pipe vinose ore po sui,

<sup>8</sup> aipo ehiño oreu: “Peso, tapemombehu co mbahe sembiapo Félix upe” ehi. Nde avei ereporandura sembiapo rese mbahe sui eté vo ěgüe orohe chupe —ehi Tértulo.

<sup>9</sup> Aipo ehi tupri avei ambuae judío yugüeru vahe yuvireco supi.

<sup>10</sup> Ipare Félix oyaiti Pablo upe ‘toñehe’ oyapave. Ahese oñehe:

—Aicua nde ereporocuai setá araviter ore recua rupi. Sese ayoepira nde rovaque che rorivetesa

pipe —ehi Félix upe—.

<sup>11</sup> Nde ereicua tupri potase, ereporandura supi eté co pipe doce ari ramo opa che yepotare Jerusalén ve Tūpa mboetei āgua.

<sup>12</sup> Co judío oicua yuvireco ñañhengatai ava upe tūparo guasu pipe, namboaivu ucai avei ava ambuae judío ñemonuhasa rupi iyavei que ambuae ava Jerusalén pendar —ehi—.

<sup>13</sup> Co mbia ndoicatu eté mbahe che rembiavi mombehu seroya tupri āgua yuvireco ndeu.

<sup>14</sup> Co rumo amombehu vahe ndeu: che amboetei Tūpa, ore ramoi rembieroya Tecocuer Piasu pihañemoñetasa rupi. Co judío upe rumo: “Co porombohesa co coti tēi vahe” ehi. Che rumo aroya ité opacatu icuachiapri porocuaita pipendar iyavei Tūpa ñehe mombehusar rembicuachiaguer avei —ehi—.

<sup>15</sup> Inungar co mbia, ēgüe ahe tupri avei aicua Tūpa ombogüerayevira ava omano vahecuer seco aviye vahe, ndaseco pōrai vahe avei coiye.

<sup>16</sup> Sese ayemoviracua tupri che pihañemoñetasa rereco tupri catu āgua yepi Tūpa rovaque, ava rovaque avei.

<sup>17</sup> “Setá araviter pare ayevi che recua Jerusalén ve ava iparaisu vahe upe porerecosa mondo āgua. Ahese avei mbahe mimba ayuca uca Tūpa upe seropovēhe āgua.

<sup>18-19</sup> Evocoiyase moviro judío Asia pendar che repia yuvireco Jerusalén ve tūparo pipe judío porocuaita rupi che ñemoatiro pare. Ndipoi ahese ava rehii che rupi, namboaivu guasu ucai avei ava. Ahe che repia vahe rumo iya yugüeru ndeu che mombehu, que virecose che amotarēhisa

yuvireco viña.

<sup>20</sup> Anise, aviyeteramo co oyepota vahe cohawe yugüeru, omombehura ndeu que mbahe che rembiavi yuvireco pahi rerecuar guasu ñemonuhasave che reiquesendar” ehi.

<sup>21</sup> “Co rese revo oñemoiro yuvireco cheu aipo ahe pĩratase ipãhuve: ‘Che aroya ava ocuerayevira coiye. Sese che reraso pe rovai co pĩpe che recoãha ãgua yuvireco’ ahese” ehi Félix upe.

<sup>22</sup> Félix oicua tupri co Tecocuer Piasu. Sese osendu pare aipo ñehesa, ndoyapo pota vitei mbahe, aipo ehiño ava upe:

—Oyepotase Lisias, ahe sundao rerecuar guasu, ahese voi aicua tupri catura aipo mbahe sembiapo —ehi Félix ava upe.

<sup>23</sup> Evocoiyase oyocuai sundao rerecuar Pablo rãro ãgua: “Eremondomira rumo que mbahe semimbotar apo ãgua chupe iyavei imboripar yugüeruse, tihañecoño yuvireco sese. Ëgüe ere sãro” ehi Félix sãrosar upe.

<sup>24</sup> Moviro ari pare Félix viroyepota güembireco Drusila, ahe judía avei. Ahese Félix güeru uca Pablo, osendu pota iñehe Jesucristo reroyasa resendar yuvireco.

<sup>25</sup> Pablo rumo omombehuse chupe teco ñvisa resendar, teco ñearosa resendar avei iyavei aipo ehise: “Tũpa oporandura mbahe yande rembiapogüer rese yandeu ari cañise coiye” ehise, ahese Félix osiquiyepave aipo ehi Pablo upe:

—Esoño rane. Arecose ari nde ñehe rendu iri ãgua, orogüeru uca irira —ehiño.

<sup>26</sup> Félix ipihañemoñeta yepi ‘Pablo revo omboura guarepochi cheu osẽ ãgua’ oya viña. Sese osãro pucu tẽi. Iyavei setá oyupagüer güeru uca oyeupe oñemoñeta ãgua sese.

<sup>27</sup> Ñuvirío araviter pare rumo, Porcio Festo oique Félix recuñara. Ahese Félix judío mboviha ãgua, oseya Pablo soquendasave.

## 25

### *Festo rovai Pablo imondosa*

<sup>1</sup> Mbosapĩ ari oyepotare Festo osẽ Cesarea sui, oso Jerusalén ve.

<sup>2</sup> Aheve oyepotase, pahi rerecuareta, judío rerecuareta avei omombehu Pablo recocuer yuvireco chupe.

<sup>3</sup> Ipare oporandu chupe: “Emboumi uca Pablo cohave oreu” ehi yuvireco ‘yayuca peri rupive’ oyapave yuvireco viña.

<sup>4</sup> Festo rumo aipo ehi chupe: “Aní. Esepia, Pablo Cesarea ve soquendasa oico iyavei che ayevi piaivira vicho aheve” ehi.

<sup>5</sup> —Sese pemondo pe rerecuar che rupi. Naporaise co mbia rembiapo, aheve tomombehu yuvireco cheu sembiapocuerai sereco mara ãgua —ehi Festo chupe.

<sup>6</sup> Evocoyase Festo opita Jerusalén ve ocho ari rupi revo, anise diez ari. Ipare oyevi oso Cesarea ve. Ahere ayihive oguapĩ güendave ava reco moin-gatu ãgua oĩ. Ahese oyocuai Pablo reru ãgua.

<sup>7</sup> Oyepotase Pablo oso, ahese judío yugüeru vahe Festo rupi, oyemboya yuvireco sese. Ahese omombehu-mbehu tẽi Festo upe Pablo rembiapo

yuvireco, ndoicatui eté rumo seroya uca ãgua yuvireco.

<sup>8</sup> Esepia, Pablo aipo ehi oyoepisave:

—Ndayemboangaipai judío porocuita rese, judío tũparo rese, yande rerecuar guasu Roma pendar Cesar rese avei —ehi.

<sup>9</sup> Festo rumo omboviha pota judío, sese oporandu Pablo upe:

—¿Ndequerẽhi vo Jerusalén ve ereso vaherã? Aheve cõ mbahe nde rembiapo rese aporandura ndeu —ehi chupe.

<sup>10</sup> Ahe rumo omboyevı chupe:

—Cũritei aico cohava romano mborerecuar guasu porandusa rovai. Aheve ité iyacatu che rembiapo rese porandusara cheu. Nde niha ereicua ndipoi eté mbahe tẽi ayapo judío amotarẽhisave —ehi—.

<sup>11</sup> Ayapose que mbahe naporai vahe, avıyeño che yuca uca ãgua eve; ndayapoise rumo co judío omombehu vahe yuvireco ndeu, ndiyai che mondo ãgua evocoi ava povrıve eve. Che rumo aso pota mborerecuar Cesar ivate catu vahe upe cheu mbahe rese porandu ãgua —ehi.

<sup>12</sup> Ahese Festo oñemoñeta opıtiivisar oporomboaracua vahe rese, ipare omombehu Pablo upe:

—Ereso pota Cesar upe. Avıye, eresora evocoyase —ehi chupe.

### *Pablo mborerecuar Agripa rovai*

<sup>13</sup> Evocoyase movıro ari pare, evocoi mborerecuar guasu Agripa, cuña Berenice rese, oyepota Cesarea ve “avırave” apo ãgua Festo upe yuvireco.



14 Opitase yuvireco setá ari Cesarea ve, Festo omombehu Agripa upe Pablo recocuer. Aipo ehi chupe:

—Oime ñepeí mbia soquendapri oseya vahe Félix cheu —ehi—.

15 Asose Jerusalén ve, judío pahí rerecuareta, tecua pendar rerecuareta avei omombehu yuvireco cheu secocuerai, ‘Tayucasa, tehi chupe’ oya yuvireco viña —ehi—.

16 Ahese aipo ahe yuvireco chupe: “Ndiyái eté romano mborerecuar omondo vaheerã que ava uve sese oñemoñeta vahe rese mbahe moingatuẽhi renondeve. Toyoepi rane omombehusar rovai, tomombehu tupri rane opacatu güecocuer” ahe judío upe —ehi—.

17 Sese yugüeruse cohava yuvireco, aporandu voi pota secocuer rese chupe. Evocoyase ñepeí ari pare aguapi che rendave porandusave. Ahese ayocuai che p̃itivisar evocoi mbia reru ãgua —ehi—

18 Evocoyase opũha sese oñemoñeta vahe sembiapo ai mombehu ãgua. Asendu renondeve che pihañemoñeta: “Oyapo revo mbahe naporai vahe” ahe viña. Ndipoi eté rumo mbahe sembiapo —ehi—.

19 Mbahe sembieroya tẽi omombehu yuvireco. “Evocoi Jesús omano” ehi ava yuvireco. Pablo rumo aipo ehi imombehu: “Jesús oicoveño ité” ehi.

20 “¿Mara ahera p̃iha co sembiapo moingatu?” ahe tẽi. Sese aporandu chupe: “¿Ndequerẽhi vo Jerusalén ve mbahe nde rembiapo rese porandu ãgua ndeu?” ahe chupe —ehi—.

21 Pablo rumo oporandu cheu Cesar upe oso

ãgua. Oipota mborerecuar ivate catu vahe oyeupe mbahe güembiapo rese porandu ãgua. Sese asoquenda ucaño vite sereco imondo ãgua Cesar upe —ehi Agripa upe.

<sup>22</sup> Evocoiyase Agripa aipo ehi chupe:

—Asendu pota avei ahe mbia ñehe —ehi.

Ahe aipo ehi chupe:

—Ayihive voi teresendu —ehi.

<sup>23</sup> Ahere ayihive, Agripa oyepota, Berenice rese yugüeru chupe inungar opivondi vahe, ãgüe ehi yuviroique mborerecuar ñemoñetasave sundao rerecuar iyavei opacatu tecua pipendar ava seco ivate catu vahe reseve. Ahese Festo oyocuai opitivisar Pablo reru ãgua yuvireco,

<sup>24</sup> aipo ehi:

—Ore rerecuar guasu Agripa iyavei opacatu ambuae yuviroique vahe, peyapisaca: pesepia co mbia. Co mbia rese judío eta oñehe tõi yuvireco Jerusalén ve iyavei cohava Cesarea ve. Osapucái pĩrata tõi yuvireco ‘itomano ité evocoi!’ oya yuvireco cheu —ehi—.

<sup>25</sup> Ndayosui rumo mbahe sembiapo yuca uca ãgua iyavei oporandu oso ãgua mborerecuar ivate catu vahe Cesar upe. Sese che ayemoingatu ité imondo ãgua chupe.

<sup>26</sup> Ndarecoi rumo mbahe naporai vahe aicuachía vaherã imondo ãgua chupe. Sese aru uca co mbia pe rovai —ehi ava upe—. Iyavei nde ore rerecuar guasu Agripa, ndeu ité aru uca. Nde chupe mbahe rese porandu pare, aviyeteramo oimera mbahe icuachiapirã sesendar Cesar upe nara —ehi—.

<sup>27</sup> Chepiñañemoñeta amondose co mbia chupe, naporai cheu ndipoise mbahe sembiapo ai —ehi Festo Agripa upe.

## 26

*Pablo omombehu güecocuer Agripa rovai*

<sup>1</sup> Evocoyase Agripa aipo ehi Pablo upe:

—Emombehuño nde yoepisa cheu —ehi.

Ahese Pablo omopuha opo oñhe ãgua aipo ehi:

<sup>2</sup> “Ore rerecuar Agripa, ayoepera che rorivetesave judío che rese ñemoñeta-ñeta tãisa sui mbahe che rembiapoẽhi rese nde rovai.

<sup>3</sup> Esepia, ereicua tupri opacatu judío recocuer, ipihañemoñetasa avei. Sese eyapisacami nde reco mbegüesa pipe che ñehe rese” ehi.

*Pablo omombehura güecocuer oñecuñaro viteẽhisendar*

<sup>4</sup> “Opacatu judío che cua vahe yuvireco, oicua tupri che recocuer che chihivahe suive che recuave iyavei Jerusalén ve aicose yuvireco.

<sup>5</sup> Omombehu potase che recocuer yuvireco viña, aipo ehira: ‘Pablo viroya tupri ité fariseo porombohesa. Ahe icuapri catu yande recua rupi’ ehira yuvireco viña.

<sup>6</sup> Sese cūritei che reru nde rovai yuvireco che recocuer rese nde porandu ãgua. Esepia, aroya Tūpa remimombehugüer ore ramoi uve omombehu vahe aracahe” ehi.

<sup>7</sup> “Doce ore ramoi suindar opacatu judío yuvirecoi, osãro vite evocoi Tūpa remimombehugüer aviye vahe yuvireco. Sese yuviroique tūparove ari, pĩtu pipe avei Tūpa

mboetei ãgua yuvireco. Ore rerecuar Agripa, eyapisaca tupri che ñehe rese. Evocoi Tũpa remimombehugüer reroyasa sui judío eta semiramira tẽi che amotarẽhisave che rese yuvireco” ehi.

<sup>8</sup>“Iyavei opacatu pe, ¿mahera pe avei ndaperoyai Tũpa porombogüerayevisa?” ehi.

*Pablo omombehu yipindar Jesús reroyasar amotarẽhi agüer*

<sup>9</sup>“Yipindar che avei che pihañemoñeta rai aracaco mbahe tẽi apo ãgua rese ava Jesús, Nazaret pendar, rer amotarẽhisave.

<sup>10</sup> Ëgüe ahe Jerusalén ve. Ombouse pahi rerecuar oporocuita cheu, ahese serer pipe setá Jesús reroyasar asoquenda; iyavei ambuae ava oyucase Jesús reroyasar yuvireco, ‘Toyucaño yuvireco’ ahe voĩño ité che” ehi.

<sup>11</sup>“Setá rupi amombaraisu Jesús reroyasar ‘tamomboipa ava seroyasa sui yuvireco’ che hesa pipe tẽi. Ëgüe ahe aguata opacatu tũparo rupi, ambuae tecua rupi avei yamotarẽhisa pipe” ehi.

*Pablo omombehu güeco recuñaro agüer*

<sup>12</sup>“Evocoiyase aso avei Damasco ve Jesús reroyasar mombaraisu ãgua, pahi rerecuar ombouse oporocuita apo ãgua cheu” ehi.

<sup>13</sup>“Mbiter ari rupi rumo, aguatase Damasco piar rupi, asepia mbahe sendí vahe iva sui. Ari sui osesape catu cheu, che rupindar upe avei.

<sup>14</sup> Orovipipase ivive, asendu ñehesa aipo ehi vahe hebreo ñehe pipe cheu: ‘Saulo, Saulo, ¿mahera vo ereyapo mbahe-mbahe tẽi cheu? Ereyapose

evocoi mbahe tēi, nde ae ereyemombaraisu' ehi cheu.

<sup>15</sup> Evocoiyase amboyevi: '¿Ava vo nde ereico, mbia?' ahe chupe. Omboyevi cheu: 'Che Jesús aico, che niha co che amotarēhi eve.

<sup>16</sup> Epūha, co rese ayemboyecua ndeu, tasecoi che rembiguai, che yapave. Tomombehu avei co mbahe osepia vahe iyavei tomombehu avei co mbahe amboyecua vaherā chupe curi, viya ndeu' ehi.

<sup>17</sup> 'Oropīsirora judío sui iyavei oromondora ava ndahei vahe judío upe. Ereguatase ipāhuvē, oropīsira aveira' ehi cheu.

<sup>18</sup> 'Oromondora, tache cua yuvireco, che yapave iyavei toguata iri eme pītumimbi vahe nungar rupi; toguata catu tesapesa rupi yuvireco. Ipipe sui toyuvireco iri eme carugar povrive yuvireco; toguata catu Tūpa rupi; ēgūe tehi che reroya yuvireco. Ahese oipisira ñeroisa oangaipa rese yuvireco iyavei oipisira Tūpa porerecosā oime va-herā opacatu che rembipeha rupive' ehi Jesús cheu" ehi Agripa upe.

### *Pablo viroya mbahe güembiepia*

<sup>19</sup> "Evocoiyase, che rerecuar Agripa, che quer nungarve asepia vahe ìva pendar, aroya ité.

<sup>20</sup> Aipo ahe ava upe: 'Pemboasi pe angaipa; peyevi Tūpa upe. Peicove tupri, ipipe sui toicua ava yuvireco pe ñecuñarosa' ahe. Aipo ahe Damasco pendar upe rane añehe, ipare Jerusalén pendar upe iyavei Judea rupindar upe, coiye catumi ava ndahei vahe judío upe.

21 Sese tēi judío che pisi tūparo pipe che yuca pota yuvireco” ehi.

22 “Tūpa che pītiviisa pipe rumo aicoveño ité supi, amombehu-mbehu vite Tūpa recocuer opacatu ava seco ivi coti catu vahe upe, seco ivate catu vahe upe avei. Namombehuí eté que mbahe co coti tēi Tūpa ñehe mombehusar iyavei Moisés, ‘Oimera mbahe avíye vahe’ ihe agüer sui.

23 Aracahe omombehu yuvireco: ‘Tūpa Rembiporavo Poropisirosar omano ranera’ ehi. Ahe rumo yipindar ocuerayevi vaherã omano vahe pãhu sui. Omombehu aveira tesapesa ñepisirosa resendar ore mu judío yuvirecoi vahe upe iyavei ava ndahei vahe judío upe avei” ehi Agripa upe.

*Pablo osecuñaro pota tēi Agripa recocuer*

24 Aipo ehise Pablo oñehe oyoepisave, Festo oñehengataño chupe aipo ehi:

—¡Nande mboaracuai moco nde mbahecua vaisa! —ehiño chupe.

25 Ahe rumo omboyevi chupe:

—Imboyeroyapri Festo, ¿mara ahe vo ndache aracuai? Amombehu rumo ndeu mbahe supi eté vahe, ndahei che aracuaēhisave —ehi Festo upe—.

26 Co mborerecuar revo oicua tupri avei che remimombehu. Sese ndasiquiyei opacatu co mbahe mombehu ãgua chupe. Esepia, opacatu co mbahe yaposa vahe ndahei ñomipri tēi.

27 Ore rerecuar Agripa, ¿ereroya vo evocoi Tūpa ñehe mombehusar rembicuachía? Che aicua ereroya ité —ehi Agripa upe.

28 Ahese Agripa omboyevi chupe:

—Moviro tēi ñehesa ipane cheu Jesús reroya āgua —ehi chupe.

<sup>29</sup> Ahe omboyevī Agripa upe:

—Ipanese que moviro tēi, anise setá vite ñehesa ndeu iyavei opacatu osendu vahe che ñehē co pipe, ēgüe ehi tarahu Tūpa pēu viña che nungar pe reco āgua. Ndahei chira rumo soquendapirā peico —ehi.

<sup>30</sup> Aipo ihe pare, mborerecuar guasu iyavei ambuae mborerecuar Berenice reseve iyavei opacatu sendusar opūha yuvireco.

<sup>31</sup> Oyepepī pare, oñemoñeta co cotī aipo ehi yuvireco:

—Evocoi mbīa ndoyapoi eté mbahe. Sese ndiyai yucapirā; ndiyai avei soquendapirā viña —ehi yuvireco oyeupe.

<sup>32</sup> Ahese Agripa aipo ehi:

—Ahe ndoporanduisse Cesar upe oso āgua rese, yamoseño itera niha viña —ehi Festo upe.

## 27

### *Pablo imondosa Roma ve*

<sup>1</sup> Evocoiyase mborerecuar opīhañemoñeta omboyoya yuvireco ore mondo āgua carite pipe Italia ve. Sese omondo Pablo iyavei ambuae ava soquendapirī yuvireco mbīa Julio serer vahe upe. Ahe mbīa sundao rehi rerecuar secoi, ahe yuvirecoi vahe rer Mborerecuar upendar.

<sup>2</sup> Oroha carite pipe, ahe Adramitio sui yuvirasota vahe Asia ve. Mbīa Tesalónica pendar, Aristarco serer vahe, oha avei ore rupi, ahe secua Macedonia ivī rupi.

<sup>3</sup> Ahere ayihive oroyepota yemboyasa Sidón serer vahesave, aheve Julio saisupave Pablo upe aipo ehi: “Eguata tupri nde mboripar rēta rupi nde rese ihañeco tupri ãgua yuvireco” ehi chupe.

<sup>4</sup> Sidón sui orosirise, oroso Chipre ivi rupi ivitu sui ore ñemoha ãgua. Oroso pota tēi ari sosa coti rupi, ndoroicatui rumo. Esepia, oipeyu pĩrata ivitu icoti sui.

<sup>5</sup> Evocoyase oroguata para guasu pĩpe Cilicia, Panfilia ivi rupi. Ipare oroyepota tecua Mira yemboyasave, ahe Mira, Licia ivi pĩpe.

<sup>6</sup> Aheve sundao rereciar oyosu carite ou vahe Alejandría sui, oso vaheñe Italia ve. Evocoyase ahe ipipe opa voi ore mboha.

<sup>7</sup> Ichui oroguata mbegüe setá ari. Oroporaviquí iteanga oreypota ãgua Gnido rovai. Ivitu oipeyu pĩrata vite. Sese oroyahuva Creta coti, oroñocua tecua Salmón rovai rupi. Ëgüe orohe oroso Creta cupe rupi.

<sup>8</sup> Supi yavai rai ore guata ãgua, ipare oroyepota yemboyasa Yemboyasa Aviye vahe serer vahesave. Ahe ichui namombrii tecua Lasea.

<sup>9</sup> Ore yepota ãgua aheve, setá ari oromocañi. Ahese ivitu naporai catu oreu cute. Esepia, virovi ari naporai catu vahe. Sese Pablo aipo ehi carite pĩpendar upe:

<sup>10</sup> —Mbia, naporai iri chira revo yande guata vite ãgua. Yaguata vitesese, yamocañira carite, ivosita reseve, yande avei eté aviyeteramo yacañi tēira — ehi.

<sup>11</sup> Sundao rereciar rumo nomboyeroyai iñehe, ahe omboyeroa catu carite rerogatasar, carite yar avei.



12 Ahe yemboyasa naporai ivitu ai rãro ãgua aheve. Sese setá catu “yasoño” ehi vahe yuvireco, “Tayayepota catu Fenice ve, aheve tayasãro ivitu ai” ehi yuvireco viña. Ahe Fenice Creta ivirindar yemboyasa aviye vahe. Aheve carite yuviroique norte ique rupi iyavei irohi ique rupi avei yepi.

*Ivitu ai para guasu pipe*

13 Oipeyu mbegüemise ivitu irohi coti sui, ipihañemoñeta yuvireco, “Yaicatuño ité yande yepota ãgua” ehi yuvireco viña. Ahese orosirise ore yemboyasa sui, oroso Creta ivi rupi.

14 Coiyemi tēi rumo oyepota ivitu ai oreu Creta coti sui. Ahe ivitu ai ou norte ique coti sui.

15 Oyepotase oreu, ndoroicatu iri eté sovaichi. Evocoiyase, “Tayande rerasoño” orohe chupe.

16 Oroñocua caha pãhumi serer Cauda. Ahe oroñocuasave oroviroha sãi ore caritemi ore carite guasu pipe.

17 Orosupire, ahe oicuhacua carite guasu inicha pipe yuvireco. Ipare ipihañemoñeta yuvireco ‘carite oyeupi tiëtera ivi cuhi Sirte serer vahe harive’ oya. Sese opa viroyi imombitasa yuvireco. Ahese ivitu ore reroguataño.

18 Ivitu rumo ombohitú iteanga para guasu. Sese ahere ayihive oporaviqui vahe omboipi carite vosita mombo yuvireco.

19 Imombosapisa ari pipe, omombo vite mbahe carite resendar yuvireco.

20 Setá ari ndoyecuai ari, yasitata avei oreu. Ivitu ai ndopaiño ité avei. Opa ité ore pihañemoñeta mocañi, “Yacañi tēi etera para guasu pipe” orohe viña.

21 Setá ari ore caruēhi pare, Pablo opūha aipo ehi carite pīpendar upe:

—Mbia, ehi acoi che reroya voira peye viña, nayasēise Creta sui, ahese ndipoi chira co mbahe yandeu cūritei viña —ehi—.

22 Cūritei, peyemonguerēhi catuño. Esepia, ndipoi chira yande pāhu pendar omano vahe, carite güeraño rumo ocañi tēira.

23 Ayihi pīsa oyemoporēhi cheu Tūpa rembiguai semimbou, chupendar che aico, chupe avei aporaviqui.

24 Ahe aipo ehi cheu: “Pablo, eresiquiyeyi rene. Ereyepotaño itera Cesar upe. Tūpa oipīsiro aveira opacatu nde rupindar carite pīpendar” ehi cheu.

25 Mbia, ayeroya Tūpa rese. Esepia, ahe omboaviye itera oñehesa cheu. Sese peyemonguerēhiño —ehi—.

26 Yande mohañira rumo imbehi coti caha pāhumi rese yande mondo —ehi.

27 Ñuvirío semana ivitu ore reroguata pare ahe pītu mbiter pīpe para guasu Adriático rupi orocose, carite pīpe oporaviqui vahe ipihañemoñeta yuvireco ‘yarovi revo ivi yaico’ oya.

28 Sese osāha para guasu rīpigüer yuvireco. Ahe tipigüer treinta y seis metros tupri. Ipare osiri irimi yuvireco. Aheve osāha iri, tipigüer veintisiete metros tēi. Ahese oicua, “Yarovi ivi” ehi yuvireco.

29 Ipihañemoñeta yuvireco: “Aviyeteramo yayepotara itave” ehi. Sese yuviraso carite rupitave. Aheve osiquiyepave omombo irungatu carite mombitasa tuvicha vahe ipive yuvireco.

“¡Omocohe voi tarahu Tūpa yandeu viña!” orohe tēi.

<sup>30</sup> Oñemi potase oporaviqui vahe carite guasu sui yuvireco, viroyi caritemi mbahemohasa. Ombopa pota tēi ambuae carite pīendar yuvireco viña, “Oromombora carite renonendar imombitasa” ehi tupri tēi yuvireco.

<sup>31</sup> Pablo rumo aipo ehi sundao rerecuar upe, sundao eta upe avei imombehu:

—Ndopitaise carite pipe yuvireco co oñemi pota vahe, pe ndapeñepisiroi chietera —ehi.

<sup>32</sup> Ahese sundao eta oyasia caritemi sã oiti ive imondo yuvireco.

<sup>33</sup> Cõhe ramosé Pablo aipo ehi opacatu upe:

—Cūrítei ñuvirío semana pemomba pecaruēhi peico ‘¿mara yahera pīha co yaico?’ pe hesa pipe.

<sup>34</sup> Evocoyase pehuñomi mbahe cute pe ñepisiro ãgua. Acoi ocañise carite, yande rumo nayacañi chira iyavei que ñepepe ha nocañi chietera —ehi Pablo.

<sup>35</sup> Aipo ehi pare, oipisi pan, “Aviye ndeu” ehi Tūpa upe ihu ãgua. Ahe imbohi pare, ohu.

<sup>36</sup> Evocoyase opacatu ava oyemonguerēhi yuvireco ocaru ãgua.

<sup>37</sup> Ore retacuer doscientos setenta y seis tupri.

<sup>38</sup> Ore caru pare, oporaviqui vahe opa omombo trigo carite vosita para guasu pipe iposiiēhi ãgua yuvireco.

### *Carite ocañi*

<sup>39</sup> Cõhese, osepiase ivi, “¿Que pīha yaico?” ehi tēi yuvireco. Oyosuse rumo yãcua vahe, ipipe oime ivi cuhi ipiru vahe. Aheve yuviroique pota tēi yuvireco viña.

<sup>40</sup> Oyasia ahe carite mombitasa cuasa carite sui yuvireco, omonguhi carite mboyahuvasa, osupi carite resendar turucuar imboguatasa yuvireco. Evocoiyase oroique oroso yācua vahe pipe.

<sup>41</sup> Oroguatase rumo, oroyapi ivi cuhi. Aheve carite opāha ité sese. Ndoicatui eté seroyevi yuvireco iyavei carite rupita i ohitu vahe opa tupri oyoca.

<sup>42</sup> Ahese sundao eta, “Aviyeteramo soquendapri ohita tiētera, oñemi yuvireco. Sese yayucapa” ehi yuvireco chupe viña.

<sup>43</sup> Sundao rerecuar rumo ndoipotai Pablo mano āgua, sese, “Teheni” ehi, “peyucai rene soquendapri” ehi. “Ohita oicua vahe rane toyuvirocui ive, toyuvinose ivi rese yuvireco” ehi.

<sup>44</sup> “Ambuae evocoiyase ivirape, carite yecacuer rese toyasecoño yuvinose āgua ivi rese” ehi. Ēgüe orohe orosēpa ivi rese oroso.

## 28

### *Caha pāhu Malta ve Pablo seci*

<sup>1</sup> Ore ñepisiropare, ahese ramo oroicua caha pāhu rer Malta revo rahe.

<sup>2</sup> Ahe pendar ava nihapisi ore repiase yuvireco. Oquí iteanga, sōhisa avei. Ahese oyatapi guasu yuvireco, “Perio, tapeyepehemi” ehi yuvireco oreu.

<sup>3</sup> Evocoiyase Pablo omonuha yepaha seru, omondo potase rumo tatave, ahese osē aviyeteramo tēi sacucuer sui mboi ahe eté vahe chupe, oipomama ichuhu.

<sup>4</sup> Osepiase mboi ichuhuse ahe pendar yuvireco, ahese, “Co mbia revo oporapichi vahe ité. Yepe

oñepisiro para guasu sui viña, Tũpa rumo oichuhu uca mboi upe ‘tomano’ oya” ehi yuvireco viña.

<sup>5</sup> Ahe rumo omomboño mboi tatave imondo oyesui. Ipare nomomaraño ité.

<sup>6</sup> Ahe pendar opacatu osãro tẽi yuvireco, “Iru-rura chupe, ahese oviapira, omanora revo” ehi yuvireco chupe viña. Osãro pucu tẽi yuvireco, Pablo rumo nimaraño ité. Ahese, “Ndahei vo co mbia tũpa ité co secoi” ehi tẽi yuvireco chupe.

<sup>7</sup> Evocoyase mbia Publio serer vahe, ahe opacatu caha pãhu Malta pendar ava rerecuar secoi. Ivi namombriimi ichui. Ahe nihapisi ore repia güetave iyavei ihañeco tupri ai ore rese mbosapi ari rupi.

<sup>8</sup> Aheve ore recoseve Publio yesupa sohí iteanga ou, sepochiuví avei. Evocoyase Pablo oique chupe. Ahese oyeroku Tũpa upe sese, omondo opo iharive. Ëgüe ehi imbogüera.

<sup>9</sup> Oyanduse ahe icuera yuvireco, ahese ambuae imbaheasi vahe evocoi caha pãhu pendar yugüeru chupe, ahe ombogüerapa avei.

<sup>10</sup> Ahe pendar oyemboava etepri yuvireco oreu. Ipare ore ha ãgua ambuae carite pipe, opacatu mbahe ore guatasa rupi ipaneẽhi ãgua ogüeru yuvireco oreu.

### *Pablo oyepota Roma ve*

<sup>11</sup> Co carite mbosapi yasi osãro vahe ari mbahe tẽi vahe pituhu ãgua. Ipipe oroso. Ahe carite yugüeru Alejandría sui. Ahe ichĩ rese ñuvirío itũpa rahanga yuvireco: ñepeí rer Cástor, ambuae evocoyase Pólux.

12 Ahese oroso oroyepota yemboyasa Siracusa ve. Aheve oropita mbosapi ari.

13 Ichui orosē oroso oroyepota Regio ve. Ahere ayihive ivitu oipeyu irohi coti sui. Sese oroyepota Puteoli ve ambuae ari pipeve.

14 Aheve orosepia ambuae Jesús reroyasar. Ore mombita güetave yuvireco ñepei semana. Ipare oroso Roma ve ivi rupi.

15 Jesús reroyasar Roma pendar yipive ore andu yuvireco. Sese moviro yugüeru Foro de Apio ve, ambuae yugüeru Tres Tabernas ve ore rape penda ãgua yuvireco. Sepiase, Pablo, “Aviye ndeu” ehi Tüpa upe.

16 Oroyepotase Roma ve, sundao rerecuar co coti omondo Pablo ñepei sundao upe sãro uca ãgua.

*Pablo omombehu Roma ve Tüpa Ñehengagüer*

17 Mbosapi ari pare Pablo omonuha opacatu judío rerecuar Roma pendar. Ahese oñehe chupe:

—Che mu eta, ndayapoi mbahe tēi judío Jerusalén pendar upe, naróiroi avei yande ramoi recocuer viña. Che roquendasa rumo iyavei imondopri aico Romano sundao rerecuar povrive.

18 Ahe mborerecuar oporandu che recocuer rese yuvireco. Oicuase che recocuer, opoi pota tēi che sui yuvireco viña. Esepia, ndoyosui eté mbahe che rembiapo che yuca ãgua yuvireco.

19 Evocoi judío rumo ndoipotaiño ité chupe. Ahese ayu pota cohava Cesar upe che yoepi ãgua. Nayamotarēhi uca potai rumo che mu Jerusalén pendar Cesar upe —ehi—.

20 Che yoepi ãgua oposoho uca. Opomoñeta pota yande remiaro rese. Co Tüpa Rembiporavo ava

pĩsĩro ãgua resendar reroyasa rese carena pipe ñapichimbrĩ aico —ehi.

<sup>21</sup> Ahese ahe ava omboyeveĩ yuvireco chupe:

—Noroipĩsĩi eté cuachiar Judea sui nde resendar. Iyavei yande mu oyepota vahe Judea sui nomombehui mbahe naporai vahe nde recocuer resendar yuvireco oreu —ehi—.

<sup>22</sup> Opacatu rupi ava viroĩro pe rembieroya pĩasu yuvireco. Sese orosendu pota nde pihañemoñetasa —ehi yuvireco chupe.

<sup>23</sup> Oiporavo ari ñehe ãgua yuvireco. Osupitise ari chupe, setá catu ava oñemonuha yuvireco secosave. Ahese omombehu Tũpa mborerecuasa resendar iyavei Jesús recocuer Moisés porocuaíta icuachiapri pipe sui iyavei Tũpa ñehe mombehusar rembicuachía pipe avei ‘toviroya yuvireco’ oyapave. Ëgüe ehi imombehu ari momba.

<sup>24</sup> Amove osendu vahe viroya yuvireco, ambuae rumo ndoviroyai eté yuvireco.

<sup>25</sup> Opĩhañemoñetasa nomboyoyaise yuvireco, yuvĩnosepa pota. Ahese aipo ehi ahe ava upe:

—Supi eté Isaías omombehu Espĩritu remimombehu pe recocuer resendar pe ramoĩ upe aracahe aipo ehi:

<sup>26</sup> “Eso nde mu pãhuve.

Emombehu aipo ere:

‘Yepe pesendu tẽira mbahe viña,  
ndapesenducuai chira rumo.

Iyavei pesepia tẽira mbahe viña,  
ndapemahecuai chira rumo sese’ ere chupe.

<sup>27</sup> Esepia, co ava ipĩharātá iteanga seroyaẽhisave. Ndoyemboapĩsaĩño yuvireco.

Iyavei osapĩvi tupriño mbahe sui, ndosepia potai mbahe aviye vahe yuvireco.

Ndosenducua catui eté avei ñehesa supi eté vahe. Evocoyase ndoyevi potai cheu güecocuer moingatu yuvireco” ehi Espiritu Santo remimombehu chupe aracahe —ehi—.

<sup>28</sup> Sese tapeicua co pĩpe suive Tũpa omboyecua ucara oporopĩsirosa ava ndahei vahe judío upe. Ahe niha oyapĩsacara imombehusa rese yuvireco —ehi chupe.

<sup>29</sup> Aipo ihe pare, judío yuvĩnose iñehe rese oyecopi-copi yuvĩraso.

<sup>30</sup> İpare Pablo opĩta ambuae ava rēlave ñuvĩrío aravĩter rupi omboepi oque ãgua oico. Aheve nihapĩsii opacatu ava rese oyepĩri oyepotase yepi.

<sup>31</sup> Omombehu Tũpa mborerecuasa resendar iyavei oporombohe opacatu yande Yar Jesucristo recocuer resendar osiquiyeẽhisa pĩpe. Ndipoi eté que ava omombĩtuhu vahe Pablo ñehese.



**Tũpa Ñehengagüer**  
**New Testament in Guarayu (BL:gyr:Guarayu)**

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

CXXX

2014-04-25

---

PDF generated using Haiola and XeLaTeX on 18 Apr 2025 from source files  
dated 29 Jan 2022

c27c2d97-c359-59f5-b367-83efb2e33739